

# অবিশ্বাস্য

সৈয়দ মুজিব আলী

প্রকাশক :

ব্রজকিশোর মণ্ডল

বিশ্ববাণী প্রকাশনী

৭২/১বি, মহাত্মা গান্ধী রোড

কলকাতা-২

মুদ্রাকর :

অশোককুমার ঘোষ

নিউ শশী প্রেস

১৬ হেমেন্দ্র সেন স্ট্রীট

কলকাতা-৬

প্রচ্ছদশিল্পী :

গণেশ বসু

বাঙলা স্মৃতিত্বের একনিষ্ঠ সেবক  
স্মরসিক শ্ৰীপ্রমথনাথ বিশীকে—







মধুগঞ্জ মহকুমা শহর বলে তাকে অবহেলা করা যায় না।

মধুগঞ্জের ব্যবসা-বাণিজ্য নগণ্য, মধুগঞ্জ রেল স্টেশন থেকে কুড়ি মাইল দূরে, মধুগঞ্জে জলের কল, ইলেকট্রিক নেই, তবু মানুষ মধুগঞ্জে বদলি হবার জন্য সরকারের কাছে ধন্যে দিত। কারণ এসব অসুবিধাগুলো যে রকম এক দিক দিয়ে দেখতে গেলে শাপ, অশুভ দিক দিয়ে আবার ঠিক সেইগুলোই বর। মাছের সের ছু আনা, ছুধের সের ছ পয়সা, ঘিয়ের সের বারো আনা এবং সেই অনুপাতে আণ্ডা মুরগী সবই সম্ভা। আর সবচেয়ে বড় কথা, কাচ্চাবাচ্চাদের লেখাপড়ার জন্য মধুগঞ্জ পূব-বাঙলা-আসামের অক্সফোর্ড বললেও বাড়িয়ে বলা হয় না; ওয়েলশ মিশনারীদের কৃপায় মধুগঞ্জে একটা হাইস্কুল আর ছোটো প্রাইমারী স্কুল যে পদ্ধতিতে চলত তা দেখে বাইরের লোক মধুগঞ্জে এসে অবাক মানত। স্কুল হস্টেলে সীটের জন্য পূব-বাঙলা-আসামে একমাত্র মধুগঞ্জেই আড়াই-গজ ওয়েটিং লিস্ট অফিসের দেয়ালে টাঙানো থাকত। হস্টেলের খাই-খরচা মাসে সাড়ে চার টাকা, আর সীট রেন্ট চার আনা!

মধুগঞ্জের আরেকটি সদৃশ্যের উল্লেখ করতে লেখকমাত্রই ঈষৎ কুণ্ঠিত হবেন। লেখকমাত্রই সাহিত্যিক, কাজেই মধুগঞ্জের প্রাকৃতিক সৌন্দর্য তাঁদের হৃদয় আকৃষ্ট করবে এ তো জানা কথা। কিন্তু সাহিত্যিকেরা এ তত্ত্বও বিলক্ষণ জানেন যে, এ সংসারে আর পাঁচজন শহরের দোষগুণ নির্ণয় করার সময় প্রাকৃতিক সৌন্দর্য জিনিসটাকে জমা-খরচের কোনো খাতেই ফেলার কোনো প্রয়োজন বোধ করেন না। কারণ, এ তত্ত্ব তো অতিশয় সত্য যে, নিছক প্রকৃতির মাধুর্যে মুগ্ধ হয়ে কেউ চাকরিতে বদলি খোঁজে না, কিংবা ব্যবসা ফাঁদে না।

এ সত্য জানা সত্ত্বেও যে ছ-একজন সাহিত্যিক বরযাত্রীরূপে কিংবা সাহিত্য সম্মেলনের সভাপতিত্ব করতে এল্লসছেন তাঁরাই মধু-গঞ্জের উচ্ছ্বসিত প্রশংসা করে গিয়েছেন। তাই দেখে খাস মধুগঞ্জীয় কাঁচা সাহিত্যিকেরাও মধুগঞ্জের আর পাঁচটা সুখ-সুবিধের সঙ্গে তার প্রাকৃতিক দৃশ্যেরও প্রশস্তি গেয়েছেন।

পশ্চিম বাঙলা যেখানে সত্যই সুন্দর সেখানেই দেখি তাঁর উঁচু-নিচু খোয়াইডাঙা আর দূরদূরান্তের নীলাভ পাহাড়। উঁচু-নিচুর চেউ খেলানো মাঠের এখানে ওখানে কখনো বা দীর্ঘ তালগাছের সারি, আর কখনো বা একা দাঁড়িয়ে একটিমাত্র তালগাছ। এই তালগাছ-গুলো মানুষের মনে যে অন্তহীন দূরত্বের মায়া রচে দিতে পারে তা সমুদ্রও দিতে পারে না। সমুদ্রপাড়ে বসে মনে হয়, এঐ আধমাইল দূরেই বুকি সমুদ্র থেমে গিয়েছে—আকাশে নেমে গিয়ে নিরেট দেয়ালের মত হয়ে সমুদ্রের অগ্রগতি বন্ধ করে দিয়েছে।

পশ্চিম বাঙলার খোয়াইডাঙা তাই তার শালতাল দিয়ে, দূর না হয়েও যে দূরত্বের মরীচিকা সৃষ্টি করে সে মায়াদিগন্ত মানুষের মনকে এক গভীর মুক্তির আনন্দে ভরে দেয়। জানি, মন স্বাধীন; সে কল্পনার পক্ষিরাজ চড়ে এক মুহূর্তেই চন্দ্রসূর্য পেরিয়ে সৃষ্টির ওপার পানে ধাওয়া দিতে পারে, কিন্তু সে স্বপ্ন-প্রয়াণে তো আমার রক্ত-মাংসের শরীরকে বাদ দিয়ে চলতে হয়—আমাকে দেখতে হয় সব-কিছু চোখ বন্ধ করে। আর এখানে আমার ছুটি মাত্র চোখই আমাকে এক নিমিষে নিয়ে যায় দূর হতে দূরে যেখানকার শেষ নীল পাহাড় বলে, ‘আরো আছে, আরো দূরের দূর আছে’; সে যেন ডাক দিয়ে বলে, ‘তুমি মুক্ত মানুষ, তুমি ওখানে বসে আছ কী করতে—চলে এসো আমার দিকে।’

এ মুক্তি-ধারণা নিছক কবি-কল্পনা নয়। বহুবার দেখা গিয়েছে সন্ধ্যার সময় পশ্চিমপানে তাকাতে তাকাতে সাঁওতাল ছেলে হঠাৎ দাওয়া ছেড়ে সূর্যাস্তের দিকে রওয়ানা দিল। তারপর সে আর

ফিরল না। মড়া পাওয়া গেল পরের দিন খোয়াইয়ের মাঝখানে—  
বাড়ি হতে অনেক দূরে ; বুড়ো মাঝিরা বলে, ভূত তাকে ডেকেছিল,  
তারপর অন্ধকারে পথ হারিয়ে কী দেখেছে, কী ভয় পেয়ে মরেছে,  
কে জানে ?

পূব-বাঙলার সৌন্দর্য দূরত্বে নয়, পূব-বাঙলার ‘মাঠের শেষে  
মাঠ, মাঠের শেষে সুদূর গ্রামখানি আকাশে মেশে’ নয়, সেখানে  
মাঠের শেষেই ঘন সবুজ গ্রাম আর গ্রামখানির উপর পাহারা দিচ্ছে  
সবুজের উপর সাদা ডোরা কেটে কেটে সুদীর্ঘ সুপারি গাছ। আর  
সে সবুজ কত না আভা, কত না আভাস ধরতে জানে। কচি  
ধানের কাঁচা-সবুজ, হলদে-সবুজ থেকে আরম্ভ করে আম, জাম,  
কাঁঠালের ঘন সবুজ, কৃষ্ণচূড়া-রাশাচূড়ার কালো সবুজ। পানার সবুজ,  
শাওলার সবুজ, কচি বাঁশের সবুজ, ঘনবেতের সবুজ—আর ঝরে-পড়া  
সবুজ পাতার রস খেয়ে খেয়ে পূব-বাঙলার মা-টি হয়ে গেছেন গাঢ়  
সবুজ—কৃষ্ণশ্যাম। তাই তাঁর মেয়ের গায়ের রঙে কেমন যেন সবুজের  
আমেজ লেগে আছে। সে শ্যামশ্রী দেশ-বিদেশে আর কে পেয়েছে,  
আর কে দেখেছে ?

কিন্তু মধুগঞ্জের সৌন্দর্য এও নয় ওও নয়। মধুগঞ্জ পূব-বাঙলার  
মত ফ্ল্যাট নয়, আবার পশ্চিম বাঙলার মত টেউখেলানোও নয়।  
ভগবান যেন মধুগঞ্জে এক তিসরা খেলা খেলার ছন্দ নয়া এক  
ক্যানভাস নিয়ে বসে গেছেন। ক্যানভাসখানা বিরাট আর তাতে  
আছে মোটামুটি তিনটি বড় রঙের পৌঁচ—সামনের ‘কাজলধারা’ নদীর  
কাকচক্ষু কালো জল, নদী পেরিয়ে বিস্তীর্ণ সবুজ ধানখেত, সর্বশেষে  
এক আকাশছোঁয়া বিরাট নিরেট নীল পাথরের খাড়া পাহাড়।  
এখানে পশ্চিম বাঙলার মত মাঠ টেউ খেলতে খেলতে পাহাড়ে  
বিলীন হয় নি—পাহাড় এখানে দাঁড়িয়ে আছে পালিশ সবুজ মাঠের  
শেষে সোজা খাড়া পাঁচিলের মত। তার গায়ে কিছু কিছু খাঁজ  
আছে কিন্তু এ খাঁজ ঝাঁকড়ে ধরে ধরে উপরে চড়া অসম্ভব।

মধুগঞ্জের যেখানেই যাও না কেন উত্তরদিকে তাকালে দেখতে পাবে, কালো নদী, সবুজ মাঠ আর তার পর নীল পাহাড়। আর সেই পাহাড় বেয়ে নেমে এসেছে কত শত রূপালী ঝরনা। দূর থেকে মনে হয়, নীল ধাতুর উপর রূপোর বিদ্রী মিনার কাজ।

এ পাহাড় হাতছানি দিয়ে ডাকে না—এ পাহাড় বলে, যেখানে আছ সেইখানেই থাকো।

এরকম পাহাড় বিলেতে প্রচুর আছে, শুধু গায়ে নেই মিনার কাজ আর সামনে নেই সবুজ মাঠ, কাজলধারার কালো জল।

তাই আইরিশম্যান ডেভিড ও-রেলি মধুগঞ্জে অ্যাসিস্টেণ্ট সুপারিন্টেন্ডেন্ট অব পুলিশ হয়ে আসামাত্রই জায়গাটার প্রেমে পড়ে গেল।

## দুই

প্রেমটা কিন্তু দু তরফাই হল। ছোট্ট মহকুমার শহরটি ও-রেলিকে দেখে প্রথম দর্শনেই ভালবেসে ফেললে।

তার প্রধান কারণ বুঝতে কিছুমাত্র বেগ পেতে হয় না। ও-রেলি সত্যিই সুপুরুষ। ইংরেজ বাঙালীর তুলনায় অনেক বেশী ঢ্যাঙা তার উপর এদেশে বেশীদিন বাস করলে কেউ হয়ে যায় দারুণ মোটা, কেউ বড্ড লিকলিকে, কারো বা নাক হয়ে যায় টকটকে লাল, কারো দেখা দেয় সাদা চামড়ার তলায় বেগনি রঙের মোটা মোটা শিরা-উপশিরা। তার-ই মাঝখানে হঠাৎ যখন স্বাস্থ্যসবল আরেক ইংরেজ এসে দেখা দেয়—ইংরিজিতে যাকে বলে ফ্রেশ ক্রম ক্রিস্টিয়ান হোম—তখন সে সুন্দর না হলে তাকে প্রিয়দর্শন বলে মনে হয়, রাজপুত্র না হলেও অন্তত কোটালপুত্রের খাতির পায়।

বয়স তার একুশ, জোর বাইশ। সায়েবদের ফরসা তো আছেই কিন্তু তার চুল খাঁটি বাঙালীর মতো মিশকালো আর তার সঙ্গে ঘননীল চোখ। এ জিনিসটি অসাধারণ; কারণ সায়েব-মেমদের চুল কালো হলে চোখও কালো, নিদেনপক্ষে বাদামী—আর চুল রঙ হলে চোখ হয় নীল। আমাদের দেশেও যাদের রঙ ধবধবে ফরসা হয় তাদের চোখও সাধারণত একটুখানি কটা; তাই যখন তাদের চোখ মিশমিশে কালো হয় তখন যেন তাদের চেহারাতে একটা অদ্ভুত ঔজ্জ্বল্য দেখা দেয়। কালো চুল আর নীল চোখও সেই আকর্ষণী শক্তি ধরে।

মধুগঞ্জ যদিও ছোট শহর তবু তার বিলিতি ক্লাব এ অঞ্চলে বিখ্যাত। শহর থেকে বিশ মাইল দূরে যে স্টেশন সে পথের হৃদিকে পড়ে বিস্তর চা-বাগান আর রোজ সন্ধ্যায় সে সব বাগান থেকে হেটিয়ে আসত ক্লাবের দিকে সায়েব-মেম আর তাদের আঙা-বাচ্চারা।

ফুটফুটে ক্লাব-বাড়িটি। একদিকে লন টেনিসের কোর্ট আর ভিতরে বিলিয়ার্ড খেলার ব্যবস্থা—বিলিয়ার্ডের বল দেখে খানসামারা ক্লাবের নাম দিয়েছিল ‘আগাঘর’ আর সেই থেকে এ অঞ্চলে ঐ নামই চালু হয়ে যায়।

এ সম্পর্কে মুকুব্বি রায়বাহাদুর কাশীশ্বর চক্রবর্তীরও একটা ‘অনবছ অবদান’ আছে। ক্লাব তখন সবেমাত্র খুলেছে। সাহেব-মেমরা ধোপ-ছুরস্ত জামাকাপড় পরে টুকটাক করে টেনিস খেলছেন—রাস্তা দিয়ে যেতে যেতে রায়বাহাদুর ভীত নয়নে একটিবার সেদিকে তাকালেন। সে সন্ধ্যায় পাশার আড়ায় রায়বাহাদুর গস্তীর কণ্ঠে সবাইকে বললেন, ‘দেখলে হে কাণ্ডখানা, সায়েবরা নিজেদের জন্ত রেখেছে একখানা মোলায়েম খেলা; ধাক্কাধাক্কি মারামারি নেই—যে যার আপন কোঠে দাঁড়িয়ে দিব্যি খেলে যাচ্ছে। আর তোমাদের মত কালো-আদমিদের জন্ত ছেড়ে দিয়েছে একটা কালো ফুটবল।

তার পিছনে লাগিয়ে দিয়েছে বাইশটা নেটিভকে—মরো গুঁতোগুঁতি করে, আপোসে মাথা ফাটাফাটি করে। আর দেখেছ, সাহেবদের যদি বা কেউ তোমাদের খেলায় আসে তবে সে মাঠের মধ্যখানে দাঁড়িয়ে বাজায় গেরা রায়ের বাঁশি—তার গায়ে আঁচড়টি লাগবার জো নেই।’

পাশা খেলোয়াড়রা একবাক্যে স্বীকার করলেন, এত বড় একটা দার্শনিক তত্ত্বের আবিষ্কার একমাত্র রায়বাহাছরেরই সম্ভবে, তত্পরি তিনি ব্রাহ্ম-সন্তানও তো বটেন।

সেই রায়বাহাছরের সপ্তম দর্শনের বেলুনটি ফুটো করে চুপসে দিয়ে দেশে নাম করে ফেললে বিদেশী ও-রেলি। চার্জ নেবার তিনদিন পরেই দেখা গেল, সে ইস্কুলের ছোঁড়াদের সঙ্গে ফুটবলে দমাদম কিক লাগাচ্ছে আর এদেশের ভিঞ্জে মাঠে খেলার অভ্যাস নেই বলে হাসিমুখে আছাড় খেল বার তিরিশেক।

রায়বাহাছুর বললেন, ‘বাটা বন্ধ-পাগল নয়,—মুক্ত-পাগল।’

পাশা খেলোয়াড়রা কান দিলেন না। পুলিশের বড় সাহেব ছোঁড়াদের নিয়ে খেই খেই করলে অভিভাবকদের আনন্দিত হওয়ারই কথা। কিন্তু এসব পরের কেছা।

ক্লাব জয় করেছিল ও-রেলি প্রথম দিনই টেনিস খেলায় জিতে নয়, হেরে গিয়ে। মাদামপুর চা-বাগিচার বড় সায়েব এ অঞ্চলের টেনিস চেম্পিয়ান। পয়লা সেট ও-রেলি জিতল; কারণ সে বিলেত থেকে সঙ্গে এনেছে টেনিস খেলার এক নূতন চঙ—মিডকোর্ট গেম আর বড় সায়েব খেলেন সেই বেজলাইনে দাঁড়িয়ে আত্মিকালের কুটুস-কাটুস। অথচ পরের দু সেটে ও-রেলি হেরে গেল—দাবার ভাষায় বলতে গেলে অবশি গজ্জচক্র কিংবা অশ্বচক্র খেল না বটে, আনাড়ি দর্শকেরা ভাবলে বড় সায়েব প্রথম সেটে স্নুতো ছাড়ছিলেন; জুউরীর বিলক্ষণ টের পেয়ে গেল, ও-রেলি প্রথম দিনেই ‘ওভার চালাক’, ‘বাউণ্ডার’ হিসেবে বদনাম কিনতে চায় নি। মেমেরা তো

অজ্ঞান—যদিও হারলে তবু কী খেলাটাই না দেখালে, ‘মাস্ট বি দি হীট, ইউ নো ফ্রেশ ফ্রম হোম’ ইত্যাদি। বড় সায়েবও খুশি। সবাইকে বলে বেড়ালেন, ‘ছোকরা আমার চেয়ে ঢের ভালো খেলে, তবে কি না, বুঝলে তো, আমার বুড়ো হাড়, হেঁ হেঁ, অফ কোর্স।’

পরদিনই দেখা গেল, ও-রেলি বুড়ো পাজী সায়েব রেভরেণ্ড চার্লস ফ্রেডারিক জোনসকে পর্যন্ত বগলদাবা করে নিয়ে চলেছে ‘আগা’ ঘরের দিকে। বুড়ো পাজী অতিশয় নীতিবাগীশ লোক, অবরে-সবরে ক্লাবে এলে নির্দোষ বিলিয়ার্ডকে পর্যন্ত ব্যসনে শামিল করে দিয়ে এক কোণে বসে সেই অজ্ঞ ওয়েলসের দেড় মাসের পুরনো খবরের কাগজ পড়তেন কিংবা বাচ্চাদের সঙ্গে কানামাছি খেলতেন। ও-রেলির পাল্লায় পড়ে ধর্মপ্রাণ পাজীর পর্যন্ত ‘চরিত্রদোষ’ ঘটল। দেখা গেল, পাজী এখন প্রায়ই ক্লাবে এসে ও-রেলির সঙ্গে এক প্রস্তু বিলিয়ার্ড খেলে সন্ধ্যার পর তার সঙ্গে বেড়াতে বেড়াতে শহরের বাইরে ও-রেলির বাঙলোর দিকে চলেছেন।

পাজী যে ও-রেলির সঙ্গে জমে গেলেন তার অশ্রু কারণও আছে।

ও-রেলির থানার কাছেই পাজীদের ইস্কুল। চাকরিতে ঢোকান দিন দশেক পরে ও-রেলি লক্ষ্য করল ইস্কুলে কতগুলো সায়েব-মেমের বাচ্চাও ঘোরাঘুরি করছে, কিন্তু দূর থেকে স্পষ্ট বোঝা যাচ্ছে না আসলে এরা ঠিক কী ?

ইনস্পেক্টর সোমকে ডেকে পাঠিয়ে বললে, ‘সোম ?’

‘ইয়েস স্যর !’

‘নো, আমাকে ‘স্যর’ ‘স্যর’ করো না।’

‘নো, স্যর।’

‘ফের ‘স্যর’ ?’

‘ইয়েস স্য—।’

বাচ্চাদের দিকে আঙুল দেখিয়ে সায়েব শুধাল, ‘এরা কারা ?’

সোম চুপ করে রইল।

ও-রেলি বলল, ‘দেখো সোম, তুমি আমার সহকর্মী । তুমি বা  
জান আমাকে খোলাখুলি না বললে আমি এখানে কাজ করব কী  
করে, আর তুমিই বা আমার সাহায্য পাবে কী করে ?’

‘আজ্ঞে, এরা ইয়োরেশিয়ন ।’

‘ভালো করে খুলে বলো ।’

‘এরা দোআঁশলা ; এদের অধিকাংশই চা-বাগান থেকে এসেছে ।  
এদের বাপ—’

‘ধামলে কেন ?’

‘—চা-বাগানের সায়েব আর মা—এই, এই, যাদের বলে কুলী  
রমণী ।’

ও-রেলি থ মেরে সব কিছু শুনল । তারপর অনেকক্ষণ ভেবে  
নিয়ে শুধাল, ‘তা এদের সম্বন্ধে আমাকে কেউ কিছু বলে নি কেন,  
এমন কি পাজী সায়েব পর্যন্ত না ?’

সোম বললে, ‘এদের নিয়ে খাস ইংরেজদের লজ্জার অস্ত নেই,  
তাই এরা তাদের ঘেন্না করে । পাজী সায়েব ভালো মানুষ, তাই  
নিম্নে গুঁর ছুঃখ হওয়ারই কথা । বোধহয়, আপনাকে ভালো করে  
না চিনে কোনো কিছু বলতে চান নি ।’

সেদিনই থানা থেকে ফেরার সময় ও-রেলি সোজা পাজীর  
টিলায় গেল । পাজীকে সে কী বলেছিল জানা নেই । তবে পাজী-  
টিলার ব্যাডমিন্টন ক্লাবের প্রথম খাস ইংরেজ সদস্য ও-রেলি—অবশ্য  
পাজী সায়েবদের বাদ দিয়ে—সে কথাটা ক্লাবের মিনিট বুক সর্গর্বে  
সানন্দে লিপিবদ্ধ করা হয়েছে ।

খবর শুনে এস ডি ও প্লামার ও-রেলিকে বললেন, ‘গো স্নো ।’

ও-রেলি তর্ক জোড়ে নি, তবে এ বিষয়ে তার মনের গতি কোন্  
দিকে সেটা জানিয়ে দিতে কন্ম্বর করে নি ।

রায়বাহাদুর খবরটা শুনে বললেন, ‘নাঃ, ছোঁড়াটাকে তো ভালো  
বলেই মনে হচ্ছে । তবে না আখেরে ডোবে । পাজী-টিলার কোনো

একটা ডপকা ছুঁড়িকে বিয়ে করলেই চিত্তির !’

আর ইস্কুলের ছোঁড়ারা তো ওর নাম দিয়ে ছড়া বানিয়েছিল,

‘ও—রেলি, কোথায় গেলি ?’

সাহেব মানে শুধিয়ে উত্তর শুনে ড্যাম্‌গ্রাড্‌ ।

তারপর হাত-পা ছুঁড়ে আবৃত্তি করলে,

‘O, Mary, go and call the cattle  
home,

Call the cattle home,

Across the sands of Dee,’

‘আমাকে ঐ ক্যাটলদের একটা মনে করেছ বুঝি ? তাই সই,  
আমি না হয় তোমাদের দেবতা ‘হোলি কাণ্ড’ই হলুম !’

### তিন

এক বৎসর হয়ে গিয়েছে । ও-রেলিকে মধুগঞ্জ যে ক্রিকেট ম্যাচের  
মত লুফে নিয়েছিল সেই থেকে সে শহরের ছেলে-বুড়োর বুকে গোঁজা  
—ভারতীয় ক্রিকেটের ঐতিহাসিকায়ী তাকে ডপ করা হয় নি ।

ইতিমধ্যে ভর বর্ষায় মধুগঞ্জের জগে সাড়থরে নৌকো-বাচ হয়ে  
গেল । বিলেত তার নৌকো-বাচ নিয়ে যতই বড়ফাট্টাই করুক না  
কেন পূব-বাঙলার নৌকো-বাচের তুলনায় সে লাফালাফি বাচ্চাদের  
কাগজের নৌকো ভাসানোর মত । ও-রেলি উল্লাসে বে-এক্‌স্‌য়ার ।  
নৌকো-বাচের আইন-কানুন সোমের কাছ থেকে তিন মিনিটে রপ্ত  
করে বন্দুক কাঁধে করে উঠল মোটর বোটে । সোমকে বললে, ‘তুমি  
এগিয়ে যাও আমার লঞ্চ নিয়ে ওদিকের শেষ সীমানায়, সেখানে যেন  
কোনো বদমাইশি না হয় । আমি এদিক সামলাব—এখানেই তো  
জেতার গোল ?’

সোম বললে, ‘সায়েব, নৌকো-বাচের ‘ফাউল’ আর তারপর বৈঠে

দিয়ে মাথা ফাটাফাটির ঠ্যালায় ফি বছর এ-দিনটায় ভাবি চাকরি  
রিজাইন দেব। আজ তুমি আমায় বাঁচালে।’

সায়েব বললে, ‘তুমি কুছ পেরোয়া কোরো না সোম ; ফাউল  
বাঁচাতে গিয়ে খুন-জখম আমিই করব। ইউ গো রাইট্ অ্যাহেড।’

তারপর ও-রেলি বন্দুক দেগে রেসের স্টার্ট দিলে, পিছনে পিছনে  
মোটর বোট হেঁকে ফাউল সামলালে, উল্লাসে চিৎকার করে ঘন ঘন  
‘গ্র্যাণ্ড গ্র্যাণ্ড, ও হাউ গ্র্যাণ্ড’ হুঙ্কার ছাড়লে, কমজোর নৌকোগুলোকে  
‘চীয়ার আপ্’ করলে আর সর্বশেষে প্রাইজের পাঁঠা, কলসী সকলের  
সঙ্গে হ্যাণ্ডশেক করে করে স্বহস্তে বিতরণ করলে। মাথা-ফাটাফাটি  
যে হল না তার জন্ত সোম আর বাইচ-ওলাদের অভিনন্দন জানালে।

সর্বশেষে সোম খুশীতে ডগমগ হয়ে বিজয়ী নৌকোর গলুইয়ে দাঁড়িয়ে  
ঘোষণা করলে, ‘আসছে বছর যে নৌকো জিতবে সে পাবে হুজুর  
ও-রেলির পিতার নামে দেওয়া ‘মাইকেল শীল্ড’। পূব-বাঙলায় নৌকো  
বাচে এই প্রথম শীল্ড—কম কথা নয়, আপনারা ভেবে দেখুন। আর  
সে শীল্ড লম্বায় তিন হাত হবে, হুজুরের কাছ থেকে সেটা আমি জেনে  
নিয়েছি। তার মানে পূর্ব বাঙলার যে-কোন ফুটবল শীল্ড তার তুলনায়  
‘ছোড্ড আড্ডা পোলাজ্’। হুজুর শীল্ড কী ধরনের হবে সেটা আমায়  
বলতে বারণ করেছিলেন ; আমি সে আদেশ অমান্য করেছি। কাল  
আমার চাকরি যাবে। তা যাক ! এখন আপনারা বলুন,

‘থ্রী চিয়ারস্ ফর ও-রেলি,

হিপ্ হিপ্ হুররে।’

সে কী হুঙ্কারে হিপ্, হিপ্ ! গাঁয়ের লোক এ ধরনের স্কুল  
রসিকতা বোঝে। তার উপর তাদের আনন্দ, ছু দিনের চ্যাংড়া ফুটবল  
খেলার পাতলা দাপাদাপিকে তারা আজ হারিয়েছে। তাদের শীল্ড  
আসছে বছর থেকে সব ফুটবল শীল্ডের কান মলে দেবে।

ক্লাবের যে ছু-একটি পাঁড় ইংরেজ কালী আদমিদের রেস দেখতে  
আসেন নি তাঁরা পর্যন্ত হুঙ্কার শুনে আঙুল দিয়ে কান বন্ধ কয়ে

বলেছিলেন, 'ও-রেলি ইজ্ গন্ কমপ্লীটলি নেটিভ !'

অসম্ভব নয় । কিন্তু সেদিন শীল্ড-ঘোষণার সঙ্গে সঙ্গে যদি ও-রেলি গা-ঢাকা না দিত তবে পঞ্চাশখানা গাঁয়ের লোক তাকে লিন্চ্ করত ।

পাত্রী-বাঙলোর নয়মি, রুথ, ইভা, মেরি সব ক-টা সোমথ মেয়ে-জাত-বেজাত ভুলে পাইকেরী দরে পড়ল ও-রেলির প্রেমে । সে হ্যাপা সামলাতে না পেরে ও-রেলিকে বাধ্য হয়ে প্রকাশকরতে হল, তার বিয়ে-দেশে ঠিক হয়ে আছে, ছুটি পেলেই বিয়ে করে বউ নিয়ে আসবে ।

ও-রেলি বুদ্ধিমান ছেলে । বিয়ের খবরটা সে ভেঙেছিল সোমের কাছে । সোম খবরটাকে বিয়ে-বাড়িতে ফাটাবার বোমার মতই হাতে নিয়ে খানিকক্ষণ আদর করার পর সেটি ফাটিয়ে দিলে হাটের মধ্যখানে, কিন্তু তার থেকে বেরল টিয়ার গ্যাস । সে গ্যাস পৌঁছে গেল পাত্রী-বাঙলোয় পোপের মৃত্যুসংবাদ ছড়াবার চেয়েও তেজে এবং চোখের জলের জোয়ার জাগাল নয়মি, রুথ, ইভার হৃদয় ছাপিয়ে ।

হায়, এরা তো জানে না ও-রেলিকে আশা করা এদের পক্ষে বামন হয়ে চাঁদ ধরার আশা করার মত । কিংবা তাতেই বা কি এবং এ উপমাটাও হয়ত তারা জানে যে সামান্য একটা খরগোশ যখন চাঁদের কোলে প্রতি সন্ধ্যার অশ্বিনী-ভরণীকে টিট দিয়ে বসতে পারে তখন এরাই বা এমন কি ফেলনা ? বিশেষ করে নয়মি । ভারতীয় সৌন্দর্যের মুন-নেমক আর ইংরেজের নিটোল স্বাস্থ্য নিয়ে গড়া এই তরুণী ; এর সঙ্গে ফ্লাট করার জন্ত পঁচিশটে বাগানের ইংরেজ ছোঁড়ারা ছোকছোক ঘুরঘুর করে তার চতুর্দিকে, যদিও সকলেরই জানা শেষ পর্যন্ত তারা বিয়ে করে নিয়ে আসবে বিলেত থেকে কতকগুলো খাটাশমুখো ওল্ড মেড ।

এ তত্ত্বটাও ও-রেলির জানা ছিলো বলে সে একদিন সোমকে ছুঃখ করে বলেছিল, 'দেখো সোম, আর যে যা-খুশি ভাবুক তুমি কিন্তু ভেবো না যে, আমি পাত্রী-টিলার মেয়েদের নিচু বলে ধরে নিয়েছি । আমার বিয়ে ঠিক না থাকলে আমি ওদেরই একজনকে বিয়ে করতুম ।

মেয়েগুলির বড় মিষ্টি স্বভাব ।’

সোম কানে আঙুল দিয়ে বললে, ‘ও কথা বোল না সায়েব ।  
জাত মানতে হয় ।’

ও-রেলি আশ্চর্য হয়ে বললে, ‘ক্রিস্টানের আবার জাত কি ?’

সোম বললে, ‘জাতের আবার ক্রিস্টান কি ?’

করে করে এক বছর কেটে গেল ।

ও-রেলি ছুটি নিয়ে বিলেত থেকে বউ আনতে গেল ।

## চার

খাশপেয়ারা লোক যখন বিয়ে করে তখন তার একদল বন্ধু বউকে ভালোমন্দ বিচার না করে কাঁধে তুলে ধেই ধেই করে নাচে আবার আরেক দল তার দিকে তাকায় বড্ড বেশি আড় নয়নে । এক্ষেত্রেও তার ব্যত্যয় হল না । সোমকোম্পানি দিনের পর দিন মেমসায়েবকে ফুল পাঠাল, মিষ্টি পাঠাল, মেয়ের জলে শখ ছেনে ছোঁড়ারা তাকে নিত্য নিত্য ডিঙি চড়াল, পাত্রীর টিলায় ঘন ঘন চড়ুই-ভাতে নেমস্তন্ন করল, ক্লাবে আর বাগিচা-বাগিচায় বেনকুয়েট ডিনার হল ; এ দলের খুশির অন্ত নেই ।

অগ্র দল বিস্তর যাচাই করার পর শুধু একটি কথা বললে, ‘মেয়েটি ভালো, কিন্তু কেমন যেন মিশুক নয় ।’

কিন্তু তাদের সর্দার রায়বাহাদুর চক্রবর্তীই তাদের কানা করে দিলেন আর-একটি মহামূল্যবান তত্ত্বকথা বলে—বললেন, ‘নেটিভদের সঙ্গে ধেই ধেই করা উভয় পক্ষের পক্ষেই অমঙ্গল । ওরা রাজার জাত, রাজত্ব করবে ; আমরা প্রজার জাত, হুজুরদের মেনে চলব । এর ভিতর আবার দোস্তি-ইয়ার্কি কী রে বাবা ? তোমরা ভেবেছ লিবার্টি পেলে তোমাদের নূতন কর্তারা তোমাদের কোলে বসিয়ে মণ্ডামেঠাই খাওয়াবেন ? দেখে নিয়ো, আজ আমি যা বললুম ।’

তখনো স্বরাজের ছবি দিগদিগন্তেরও বহু পিছনে আগার ভিতরে বাচ্চার মত নিশ্চিন্দ মনে ঘুমুচ্ছেন। কাজেই রায় বাহাদুরের সঙ্গে এ বাবদে তর্ক করায় উপায় ছিল না ; এবং এ ধরনের মুকুবিও তখন সর্বত্রই বিস্তর মজলিস গুলজার করে এই রায়ই বাড়তেন। রায়বাহাদুর আবার বললেন, 'নেটিভ সায়েব যেন তেলে জলে। সাবধান !' কিন্তু মধুগঞ্জ এ সাবধানবাণীতে কোন প্রয়োজনই অনুভব করল না।

রায়বাহাদুর অবশ্য মেমসায়েবকে সেলাম দিতে প্রথম দিনই কুঠিতে গিয়েছিলেন। মেমসায়েব তাঁর গালকস্থল মান-মনোহর দাড়ি দেখে একেবারে স্ট্রাক্, থ। রায়বাহাদুর ভালো করেই জানতেন আজকের দিনের দাড়ি-গোঁফ-কামানো ছোঁড়ারা তাঁর দাড়িতে উকুন অথবা ছারপোকা আছে কি না তাই নিয়ে ফিসফাস গুজগাজ করে, কিন্তু অন্তরে তাঁর দৃঢ়তার বিশ্বাস ছিল যে, তাঁর দাড়ি-গোঁফের কদর প্রকৃত রসিক-রসিকাদের কাছে কিছুমাত্র নগণ্য নয়।

আদালতে বিস্তর সায়েবকে তিনি বহুবার বেকাবু করেছেন তার দুটি কারণ :

প্রথম, তাঁর আইনজ্ঞান এবং দ্বিতীয় তাঁর মনস্তত্ত্ববোধ। সায়েবের সাদা মুখ লাল, নীল, বেগুনি রঙের ভোল বদলানোর সঙ্গে সঙ্গেই তিনি চটপট সমঝে যেতেন সায়েব চটেছেন, খুশি হয়েছেন, হকচকিয়ে গিয়েছেন কিংবা আইনের অর্থই দরিয়ায় হাবুডাবু খাচ্ছেন।

প্রথম দর্শনেই তিনি বুঝে গেলেন, মেমসায়েব তাঁকে নেকনজরে দেখেছেন। তারই পুরা ফায়দা উঠিয়ে তিনি তাঁকে মেলা অভিনন্দন আর অভ্যর্থনা জানালেন, তিনি যে তাঁর সেবার জন্ত সব সময়ই তৈরী সে কথা বললেন, তাঁর স্বামী যে অতিশয় সজ্জন ব্যক্তি সে কথাও উল্লেখ করলেন এবং বলতে বলতে উৎসাহের তোড়ে উঠে দাঁড়িয়ে বললেন, 'আদালত যে এদেশে শুভাগমন করেছেন—' বলেই তাঁর

মনে পড়ল, এ আদালত নয়। রূপ করে বসে পড়ে বললেন, 'সরি, ম্যাডাম, আই ফরগট !'

মেম তো হেসেই লাল। রায়বাহাদুর ঘেমে কালো। শেষটায় মেম বললেন, 'ইটস ও' রাইট, রে ব্যাড়ুর; থ্যাঙ্ক্যু ভেরী মাচ্ ইনডীড !'

রায়বাহাদুরের এ ভুল জীবনে এই প্রথম নয়। বৃড়ো বয়সে সিনিয়ার ম্যাজিস্ট্রেটের প্রথম পুত্রসন্তান হওয়াতে তিনি তাঁকে অভিনন্দন জানিয়ে টিফিনের পূর্বে 'বারের' পক্ষ থেকে বলেছিলেন, 'আদালতের পুত্রসন্তান হওয়াতে আমরা সকলে বড়ই আনন্দিত হয়েছি।'

এ ভুলটাও তিনি গোপন রাখেন নি। সেদিক দিয়ে তিনি সত্যই সরল প্রকৃতির লোক। মেমসায়েরের সঙ্গে তাঁর ভেট তিনি সবিস্তর বাখানিয়া বললেন, চাপরাসী ইস্তাফ্র আলীকে যে তিনি ছু আনা বখশিশ দিয়েছেন সেটাও বলতে ভুললেন না।

সর্বশেষে খানিকক্ষণ কিস্ত কিস্ত করে বললেন, 'সায়েরের সঙ্গে তো আমার বিশেষ পরিচয় নেই, তবু কেমন যেন মনে হল একটু বদলে গিয়েছে। ঠিক বুঝতে পারলুম না।'

আড্ডা বললেন, 'আপনিও তাজ্জব বাত বললেন, রায়বাহাদুর। বিয়ে করে কোন মানুষ বদলায় না, বলুন দিকিনি? অন্তত কিছু দিনের জন্ত?'

সোম উপস্থিত ছিল। কেউ কেউ লক্ষ্য করল সেও কোনো আপত্তি জানাল না।

রায়বাহাদুর বললেন, 'কী জানি ভাই, আমার অতশত স্মরণ নেই। বিয়ে করেছিলুম কবে, সেই ঠাকুদার আমলে।'

জুনিয়ার তালেবুর রহমান বললে, 'সে কি, স্মরণ। বিয়ের পূর্বের কেসগুলোও তো আপনার খুঁটিনাটিশুদ্ধ মনে আছে।'

উকিল মেথাররা সায় দিলেন।

রায়বাহাদুর গুণী লোক। মুনি ঋষিরা যেরকম এককালে একসূত্রে দৃষ্টি দিয়ে হাঁড়ির খবর জানতে পারতেন তিনিও হয়তো খানিকটা আসল খবর ধরতে পেরেছিলেন ; তবে কি না ঋষিদের তিন হাজার বছরের পুরনো লেন্স অনাদর-অবহেলায় ক্ষয়ে ঘষে গিয়েছে বলে ছবিটা আবছা-আবছা হয়ে স্কটল।

ও-রেলি তাগড়া জোয়ান, তার উপর পাঠি-পরবে ভোর অবধি বেদম নাচতে পারে—একটা ডান্সও মিস্ না করে। তাই বিয়ের পর আড্ডা-ঘরের 'গ্যালা'-নাচে সবাই আশা করেছিল ও-রেলি হয় বউকে কোমরে ধরে লাফ দিয়ে টেবিলের উপর তুলে নিয়ে নাচতে শুরু করবে কিংবা হলের মধ্যখানে বউকে ছুই ঠেঙে তুলে ধরে পাঁই পাঁই করে তার চতুর্দিকে সার্কেসি ঢঙে চক্কর খাওয়াবে। অন্ততপক্ষে টাঙ্কো নাচের সময় সে যে বউকে নিবিড় আলিঙ্গনে ধরে নিয়ে গভীর দোতুল-দোলা জাগাবে সে আশা—এবং বৃড়ী মেমেরা সে আশঙ্কা নিশ্চয়ই মনে মনে করেছিলেন ; কারণ, বউকে, তাও আবার আনকোরা বউকে নিয়ে নাচের সময় যে ঢলাঢলি করা যায় সেটা ইংরেজ সমাজে পরকীয়াতে চলে না। ফ্রান্সে চলে, তবে মাচের মজলিসে নয়।

ও-রেলি নেচেছিল এবং তার নাচে প্রাণও ছিল, কিন্তু আয়রল্যাণ্ডে নব বর এ রকম নাচের সময় যে কুরুক্ষেত্র জাগিয়ে তোলে এখানে সেটা হল না। কেউকেউ কিঞ্চিৎ নিরাশ হল বটে তবে ঝামুরা জানেন নববর (অর্থাৎ নওশাহ্—নূতন রাজা) পয়লা রাতে কী রকম আচরণ করবে তার ভবিষ্যদ্বাণী কেউ কখনো করতে পারে না। মদ খেলে বাচাল হয়ে যায় চুপ আর বোবা হয় মুখর—আর বিয়ে করা তো সব নেশার চেয়ে মোক্ষম নেশা, খোঁয়ারি ভাঙাতে গিয়েই বাদ-বাকি জীবনটা কেটে যায়। কিন্তু তাই বলে যে সব সময় ঠিক উলটোটাই ফলবে তারও তো কোনো স্থিরতা নেই। আবহাওয়ার জ্যোতিষীরা বললেন, বৃষ্টি হবে অতএব আপনি ছাতা না নিয়ে বেরলেন ; ফলং ? —ভিজ্ঞে কাঁই হয়ে বাড়ি ফিরলেন। ব্যত্যয়ও তো হয়।

কাজেই পালোয়ান এবং নাচিয়ে ও-রেলি আড্ডা-ঘরকে তার হকের পাকী সের থেকে এক ছটাক বঞ্চিত করাতে অল্প লোকই তাই নিয়ে মাথা চুলকোল ।

গ্যালা নাচের পর পাজী-বাঙলো দিলে পিকনিক । বাইরের বেশী লোককে নেমস্তম্ব করা হয় নি কিন্তু সোমের ডাক পড়েছিল কারণ পাজীর এ বাবদে বাঙালী, সায়েব কারোরই মত এত মারাত্মক নাকতোলা নয় । পাজী-টিলার পিছনে যে ছোট ছোট টিলা আর বন-বাদাড়ের আরম্ভ তার শেষ হয় কুড়ি মাইল দূরে রেলস্টেশন পৌঁছে । এ বনে বুনো আম, কাঁঠাল বঁইচি, কালো জাম, মিষ্টি মধুর সন্ধানে সকাল-সন্ধ্য কাটিয়ে দেওয়া যায় । মৌসুমের সময় মাটিতে ফোটে অগুণতি লুটুকি ফুল আর গাছের গা-বুলে ফুল ওঠে রঙ-বেরঙের অর্কিড (‘বঁাদরের সাজ’) । এ জায়গাটায় পিকনিক করতে গেলে তাস-পাশা নিয়ে যেতে হয় না, গাছতলায় বসে ছুটি খেয়ে শুধু আকাশের দিকে তাকিয়ে থাকতে হয় না,—এখানে একা একা কিংবা ছোট ছোট দল পাকিয়ে অনেক কিছুর অনুসন্ধানে বেরনো যায় আর লুকোচুরি খেলার অলিম্পিক যদি কোনোদিন তার সদর অপিস খুলতে চায় তবে গড়িমসি না করে এখানেই সোজা চলে আসবে ।

পাজী-টিলাতে আপোসে বিয়ে হলেই এখানে তার পরের দিন পিকনিক । পিকনিকওয়ালারা আবার বর-বধূকে নানা ছুঁতোয় একা একা এদিক-ওদিক গুম হয়ে যেতে দেয় এবং নিজেদের মধ্যে তাই নিয়ে চোখ ঠারাঠারি করে ।

বর-বধূ বিয়ের পর প্রথম কয়েক দিন একে অঙ্কে চিনে নেয় ঘরের ভিতরে, বাইরে, বারান্দায়, নদীর পারে চাঁদের আলোতে কিংবা সমাজে আর পাঁচজনের ভিতর । এখানে নিভূতে বনের ভিতর একে অঙ্কে চিনে নেওয়ার ভিতর আরেক অভিনব মাধুর্য আছে—ওদিকে বন্ধু-বান্ধব থেকে সম্পূর্ণ বিচ্ছিন্নও তারা নয় । ডাক দিলেই সাড়া

মিলবে—ওরা তো এসেছে নব বরের নূতন শাহের খেদমত করার  
জগ্ৰাই ।

খোয়াই-ডাক্তার দিগ্দিগন্ত-মুগ্ধ কবি, পদ্মার অবিচ্ছিন্ন অবিরল  
শ্রোতের সঙ্গে যে কবি তাঁর জীবন-ধারার মিল দেখতে পেয়ে বিশ্ব-  
ত্রস্তাণ্ডে, গ্রহসূর্যে, তারায় বিশ্ব-শ্রোত বিশ্ব-গতি হৃদয় দিয়ে আবিষ্কার  
করলেন, সে কবি পর্যন্ত আপন বঁধুয়ার যে ছবিটিকে বৃকের ভিতর  
এঁকে নিতে চেয়েছিলেন সেটি পত্রপল্লবের অর্ধ-আচ্ছাদনে, বনানীর  
মাঝখানে ;—

‘পাতার আড়াল হতে বিকালের  
আলোটুকু এসে  
আরো কিছুক্ষণ ধরে বলুক তোমার  
কালো কেশে ॥

হাসিয়ো মধু উচ্চহাসে  
অকারণ নির্মগ উল্লাসে—  
বনসরসীর তীরে ভীরু কাঠ-  
বিড়ালিরে

সহসা চকিত কোরো ত্রাসে ।’

ও-রেলি বসে রইল বুড়ো পাজী সায়েবের সঙ্গে বটগাছতলায়  
—পিকনিকের হেড অফিসে । অবশ্য বউ মেবল্ও তার গা  
ঘেঁষে ।

বুড়ো পাজী গল্প বলে যেতে লাগলেন,—চল্লিশ বছরের  
আগেকার কথা । এ-সব গল্প মধুগঞ্জ, বহুবার শুনেছে, কিন্তু,  
ও-রেলির কাছে নূতন ।

‘বুঝলে ডেভিড, তখন আমি ছোকরা পাজী হয়ে এদেশে এসেছি ।  
সোম এ-সব জানে, তার বাপ তখন এখানে সাবরেজিস্ট্রার । আমাকে  
অনেক করে বোঝালে টিলাতে বাঙলো না বানিয়ে যেন নদীপাড়ে  
আসন পাতি । তখনকার দিনে ছুপুরবেলায় এখানে বাঘ চরাচরি

করত, আমার একটা বাছুর চিতে নিয়ে গেল আমার চোখের সামনে, ব্রেকফাস্টের সময় ।’

ও-রেলি শুধালে, ‘টিলার মোহটা কী? আপনি তো হরিণ কিংবা পাখী শিকারও করেন না ।’

পাদ্রী বললেন, ‘বাঘ আর ম্যালেরিয়ার ভিতর আমি বাঘই পছন্দ করি বেশী । টিলার উপর ম্যালেরিয়া হয় কম । বন্দুক দিয়ে বাঘ শিকার করা যায়, কিন্তু মশা মারা কঠিন । কী বলো, সোম, তুমি তো রববার হলেই বন্দুক নিয়ে মত্ত । কতবার বলেছি, সোম, রববার স্রাবাথ—শান্তির দিন । এ-দিনটায় রক্তারক্তি নাই করলে ।’ সোম বললে, ‘স্মার, তেত্রিশ কোটি দেবতা ছেড়ে একজন দেবতা পেয়ে আমার লাভ না ক্ষতি ?’

তারপর ও-রেলির দিকে তাকিয়ে শুধাল, ‘আপনি-ই বলুন চীফ, তেত্রিশ কোটি টাকার মাইনে ছেড়ে দিয়ে এক টাকার চাকরি নেয় কোন লোক ?’

পাদ্রী বললেন, ‘ওর যে সব কটা মেকি ।’

সোম বললেন, ‘আমি পুলিসের লোক, স্মার, মেকি টাকা চিনতে না পারলে আমার সায়েবই কাল আমাকে ডিসমিস করবেন । মেকি খাঁটিতে তফাত আমি বেশ জানি । কিন্তু এদিককার তেত্রিশ কোটি আর ও-দিককার একজন কেউ তো কখনো আমার থানায় এসে এজ্জহার দেন নি । বাজিয়ে দেখব কি করে ? মাঝে মাঝে সন্দ হয়, সব কল্পনাই মেকি ।’

পাদ্রী বললেন, ‘মাই বয় ! কী বলছ ?’

পাদ্রীর বুড়ী বউ স্বামীকে বললেন, ‘তোমাকে কতবার বলেছি, সোমের সঙ্গে কক্খনো ধর্ম নিয়ে আলোচনা করো না । ও যে শুধু হিন্দু তাই নয়—হিন্দুদের ভিতর অনেক সং লোক আছেন—ও একটা আস্ত ভণ্ড ।’

তারপর ও-রেলিকে শুধালেন, ‘সোম আমাদের টিলায় এত

ঘন ঘন আসে কেন ?’

ও-রেলি হেসে পালটে শুধালেন, ‘কেন, আপনাদের ঝগড়া মেরটাতে ?’

বুড়ি রেগে বললেন, ‘বিয়ে করেছ:তো মাত্র সেদিন। ঝগড়ার তুমি কী জান হে, ছোকরা ? সে কথা থাক, সোম আসে শুধুমাত্র মুর্গী খেতে, বাড়িতে পায় না বলে।’

সোম বললে, ‘মান্নি, আপনি যে ধরতে পেরেছেন, সে কথাটা এতদিন বলেন নি কেন ?’

বুড়ো থ হয়ে বললেন, ‘সে কী রে। তোকে একশবার বলেছি, তোর বাপকে পর্যন্ত লুকিয়ে রাখি নি।’

সোম বললে, ‘কই, আমার তো মনে পড়ছে না? তা কাল থানাতে গিয়ে দেখব, কোনো পুরোনো নথিতে রিপোর্ট লেখা আছে কি না।’

বুড়ো পাজী ও-রেলি আর মেব্বলের চোখের উপর কয়েকবার স্নেহের চোখ বুলিয়ে বললেন, ‘এই যে ডেভিড বললেন, সোম আসে আমাদের ঝগড়া মেরটাতে, তা সে কিছু ভুল বলে নি। আজ যে রকম ডেভিড মেব্বলকে নিয়ে এসেছে ঠিক তেমনি আমিও একদিন নিয়ে এসেছিলুম গ্রেসিকে। পনেরো বছর কেটে যাওয়ার পর একদিন আমাদের ভিতর সামান্য ‘কথা কাটাকাটি হওয়াতে হঠাৎ গ্রেসি বললে, ‘তবে কি আমাদের ‘হনিমুন আজ শেষ হল !’ সেই সেদিনই আমি সামলে নিলুম। তারপর দেখো, কেটে গেছে আমাদের ‘হনিমুনের’ আরো পঁইত্রিশ বছর।’ 50 years !

সোম বললে, ‘সে কথা মধুগঞ্জের কে না জানে বলুন। কিন্তু আমার বেলায় উর্টে। যাবজ্জীবন দ্বীপাস্তুর মানে চৌদ্দ বছরের জেল। আমার বেলা তারও বেশী। বিয়ে করেছি চৌদ্দ বছর বয়সে, তারপর কেটে গেছে প্রায় আঠারো বৎসর। এখনো কেউ খালাস করবার কথাটি তোলে না।’

পাত্রী সোমের পাগলামিতে কান ঝা দিয়ে বললেন, ‘ঠিক এই গাছতলাতেই বসেছিলুম গ্রেসিকে নিয়ে। বাঘ-ভালুকের ভয় না করে। পাশের ঝোপে কোকিল কুছ কুছ করছিল। আমাদের মনে কী আনন্দ, এমন সময় একটা হুম্মান ‘হুম’ ‘হুম’ করে আমাদের সামনে দাঁত-মুখ খিঁচোতে লাগল। গ্রেসি কখনো বাঁদর দেখেনি, প্রায় ভিরমি খেয়ে আমার কোলে মুখ গুঁজল।’

বুড়ী মেম লজ্জায় রাঙা হয়ে বললেন, ‘ব্যস, ব্যস হয়েছে।’ এর পরও ডেভিড মেব্‌ল্‌ উঠল না।

## পাঁচ

দেখা যেত ছুজনকে, রাস্তা থেকে, তাদের বাঙলোর বারান্দায় ছাতা-ল্যাম্পের নিচে আরাম-চেয়ারে বসে আছে। কখনো সাহেব মেম-সায়ের হাত-পাখাখানা এগিয়ে দিচ্ছে, কখনো মেম-সায়ের ঘরের ভিতর গিয়ে দু হাতে দুটো লাইমজুস নিয়ে আসছে। আর কখনো বা সিংহলী বাটলার জয়সূর্য বারান্দার একপ্রান্তে গ্র্যামোফোনে রেকর্ডের পর রেকর্ড বিলিতি বাজনা বাজিয়ে যাচ্ছে। কিন্তু অধিকাংশ সময়ই নির্জন বারান্দায় কিংবা টিলার বাগানের লিচুগাছতলায় দুজন পাশাপাশি বসে সামনের কালাই পাহাড়ের দিকে তাকিয়ে।

জ্যেৎস্না রাতে দুজনা ডিনারের পর বারান্দা থেকে নেমে লিচু-বাগানের ভিতর দিয়ে নেমে আসত সদর রাস্তায়। সেখান থেকে চলে যেত নদীপারে। নদী-পার দিয়ে হেঁটে হেঁটে পৌঁছোত গিয়ে রামত্ৰী গ্রামে, সেখানে ছোট্ট কিসাই নদী বড় নদী কাজলধারার সঙ্গে মিশেছে।

কিংবা তাদের মাথায় চাপত অদ্ভুত খেয়াল। কিসাই-কাজলের মোহনায় খেয়াঘাট; তারা সেই রাত দশটায় হাট-ফের্তাদের সঙ্গে বসত খেয়া-নৌকায়—বাতার উপর। তারপর ছপুর রাত অবধি খেয়া-

নৌকোয় বসে এপার-ওপার করে বাড়ির পথ ধরত চাঁদ যখন ডুবুডুবু।

মেম আসার পর সায়েব টুরে গেছে মাত্র একবার। মেমকে সঙ্গে নিয়েই গেল। ভাওয়ালি নৌকোয় করে ছুদিনের রাস্তা। রোজ সন্ধ্যায় সায়েব-মেম ভাওয়ালির ছাদের উপর বসে বসে মাঝি-মাল্লার ভাটিয়ালি গান শোনে, আর কখনো বা জয়সূর্য ভগলা-মাঝির গান গ্রামোফোনে বাজায়। মাঝি-মাল্লারা সে গীত শুনে তাজ্জব মানে, আর মাঝে মাঝে তার নকল করতে গিয়ে মেম-সায়েবের কাছে ধমক খায়। মেম বলে ভাটিয়ালিই ভালো—মাঝিরা ফ্যালফ্যাল করে তাকিয়ে থাকে;—তাদের গান সাহেবদের কলে বাজানো গাওনার চেয়ে ভালো, এও কি কখনো সম্ভবে। তবে কি না সায়েব-সুবোদের খেয়াল, আল্লায় মালুম, ওদের দিল, ওদের দরদ কখন কোন্ দিকে ধাওয়া করে। একদিন তো মেম-সায়েব নায়েব মশলা-পেচা ছোকরাটার বাঁশের বাঁশি চেয়ে নিয়ে সাবান দিয়ে ধুয়ে-পুছে ভাটিয়ালির সুর অনেকক্ষণ ধরে বাজালে।

এবারে নৌকোর বারোয়ারী ডাবাছকোতে এনরা গুড়ুক খেলেই হয়েছে আর কি।

মাঝি-মাল্লারা কিন্তু একটা বিষয়ে নিজেদের ভিতর বিস্তর আলোচনা করল। সায়েব-মেম এক অশ্লের সঙ্গে অত কম কথা কয় কেন? ভাগ্যিস ওরা জানত না যে, বিয়ের আগে ও-রেলি সাহেবের বাচাল বলে একটুখানি বদনাম ছিল বটে।

ভাওয়ালির হালদার বুড়ো মাঝি তালেবুদ্দি বললে, 'খুদাতালা কত কেলামতিই দেখালে; গোরা হল রাজার জাত—আমাদের ডাঙর জমিদারের গালে ঠাস ঠাস করে চড় মারলে উনি সেটা আল্লার মেহেরবানি সমঝে দিল-খুশ হয়ে হাবেলী চলে যান। আর সেই গোরা দেখো, মেমের রুমালখানা হাত থেকে পড়ে গেলে তখ্খুনি সেটা কুড়িয়ে নিয়ে মেমকে এগিয়ে দেয়। আমি তো এ মামলা বিলকুল বুঝতে পারলাম না।'

শুকুরুল্লা বললে, ‘কইছো ঠিকই কিন্তু আমাগো সায়েব তো কখনো কাউরে চড় মারে নি। বন্ধে, আমার মনে লয়, সায়েবরা হামেশাই কথা কয় কম, কাম করে বিস্তর। দেখছো না, যারা হাশ্বাই-তাহ্বাই করে বেশী, তারাই কাম করে কম।’

মশলা-পেযা বললে, ‘বউয়ের লগে যদি ছুই-চারটা মিডা মিডা কথা না কইলা তয় বিয়া করলা ক্যান্।’

একই বিষয় নিয়ে আমাদের দেশে মাঝি-মাল্লা চাষা-ভূষো অনেকক্ষণ ধরে তর্ক-বিতর্ক করতে পারে না—অবশ্য পূব বাঙলার পটভূমি নিয়ে লেখা নভেলে তারা ‘গোরা’ এবং ‘বিনয়ের’ মত ঘণ্টার পর ঘণ্টা নব্যশ্রায়েয়র তৈলাধার জ্বালিয়ে রাখতে পারে। তারা আপন আপন রায় জাহির করেই চুপ করে যায়। তর্ক করে যুক্তি দেখিয়ে একে অগ্নের অভিমত বদলাবার চেষ্টা করে না। তাই বোধ করি ভঙ্গসমাজে নিছক অবাস্তব তর্কাতর্কির ফলে যে রকম মনকবাকষি এবং মুখদেখা-দেখি বন্ধ হয়, চাষা-ভূষোদের ভিতর সে রকম হয় না।

তাই আলোচনার মোড় বদলে গিয়ে সভাস্থলে প্রশ্ন উত্থাপিত হল, ‘সায়েব-মেমরা সাঁতার কাটতে ভালোবাসে, কিন্তু নদীর জল ঘোলা হলে গোসল করে না কেন?’

পূব-বাঙলার লোক জানে না, সায়েবদের কাছে সাঁতারকাটা হচ্ছে স্পোর্টস-বিশেষ—স্নানের খাতিরে তারা সাঁতার কাটতে নাবে না। আমাদের কাছে স্নান যা, সাঁতার কাটাও তা।

টুর থেকে ফিরে এসে ও-রেলি পনেরো দিনের ছুটি নিয়ে একা কলকাতায় চলে গেল। সোম কিন্তু সবাইকে বললে, ‘হুজুর সরকারি কাজে কলকাতা গেছেন; জানেন তো, আজকাল যা স্বদেশী-ফদেশী আরম্ভ হয়েছে।’

রায়বাহাছুর বললেন, ছুদিকেই বিপদ দেখতে পাচ্ছি। সায়েব যদি ‘স্বদেশীর’ পিছনে লাগে, তবে তাদের দফা-রফা। নেটিভদের সঙ্গে দোস্তি জমিয়ে ও তাদের সব হাড়হুদ শিখে নিয়েছে, কড়ি চালালে

আর কারো রক্ষে নেই। ওদিকে ছোকরা আবার আইরিশম্যান ;  
 ওর আপন দেশে ইংরেজের বিরুদ্ধে চলেছে জোর 'স্বদেশী'। ও যদি  
 হাত গুটিয়ে বসে থাকে, তবে তার প্রমোশনেরও তেরোটা বেঞ্চে  
 যাবে। চাই কি কমপলসরি রেটারারমেন্টও হতে পারে। থাক, ও-  
 সব কথা কইতে নেই।'

জুনিয়ার তালেবুর রহমান বললে, 'নৌকো দিয়েছেন ভাসিয়ে  
 মাঝগাঙে—আর তারপর করেছেন নোঙরের খোঁজ। সোমের সামনে  
 খুলে দিয়ে দিয়েছেন স্কুটিকির হাঁড়ি আর এখন বলছেন, নাক বন্ধ  
 করো।'

রায়বাহাছুর বললেন, 'বাবা, সুধাংশু—'

সোম জিভ কেটে ছুকানে হাত দিয়ে বললে, 'রাম, রাম।'

এবারে ও-রেলি যখন কলকাতা থেকে ফিরল, তখন সকলেরই  
 চোখে পড়ল তার মুখের উপর গাঙ্গুরীর ছাপ।

সায়েরা কলকাতা থেকে ফিরলে, তা সে রাত বারোটাই হোক,  
 তখ খুনি যায় ক্লাবে, সবাইকে কলকাতার তাজা খবর বিলিয়ে দেবার  
 জন্তু—স্বপ্নবাড়ি থেকে বাপের বাড়ি এলে মেয়ে যে রকম ধুলো-পায়-  
 সইয়ের বাড়িতে ছুট লাগায়। ক্লাবের সবচেয়ে নীরস বেরসিকও  
 তখন কয়েকদিন ধরে আরব্য উপন্যাসের শেহেরজাদীর কদর পায়।

ও-রেলি ক্লাবে গেল ফিরে আসার তিনদিন পরে।

বুড়ো পাত্রীর চোখের জ্যোতি কম। তার উপর এতখানি  
 সাংসারিক বুদ্ধি নেই যে, কারো চেহারা খারাপ দেখলে তদগুণেই সে  
 সম্বন্ধে প্রশ্ন শুধাতে নেই। ও-রেলিকে দেখামাত্রই শুধালেন, 'সে কি  
 হে ডেভিড, তোমার চেহারা ও-রকম শুকিয়ে গেছে কেন?'

মাদামপুরের বুড়া-সাহেব ঝাম্বু লোক। ও-রেলি আমতা আমতা  
 করছে দেখে বললেন, 'অসুখ-বিসুখ করেছিল হয়তো। কলকাতা  
 বড় নাসুটি প্লেস—ডিসেস্টি আর ডিসেস্টি। কেন যে মানুষ কলকাতা  
 যায় বুঝতে পারিনে। আমি যখন প্রথম মাদামপুর আসি—'

বলল, : -

বিষ্ণুছড়া বাগিচার মেম বললেন, 'তা মিস্টার ও-রেলি, কলকাতার নূতন খবর কী ?'

মাদামপুরের বড় সায়েব তখন আশা ছাড়েন নি ; বললেন, 'কলকাতায় যেতে আঠারো দিন লাগত, আর—'

বিষ্ণুছড়া বাগিচার বড় মেমে আর মীরপুর বাগিচার ছোট মেমে যেন সাপে-নেউলে । একে অশ্বেয় দেখা হলেই টুকাটুকি ঠোকাঠুকি । বললেন, 'মিস্টার ও-রেলি, কলকাতার সব খবরই নূতন । ফার্পোতে নেটিভরা ঢুকতে পারছে, সে-ও নূতন খবর । ময়দানে ঘাস গজাচ্ছে, সে-ও নূতন খবর ।'

বিষ্ণুছড়ার মেম ছোবল মারতেন, কিন্তু তাঁর সায়েব শাস্তভাবে মেমের হাতের উপর হাত রেখে তাঁকে চেপে দিয়ে বললেন, 'তাজা-বাসি আমরাই যাচাই করে নেব ও-রেলি । ও-সব ভাবনা তোমায় ভাবতে হবে না ।'

আগে হলে ও-রেলি এতক্ষণ সুবোধ ছেলের মত টু বী সীন নট টু বী হার্ড হয়ে বসে থাকতো না । ততক্ষণ হয়তো সপ্রমাণ করে দিত গড়ের মাঠে সত্যই কতই রকম নূতন ঘাস গজাচ্ছে, তার রঙ গোলাপি, ফুল সবুজ আর সে ঘাস নেটিভ মাঠে পা ফেললেই গোখরোর মত ছোবল মারে—ডেঞ্জারেস পয়জন্—কিংবা হয়তো গম্ভীরস্বরে বয়ান করত, নেটিভরা এখনো ফার্পোতে ঢুকতে পায় নি ; তবে কি না এ খবরে কিছুটা সত্য, এখন ফার্পোর টেবিল-চেয়ার সরিয়ে সেখানে কার্পেটের উপর গোবর নিকনো লেপানো হয়েছে, আর তারই উপর সায়েবরা খালা পেতে হাপুর-ছপুর শব্দ করে খিচুড়ির সঙ্গে মালোগা-টানি সুপ মাখিয়ে খাচ্ছেন ।

অবশ্য ও-রেলি একেবারে চুপ করে বসে রইল না । কিন্তু খবর বিলোতে গিয়ে দেখল এবারে কলকাতায় সে তেমন কিছুই দেখে নি । গ্র্যাণ্ডে বসে লাঞ্চ খেয়েছে অথচ চারদিকে কী হচ্ছে না হচ্ছে কিছুমাত্র লক্ষ্য করে নি, ক্যালকাটা ক্লাবের বারে বসে অনেকক্ষণ ধরে এটা-ওটা

চুকচুক করছে ; কিন্তু এখন আর স্মরণ করতে পারল না, পরিচিত কার কার সঙ্গে সেখানে দেখা হয়েছে ।

বিষ্ণুছড়া বললেন, ‘ও-রেলি গোপন সরকারী কাজে গিয়েছিলেন কলকাতায়, আর তার ফাঁকে করেছেন পার্টি-পরব । ছুটোয় জট পাকিয়ে গিয়েছে বলে কী বলবেন, কী বলবেন না, ঠিক করতে পারছেন না ।’

ও-রেলি বুঝলে, এটা সোমের কীর্তি ।

প্রকাশে বললে, ‘ঠিক তা নয়, তবে এখন কলকাতার মৌসুমটা মন্দা মাচ্ছে । বেশীর ভাগই দার্জিলিঙ কিংবা শিলঙে । আমার পরিচিত অল্প লোকের সঙ্গেই সেখানে দেখা হল ।’

মীরপুর বললেন, ‘সে কি মিস্টার ও-রেলি ? আপনি তো এক সেকেণ্ডে আলাপ জমিয়ে ফেলতে পারেন বন্ধ কালা-বোবার সঙ্গে, আর আপনি করছেন পরিচয় অভাবের শোক !’

মনের ভিতর চমক খেয়ে ও-রেলি দেখলে, কথাটা একেবারে খাঁটি । এই তার জীবনে প্রথম যে সে কলকাতায় কোনো নূতন পরিচয় জানতে পারে নি । তবে কি সে জানতে চায় নি ? কেন কী হয়েছে তার ?

কিছু একটা বলতে হয়—যে লোক গল্পবাজ, সে কোনো কারণে চুপ মেরে গেলে সমাজে তার বড় ছুরবস্থা—তাই আমতা আমতা করে বললে, ‘না, না সেদিক দিয়ে আটকায় নি ।’ বলতে বলতে মনে পড়ে গেল, ক্রিকেটার হেণ্ডারসনের সঙ্গে ছয়াইটওয়ার দোকানে তার দেখা হয়েছিল । ও-রেলি বেঁচে গেল । শুধালে—

‘ক্রিকেটার হেণ্ডারসনকে চেনেন ?’

বিষ্ণুছড়ার মেম বললেন, ‘আমার দূর সম্পর্কের বোন-পো হয় ।’

মীরপুর মেম কী একটা বলতে যাচ্ছিলেন ।

কিন্তু তার পূর্বেই ও-রেলি ক্রিকেটের গল্প জুড়ে দিল—মীরপুর-বিষ্ণুছড়ার কথা-কাটাকাটিকে সে ‘স্বদেশী’ বোমার চেয়েও বেশী

ডরাত—বললে, ‘একটা ভালো ইংলিশ ক্রিকেট টীম নিয়ে আসছে নীতে ইণ্ডিয়া আসতে চায়। ছেলেটার তাই নিয়ে উৎসাহের অন্ত নেই। ভারতবর্ষের সব কটা ‘পিচ’ সে তার আপন হাতের তেলোর চেয়েও ভালো করে চেনে। আমার তো মনে হল ‘পিচ’ গুলোর ঘাস বকরির মত চিবিয়ে খেয়ে যাচাই করে নিয়েছে, কোনটা বোলারের স্বর্গ আর কোনটা ব্যাটসম্যানের—দরকার হলে ‘কোয়ের ম্যাটিঙ’ও চিবুতে তৈরী। আমি বললুম, ‘অতশত মাথা ঘামাচ্ছ কেন হেণ্ডারসন, এদেশের ক্রিকেট বড্ড কাঁচা ; তোমরা অনায়াসেই জিতে যাবে।’

হেণ্ডারসন বললে, ‘তার কিছু ঠিক-ঠিকানা নেই। বোম্বায়ের জ্যাম সায়েব—তোমরা নাকি নামটা অল্প ধরনে উচ্চারণ করো। তিনি ‘জ্যাম’ হোন আর জেলিই হোন, বিলেতে তিনি তাড় হাঁকড়ে সবাইকে ক-শো বার জেলি বানিয়ে দিয়েছেন, তার খবরও তো তোমার অজানা নেই। কে বলতে পারে বলো, কালই এদেশে আরো পাঁচটা জ্যাম বেরিয়ে যাবে না এবং হয়তো জ্যাম নয়, তার চেয়েও শক্ত মাল—‘হার্ড নাট’।’ আমি উত্তরে বললুম, ‘অসম্ভব তো কিছুই নয় তবে কিনা কাল আমার ঞাজ গজাতে পারে বলে আজ তো আমি তাই নিয়ে মাথা ঘামাইনে কিংবা ঞাজ সাক্ষুতরো রাখার জ্ঞ বরুশও কিনিনে।’

মান্দামপুরের বুড়ো সাহেব লক্ষ্য করলেন, ক্রিকেটের গল্পে উত্তেজিত হয়ে ও-রেলি তার মন-মরা ভাবটা কাটিয়ে ফেলেছে। খুশি হয়ে উৎসাহ দিয়ে বললে, ‘তা তুমি এখানে একটা ক্রিকেট টীম বানাও না কেন ?’

ও-রেলি বললে, ‘ভাবছি, শমশেরগঞ্জের জমিদারের কাছ থেকে কিছু টাকা বাগাব। সম্প্রতি লোকটা গুম-খুনে জড়িয়ে পড়েছিল— অথচ সোম পর্যন্ত তার বিরুদ্ধে প্রমাণ খাড়া করতে পারলে না। আমি কিন্তু জমিদারকে ভাঁওতা মারলুম, সব প্রমাণ তৈরী, এবারে বাহাদনকে বুলতে হবে। পায়ে জড়িয়ে ধরে আর কি, তখন

ভবিষ্যতের জন্ত তার বুদ্ধিমত্তার ভয় জাগিয়ে দিয়ে যেন নিছক মেহেরবানি করে তাকে ছেড়ে দিয়েছি। টাকা চাইলে এখন তার ঘাড় দেবে।’

সবাই কলরব তুলে নূতন করে আবার সেই গুম-খুনের পোস্ট-মর্টেমে লেগে গেলেন। ইংলণ্ডে হিজ ম্যাজেস্টির পরেই ক্রিকেট-আলোচনা আড্ডার রাজা কিন্তু পূব-বাঙলার গুম-খুন রাজারও রাজা, অর্থাৎ মন্ত্রী—অবশ্য দাবা খেলার—রাজার চেয়ে ঢের বেশি তাগদ ধরেন। কত রকম কথা-কাটাকাটিই না হল, বিষ্ণুছড়ার মেম বলছেন, জমিদারের হুকুমে বড় ভাইয়ের চোখের সামনে ছোট ভাইকে জ্যান্ত পোতা হয়েছিল, মীরপুরের মেম বললেন, গুলতান, লোকটার বড় ভাই-ই নেই আর সে খুন হয় নি আদপেই ; মীরপুরের জমিদারের টাকা খেয়ে গুম হয়ে গিয়েছে শমশেরগঞ্জকে জড়াবার জন্ত।

অনেকক্ষণ ধরে আলোচনা চলেছিল। ইতিমধ্যে ও-রেলি কেটে পড়েছে।

মাদামপুরকে বাগানে ফেরার সময় বিড়বিড় করে বলতে শোনা গেল, ও-রেলিকে বোঝা ভার।

### ছয়

বরঞ্চ ইংরেজ সকালবেলার বেকন আণ্ডা বর্জন করে দেবে, বরঞ্চ ইংরেজ বড়দিনে গির্জা কট করতে পারে, এমন কি শাশুড়ীর জন্মদিনও ইংরেজের পক্ষে ভুলে যাওয়া অসম্ভব নয়, কিন্তু ক্লাব-গমন, বন্ধ করা ইংরেজের পক্ষে হৌস-অব-কমনস্ পুড়িয়ে দেবার শামিল—মুসলমানের কলমা ভুলে যাওয়া, হিন্দুর গৌ-মাংস ভক্ষণের তুলনায় চুলে চিমটি কাটার মত।

ডেভিড, মেব্‌ল্ তিন মাস ধরে ক্লাবে যায় নি।

যে মীরপুরের ছোট মেম ডুমুরের ফুল, সাপের ঠ্যাঙ দেখেছেন বলে

ক্লাবে দাবি করে থাকেন, তাঁকে পর্যন্ত স্বীকার করতে হল, মধুগঞ্জের তাবৎ খানসামা-বাটলার, মেথর-ঝাড়ুদারকে ফালতো চা বকশিশ দিয়েও তিনি কারণটা বের করতে পারেন নি।

এ-সব বাবদে সোজাসুজি প্রশ্ন জিজ্ঞেস করা ইংরেজের সর্বশাস্ত্রে বারণ। একমাত্র পাদ্রীদের কিছু হক আছে। বুড়ো পাদ্রী সন্তর্পণে প্রশ্ন শুধিয়ে নিরাশ হলেন। বুড়ী মেম একবার ডেভিডের মফস্বল-বাসের সময় মেব্লের সঙ্গে তেরাত্তির কাটান। চতুর্দিকে কড়া নজর ফেলে, এমনকি শেষটায় জিজ্ঞেসবাদ করেও কোনো খবর ষোগাড় করতে পারলেন না।

বুড়ী বেদনা পেয়েছিলেন। তৃতীয় রাত্রিতে ছিল পূর্ণিমা। জানালা দিয়ে চোখে চাঁদের আলো পড়তে তাঁর ঘুম ভেঙে যায়। পাশের খাটের দিকে তাকিয়ে দেখেন মেব্ল নেই। পা টিপে টিপে বারান্দায় এসে দেখেন মেব্ল ডেকচেয়ারে সামনের দিকে বুকুে ছ হাত দিয়ে মুখ ঢেকে বসে আছে—তার দীর্ঘ বাদামী চুল হাত মুখ ছাপিয়ে ফেলেছে। বুড়ী মাথায় হাত বুলিয়ে দিলেন, চুলে আঙুল চালাতে চালাতে হঠাৎ চুলের ডগাগুলো ভেজা ঠেকল।

প্রায় অর্ধশতাব্দী ধরে তিনি পাদ্রী টিলার বহু তরুণী, বিস্তর যুবতীর অনেক বুকফাটা কান্না দেখেছেন, কোনো কোনো স্থলে সলা পরামর্শ দিয়ে নানা দিকে নানা রকম কলকাঠি চালিয়ে এদের মুখে হাসি ফোটাতেও সক্ষম হয়েছেন, কিন্তু এ নারীর বেদনা কী হতে পারে, সে সমস্যার সন্ধানে কোন দিকে হাতড়াতে হবে তার সামান্যতম অনুমানও তিনি করতে পারলেন না।

বুড়ো পাদ্রী সব শুনে বললেন, ‘এসো, ছুজনাতে মিলে প্রার্থনা করি।’

সোম একদিন ও-রেলিকে প্রশ্ন শুখাল মাত্র ছুটি শব্দ দিয়ে,  
‘এনি ট্রাবল?’

উত্তরের জগ্ন মাত্র এক সেকেণ্ড অপেক্ষা করে সোম গুড বাই বলে

বারান্দা থেকে নেমে লিচুচলা দিয়ে গেট খুলে বড় রাস্তায় নেমে গেল।

ও-রেলি ভাবলে মাত্র ছুটি কথা, 'এনি ট্রাবল'।

স্মরণই করতে পারল না, তার জীবনে কখনো কোনো শক্ত ট্রাবল এসেছিল, কি না ঘেটাকে সে কাত করতে পারে নি। সে তাগড়া জোয়ান, লেখাপড়ায় ব্রিলিয়ান্ট না হলেও ভালো, গায়ের জোরে কমতি নেই, আর পাঁচটা ইংরেজের মত তিনটে কথা বলতে গেলে সাতবার হেঁচট খায় না—তার আবার ট্রাবল! হাঁ, একটা সামান্য ট্রাবলের কথা মনে পড়ছে বটে। এমনিতে তার মুখে শুধু খই ফোটে না, টোস্ট পর্যন্ত সেকা যায় তবে প্রেমের ব্যাপারে একটু মুখচোরা বলে মেব্লকে বিয়ের প্রস্তাব পাড়তে তার তিনটে রবির সন্ধ্যা লেগেছিল বটে, কিন্তু তারপরের অবস্থা দেখে সে থ—মেব্ল বাহান্ন রববারের আগের থেকেই নাকি তাকে বিয়ে করবে বলে মনস্থির করে ট্রোসের ডিজাইন বানাতে লেগে গিয়েছিল।

ইস্কুলের ব্লক, চাকরির জ্ঞান পরীক্ষা, রাগবিতে একখানা পাজির গুঁড়িয়ে যাওয়া এ-সব ও-রেলির কাছে কখনো ট্রাবল বলে মনে হয় নি: তার একমাত্র ভয় ছিল মেব্ল যদি তাকে গ্রহণ না করে। সেই মেব্লকে পেতে তার তিনটে রববার—অর্থাৎ একুশ দিনের দিবারাত্র ছুশ্চিন্তা—লেগেছিল বটে কিন্তু আজকের তুলনায় সে কত সহজ। সেদিন পথহারা ও-রেলির সামনে থেকে হঠাৎ যেন কুয়াশা কেটে যায় আর স্মুখে দেখে বসন্তের মধুরৌদ্রে, নীল আকাশের পটে আঁকা মেব্ল। 'উতলা পবন বেগে মেঘে মেঘে' যেন তার খোলা চুল উড়ে উড়ে চলেছে। হাতে তার একটি ছোট ফুল। তারই এক-একটা পাপড়ি ছিঁড়ছে আর বলছে 'হি লাভস্ মী', পরেরটায় বলছে 'হি লাভস্ মী নট' এই করে করে ভাগ্য গণনা করছে। সর্বশেষের পাপড়িতে 'হি লাভস্ মী' না 'হি লাভস্ মী নট'-এ এই জীবন-মরণ সমস্তার সমাধান মিলবে।

ও-রেলির মনে পড়ল, মেব্লু সেদিন তার কানের ডগায় চুমো খেয়ে বলেছিল, ‘আমি সব সময়ই জ্ঞানতুম, শেষ পাপড়ি ‘হি লাভস্ মী’-তেই শেষ হবে। একদিন যখন হল না তখন রীতিমত হকচকিয়ে গেলুম। পরে দেখি একটা পাপড়ি আগের থেকেই ছিঁড়ে গিয়েছিল—টুকরোখানা তখনো বাঁটায় লেগে আছে।’

সে সব দিন চলে যাওয়ার পর আজ সোম ডিজেস করলে, ‘এনি ট্রাবল্ !’

তারপর আরো তিন মাস কেটে গিয়েছে। এ তিন মাসের ভিতর আরো পরিবর্তন ঘটেছে। ও-রেলিরা ক্লাব দূরে থাক কারো বাড়িতে পর্যন্ত যায় নি। তার থেকে পরিষ্কার বোঝা গেল তারাও চায় না কেউ তাদের বাড়িতে আসুক। শেষ পর্যন্ত এক পাত্রী মেম ছাড়া আর কেউ ও-রেলির টিলায় আসত না এবং তিনিও আসতেন যেন অতিশয় দায়ে পড়ে, অন্ধভাবে অন্ধকারে কোন এক ভবিষ্যৎ অমঙ্গল আবছা বুঝতে পেরে মানুষ যেরকম আত্মজ্ঞানের কাছে এসে দাঁড়ায়।

তারপর জ্যৈষ্ঠ-আষাঢ়ের খরদাহের পর নামল বর্ষা। কলকাতার বদখদ দালান-কোঠার উপর বর্ষা যখন নামে তখন বড়বাজারের ‘বেরসিক মারোয়াড়ী পর্যন্ত আকাশের দিকে ছ-একবার না তাকিয়ে থাকতে পারে না, আর কলেজের মেয়েরা নাকি ছাদের উপর বৃষ্টির জলে ভেজবার অছিলা করে মেঘের জলের সঙ্গে চোখের জল মেলায়। আর তাতে আশ্চর্য হবারই বা কী আছে। ছেলেরা তো কলেজ পাসের পর অন্ধকার ভবিষ্যতের কথা ভেবে প্রেম, বিয়ে-শাদি মন থেকে কুলোর বাতাস দিয়ে খেদিয়ে দেয়; মেয়েরাই শুধু অজানা ভবিষ্যতকে অতখানি ডরায় না বলে বে-এক্কেয়ার প্রেমে পড়ে আর তারই প্রকাশ খুঁজতে গিয়ে ‘রবিঠাকুরের গান আর কবিতা’ বাঁচিয়ে রাখে। তবে কি রবিঠাকুর এ তত্ত্বটা জ্ঞানতেন, তাই ছেলেরা চেয়ে মেয়েদের গান শিখিয়েছেন অনেক বেশী সযত্নে ?

মধুগঞ্জে এ-সব বালাই নেই—মারোয়াড়ী নেই বললেও চলে,

‘কলেজ নেই তাই ‘কলেজের’ মেয়েও নেই। ‘মধুগঞ্জী বালিকাদের বিয়ে হয়ে যায় চোদ্দ পেরতে না পেরতেই। এ বিষয়ে ওয়েলস পাত্রী সাহেবও নেটিভ বনে গিয়েছেন, রুথ-মেরীদেবর বোলো পেরতে না পেরতেই বরের সঙ্কানে লেগে যান। তাঁর যুক্তি—প্রাচ্যে মেয়েরা বিবাহযোগ্য হয়ে যায় অল্প বয়সেই, এদেশে বিলিতি কায়দা মেনে নিলে শুধু অনর্থেরই সৃষ্টি হয়।

বিবাহ মাত্রই প্রেমের গোরস্তান, কিন্তু শান্তির আস্তানা।।

তাই এখানে কোনো তরুণী অকারণ বেদনায় কাতর হয়ে রবিঠাকুরের কবিতা-গান নিয়ে নাড়াচড়া করে না। রবিঠাকুর তাই সে যুগে মধুগঞ্জে অচল।

ঠিক সেই কারণেই প্রকৃতির সৌন্দর্যবোধ মধুগঞ্জে মদনভঙ্গের মত শহরের সর্বত্র ছড়িয়ে পড়েছে। অর্থাৎ এখানকার লোক নববরণে ময়ূরের মত পেখম তুলে নাচে না, আবার উত্তরের পাহাড় পেরিয়ে দলে দলে নবীন মেঘ এসে যখন শহরের বনের উপর আছাড় খেয়ে পড়ে তখনও মানুষ সেখানে বর্ষার মধুর দিকটা সম্বন্ধে অচেতন হতে পারে না। আর হবেই বা কী করে? প্রথম যেদিন মধুগঞ্জে কদম ফুল ফোটে সেদিন তার গন্ধে সমস্ত শহর ম-ম করতে থাকে। সে গন্ধে নেশা আছে—রায়বাহাজুর চক্রবর্তীর মত রসকব-হীন মানুষকেও দেখা যায় বেড়িয়ে বাড়ি ফেরার সময় একডাল কদম হাতে নিয়ে ফিরছেন।

কিন্তু পুব-বাঙলা আসামের সায়েবরা বর্ষাকালে প্রায় পাগল হয়ে যায়। বিশেষ করে যারা বাগানের ছোট ছোট টিলাতে নির্জন বাসে থাকতে বাধ্য হয়। পাঁচ মাইলের ভিতরে একটা ইংরেজ নেই যার সঙ্গে ছুটি কথা বলতে পারে, দিনের পর দিন অনবরত বৃষ্টি, রাস্তা-ঘাট জলে-জোয়ারে ভেসে গিয়েছে, ক্লাবে যাবার কথাই ওঠে না। শেষ পর্যন্ত গ্রামোফোন বাজানো পর্যন্ত বন্ধ হয়ে যায়। হিসেব নিয়ে দেখা গিয়েছে ‘বেশীর ভাগ সায়েবরাই এই সময় ‘দিশী’ রমণী গ্রহণ করে।

‘কেউ কেউ ম্যালেরিয়ায় তাদের শুক্রাণু লাভ করে সেরে উঠার পর; আর কেউ কেউ একটানা নির্জনবাসের ফলে হস্তে হয়ে গিয়ে।

ও-রেলির মাথার ইক্কুপগুলো জোর টাইট করে বসানো। বর্ষা তাকে কাবু করতে পারে না। তার উপর মেব্লুও পাশের চেয়ারে বসে।

তবু বোঝা গেল, এ বর্ষা ও-রেলিকে পর্যন্ত অনেকখানি ঘায়েল করে দিয়েছে। ও-রেলি মুষড়ে পড়েছে।

### সাত

মাদামপুরের বড় সাহেব বললেন, ‘এ কথাটা আমি কী করে বিশ্বাস করি বলো তো, পার্শ্বি? মেব্লু মিশুক হোক আর নাই হোক, ওর মত ডিসেন্ট গার্ল আমি জীবনে অল্পই দেখেছি। ‘কলেজ পর্যন্ত পড়েছে, উত্তম রুচি। সে কী করে অতখানি স্টুপ করবে? তুমি ছাড়া অন্য কেউ এ কথাটা বললে তার সঙ্গে আমার হাতাহাতি হয়ে যেত।’

বিষ্ণুছড়ার সায়েবের বয়স যদিও কম তবু এ অঞ্চলে তার খ্যাতি-প্রতিপত্তি বিচক্ষণ লোক হিসাবে। আর পরচর্চা, গুজোব রটানো থেকে তিনি থাকেন সবসময়েই দূরে এবং আশ্চর্য, যারা এ-সব জিনিসে কান দেয় না, পাকা খবর তারাই পায় বেশী এবং আর সকলের আগে। বললেন, ‘আমার কাছে এখনো সম্পূর্ণ অবিশ্বাস বলে মনে হচ্ছে। কিন্তু তোমাকে তো বললুম, কিছুটা বিশ্বাস না করলে তোমার কাছে আমি কথাটা পাড়তুম না। অবশ্য একথাও আমি বলব, এ-সব জিনিস আমি শেষ পর্যন্ত অবিশ্বাস করারই চেষ্টা করি।’

‘তোমার মেম, মীরপুরের মেম, এরা সব জানতে পেরেছে?’

‘নিশ্চয়ই এখন পর্যন্ত না। শার্লট জানতে পারলে আমাকে.

রাত তিনটেয় জাগিয়ে খবরটা দিত এবং সঙ্গে সঙ্গে মীরপুর ছুটত এমিলিকে টেকা মারবার জন্ম—অ্যাণ্ড ভাইস-ভার্সা। তবে খুব বেশী দিন গোপন থাকবে না। সত্যি হোক আর মিথ্যেই হোক যে-সব মেয়েরা মেবলের রুচিশীল ব্যক্তিত্বের সামনে নিজেদের ছোট মনে করত তাদের জিভের লকলকানি খুব শিগগিরই আরম্ভ হয়ে যাবে।’

সন্ধ্যার পর টেনিস লনের এক কোণে বসে দুই সায়েব অনেকক্ষণ ধরে চুপ করে ভাবলেন। মধুগঞ্জ অঞ্চলের ইংরেজ কলোনির আসল সর্দার এঁরাই। বিষয়টি তাঁরা আলোচনা করেছিলেন সেই কর্তব্যবোধ থেকে—এ সম্বন্ধে তাঁরা কিছু করতে পারেন কি না।

শেষটায় মাদামপুর হুক্কার দিলেন, ‘বয়, দো ব্রা পেগ্‌।’

খবর কিংবা গুজোব যাই হোক, ব্যাপারটা মারাত্মক—গড্ ড্যাম্ সিরিয়স—‘মেব্ল্ নাকি ‘নেটিভ’ বাটলারটার প্রতি ‘অম্মুরক্ত।

ঐ ‘মিশকালো, অষ্টপ্রহর, মদে-মাতাল-রাঙা-চোখওলা ‘ভোঁতকা লোকটার প্রতি ‘মেব্ল্’ অম্মুরক্ত, একথা কে বিশ্বাস করবে? একমাত্র ‘স্ট্রীচারিত্র দেবতারাও জানে না’ তত্ত্ব মানলে সব কিছুই বিশ্বাস করা যায়, কিন্তু এই সম্পূর্ণ অবিশ্বাস স্ত্রী-নিন্দার সামনে দাঁড়িয়ে বরঞ্চ জিজ্ঞেস করতে ইচ্ছে যায়, দেবতারা না হয় দেবীদের চরিত্র চিনতে পারেননি, তাই বলে পুরুষকেও তার স্ত্রী-জাত সম্বন্ধে এই অজ্ঞতা নিতে হবে এবং মেনে নিয়ে স্ত্রী-জাতকে অপমান এবং নিজের বুদ্ধিবৃত্তিকে লাঞ্ছনা করতে হবে?

কিন্তু এ-সব তো পরের কথা। প্রথমেই যেটা মনে আসে সেইটাই মাদামপুরের বড় সাহেব বিষ্ণুছড়াকে বললেন—‘হাতা-হাতি হয়ে যেত’। তারপর ছড়ছড় করে মনে আসে একসঙ্গে দশটা প্রতিবাদ; ও-রেলির মত ‘সুপুরুষকে’ ছেড়ে? এক বৎসর যেতে না যেতে? ও-রেলির এতখানি আদর-যত্ন পেয়েও? ও-রেলি কি তবে জানে না?

ঠাণ্ডা-মাথা মাদামপুর বললেন, ‘পাসি, তবে কি তাই তারা পাঁচজনের সঙ্গে মেলামেশা বন্ধ করে দিয়েছে?’

বিষ্ণুছড়া একটুখানি ভেবে নিয়ে বললেন, ‘কিন্তু মেলা-মেশাটা  
‘বজায় রাখলেই তো মানুষের সন্দেহ হত কম।’

মাদামপুর দুই ঢোকে ডবল ছইস্কি খতম করে বললেন, ‘মাই গড,  
‘নেটিভরা জানতে পারলে লজ্জার সীমা থাকবে না। ওঃ!’

‘তা ঠিক, তবে কি না’ জিনিসটা যখন চা-বাগিচার ভিতরে আগেও  
‘হয়েছে তখন—’

মাদামপুর বাধা দিয়ে বললেন, ‘সে হয় শহর থেকে দূরে, বনের  
ভিতর, টিলার উপরে।’

‘সে কথা ঠিক কিন্তু পাদ্রী-টিলার’ বাচ্চারা কোথা থেকে আসে  
‘সে তত্ত্বও তো নেটিভদের’ অজানা নয়।’

মাদামপুর একটুখানি অসহিষ্ণু হয়ে বললেন, ‘সে তো সাধারণ-  
ভাবে, যে রকম ধরো অনাথাশ্রম হয়। কিন্তু এখানে যে ব্যক্তিবিশেষ,  
সমাজ যাকে চেনে। তা আবার এ. এস. পির মেম! মাই  
‘গড! আমি ভাবতুম, পুরুষরা এ-সব চলাচলিতে যতখানি নিচু হতে  
পারে, স্ত্রীলোকেরা ততখানি পারে না।’

দুজনেই উঠে দাঁড়ালেন। দেখা গেল বিষ্ণুছড়া আর মীরপুরের  
মেম আসছেন। সাপে-নেউলে গল্প করতে করতে আসছেন এ জিনিস  
‘প্রাণীজগতে কখনোই দেখা যায় না। দূর থেকে দেখে মনে হয়  
যেন এক লেঙ্গোটার ইয়ার—উহুঁ, এক ফ্রকের সহী। অথচ এঁরা  
আসছেন ইনি ওঁকে ছোবল মারতে মারতে, উনি এঁকে কামড়  
দিতে দিতে। চোখ লাল না করে, দাঁত না খিঁচিয়ে, ফণা না  
বাগিয়ে বগড়া করতে পারে একমাত্র মানুষই—অবশ্য স্ত্রীলোকেরাই  
পায় মাইকেল ও-রেলি শীল্ড—পুরুষের কপালে কনসোলেশন  
প্রাইজ।

গুজবটা ছড়াতে কত দিন লেগেছিল বলা শক্ত। গুজবের স্বভাব  
হচ্ছে যে, প্রথম ধাক্কাতেই সে যদি কিছুটা সাহায্য না পায় তবে  
কেমন যেন দড়কচা মেরে যায়। ব্যাপারটার গুরুত্ব বুঝে মাদামপুর

আর বিষ্ণুছড়া যদি সেটার টুঁটি চেপে না ধরতেন, তবে কী হত বলা যায় না ; এ স্থলে গুজবটাকে ফের চাঙ্গা হয়ে ছড়িয়ে পড়তে বেশ একটুখানি সময় লেগেছিল।

মধুগঞ্জে ‘আগা-ঘরে’ গুজব-মাত্রেরই জন্ম-মৃত্যু জরা-যৌবনের বেশ একটা স্মূর্নির্দিষ্ট ঠিকুজি আছে। গুজবের জননী যদি মীরপুরের ছোট মেম হন, তবে তার ভবিষ্যৎ উজ্জ্বল। অবশ্য জানা কথা, বিষ্ণুছড়ার বড় মেম তখন আঁতুড়ঘরেই বাচ্চাটাকে মুন খাইয়ে মেরে ফেলবার চেষ্টা করেন এবং আরো জানা কথা বেশীর ভাগ স্থলেই বাচ্চা ঘোঁত-ঘোঁত করে মুনটা খেয়ে ফেলে দিব্য টাঁ-টাঁ করে ছুধের জন্তু আপন ক্ষুধা জানিয়ে দেয়। তার কারণ বিষ্ণুছড়ার বড় মেম পাঁঠা কাটতে চান তার পদ-মর্যাদার ভার দিয়ে—তিনি বড় মেম, মীরপুর ছোট মেম—আর মীরপুর কাটে ধার দিয়ে। তার উপর ক্লাবে ছোট মেমদের সংখ্যা বেশী, কাজেই তারা সদলবল সায় দেয় মীরপুরের কথায় কথায়—হায়, কার্লমার্কস্ যদি আগা-ঘরে একটা চুঁ মেরে যেতেন, তবে তিনি ‘পতি বুজুঁয়াজী আর ‘অৎ বুজুঁয়াজীর’ আড়াআড়ি সম্বন্ধে কত তত্ত্বকথা না রপ্ত করে যেতে পারতেন !

আবার বিষ্ণুছড়া যদি কোনো গুজবের ‘গড়মাদার’ হন তবে সে বেচারীকে ষষ্ঠী-পূজোর দিন পর্যন্ত বাঁচতে হয় না।

মেবলের সৌভাগ্য বলতে হবে যে, তার সম্বন্ধে গুজবটা বিষ্ণুছড়া ক্লাবে বাপ্তিস্ম করেছিলেন এবং সঙ্গে সঙ্গেই মীরপুর বললেন, এ গুজব তাঁর কানে এসেছে বহুদিন হল। তিনি এটা একদম বিশ্বাস করেননি। ও-রেলি বিপ্লবীদের পিছনে লেগেছে বলে নেটিভরা হিংসেয় এইসব আজগুবি যাচ্ছেতাই কেচ্ছা রটাচ্ছে।

অনেকক্ষণ ধরে কথা-কাটাকাটি হয়েছিল। সে ময়না তদন্তে মেবলের গোপনতম অন্তর্বস্ত্রের সাইজ, রঙ কিছুই বাদ পড়ল না। সেদিন কিন্তু আরেকটু হলে মীরপুরই লড়াইয়ে হেরে যেতেন, কারণ,

দেখা গেল মেবলের সৌন্দর্যে হিংস্রটে খাটাসমুখোগুলো পাইকারী হিসেবে জুটেছে বিষ্ণুছড়ার পিছনে। আরেকটু হলে মীরপুরকে রণে ভঙ্গ দিতে হত, কিন্তু অত্যন্ত অপ্রত্যাশিতভাবে তার ফিফ্‌থ কলাম জুটে গেল, বিষ্ণুছড়ার বড়সাহেবের সাহায্যে।

এ-সব কেলেক্কারি-কৌদল মেমেরা করে সায়েবদের বাদ দিয়ে। আজকের আলোচনা কিন্তু এতই তপ্ত-গরম হয়ে উঠেছিল যে, বিষ্ণুছড়ার বড় সায়েব যে কখন এসে একপাশে দাঁড়িয়েছেন কেউ লক্ষ্য করেনি।

হঠাৎ এক সময় তাঁর স্ত্রীর কথা কেটে দিয়ে বললেন, 'শার্লট, তুমি যে কথা বলছ সেটা কি খুব রুচিসঙ্গত ?

তারপর আর পাঁচজনের দিকে একটুখানি বাও করে, 'আপনারা আমাকে মার্ফ করবেন,' বলে আন্তে আন্তে বাইরে চলে গেলেন।

সবাই থ। একে অঙ্কের মুখের দিকে ফ্যালফ্যাল করে তাকিয়ে বরঞ্চ যদি বিষ্ণুছড়া তার খাণ্ডার মেমের কথার প্রতিবাদ না করে কোর্ট-পাতলুন ফেলে দিয়ে আঙাখেলার টেবিলের উপর খেই-খেই করে নেচে নেচে ধর্মসঙ্গীত গাইতে আরম্ভ করতেন তবু আঙা-ঘর এতখানি আশ্চর্য হত না, কারণ এ অঞ্চলে সবাই জানে, বিষ্ণুছড়া তাঁর মেমকে ডরান কুলীদের স্ট্রাইকের চেয়েও বেশী। তাঁর যে এতখানি দুঃসাহস হতে পারে সেকথা সম্পূর্ণ কল্পনাতীত। সবাই থ। না, থ নয়—একেবারে দ, ধ, দন্ত্য ন—বর্ণমালার শেষ হরফ পর্যন্ত।

সম্মিতে ফেরার পর মীরপুরের ছোট মেম ফিসফিস করে এস. ডি. ও'র মেমকে বললেন, 'নিশ্চয়ই এক জালা ছইস্কি খেয়েছে, বাঘের চর্বির সঙ্গে কক্টেল বানিয়ে।'

এস. ডি. ও'র মেমের সুরসিকারূপে খ্যাতি ছিল। ক্লাব থেকে বেরতে বেরতে বললেন, 'হ্যাঁ, একটা ছবিতে দেখেছিলুম, ছইস্কির পি পে থেকে ছ্যাদা দিয়ে ফোঁটা ফোঁটা ছইস্কি চুইয়ে বেরচ্ছে। এক ইঁদুরছানা সেইটে চুকচুক করে চুষে হয়ে গিয়েছে বেহেড মাতাল।

লাফ দিয়ে পিঁপের উপর উঠে আস্তিন গুটিয়ে চিংকার করে বলছে, 'ঐ ড্যাম্ ক্যাটটা গেল কোথায় ? নিয়ে এসো এইখানে—আমি ব্যাটার সঙ্গে লড়ব ।'

মীরপুর বললেন, 'ভালো গল্প ; টম্কে বলতে হবে । আপিসের কাউকে ডিসমিস করতে হলে সে সেই সাত-সকাল ছটার সময় ছইস্কি খেয়ে আপিস যায় ।'

এস. ডি. ও-মেম বললেন, 'আজ রাতে বেচারা পার্সির ডিনার জুটবে না । ওকে 'পট-লাকে' নেমস্তল্ল করলে হয় না ?' হঠাৎ কথা বন্ধ করে বললেন, 'ঐ দেখো, পার্সিকে ফেলে বেটি মোটর হাঁকিয়ে বাড়ি রওয়ানা হয়েছে । এই বয়সে পার্সি বেচারার কী করে টাক হল বুঝতে কষ্ট হয় না । তালুতে যে কুলে আড়াইখানা চুল আছে সেগুলোও আজ রাতে ছেঁড়া যাবে ।'

মীরপুর ততক্ষণে আপন ভাবনায় ডুব দিয়েছেন । গুজবটা তিনি বিশ্বাস করেননি । কিন্তু এই যে বিষ্ণুপুরের বড় সাহেব জিনিসটাকে এত সিরিয়সলি নিলে যে, মেমকে পর্যন্ত ধমকে দিলে— তবে কি ?—কে জানে ?

'গুড্ নাইট !'

'গুড্ নাইট !'

## আট

বিষ্ণুছড়া আশু-ঘরে গুজবটার উপর যে বম্-শেল ফাটিয়েছিলেন তার ধুঁয়ো কাটতে কাটতে কেটে গেল পুরো তিনটি মাস । তাঁর সাহসকে পুরস্কার দেবার জন্মই বোধ করি গুজবটাকে মৃতের প্রতি সম্মান দেখানো হল—সায়ের উপর চটে গিয়ে বিষ্ণুছড়ার মেমও হুণ্ডা-তিনেক ক্লাবে হাজিরা দেননি—ও নিয়ে বহুদিন ক্লাবে আর কোনো আলোচনা হল না । আর যত বড় রগরগে খবর কিংবা

পরদিন, পরচর্চাই হোক মানুষ এক জিনিস নিয়ে বেশীদিন লেগে থাকতে পারে না। পারলে কোনো ছেলেই পরীক্ষায় ফেল হত না, কোনো আবিষ্কারই অনাবিষ্কৃত হয়ে থাকত না। ইংরেজীতে এই মনোবৃত্তিরই নাম, 'গ্রাসহপার মাইণ্ড,' প্রতি মুহূর্তে হেথায় লক্ষ্য, হোথায় বক্ষ্য। ইতিমধ্যে আবার লাকাউড়া বাগিচায় একটা খুন হয়ে গেল। কুলি-সর্দারের উপকা বউ—'মিস্ লাকাউড়া'—ডিম্পেনসারির কম্পাউণ্ডারের সঙ্গে ইয়াকি-ফাজলামো করছিল বলে সে তার গলাটি কেটে, গামছায় বেঁধে থানায় নিয়ে গিয়ে স্বহস্তে পেশ করেছে। পথে পড়ে চ্যাণ্ডের খাল, তার সাঁকোতে এক-এক পয়সা করে 'পোল ট্যান্স দিতে হয়। সর্দারকে বাধা দিতে সে বললে, সরকারী কাজে থানায় যাচ্ছে, তার ট্যান্সো লাগবে না।

‘কি সরকারী কাজ?’

সর্দার গামছা খুলে মুণ্ডটা দেখালে। সবাই নাকি দেখামাত্র পরিত্রাহি চিৎকার করে চুঙ্গীঘরের দরজায় ছড়কো মেরে জানলা দিয়ে ঢেঁচিয়ে বলে, 'তুই শিগগির যা, তোর ট্যান্সো লাগবে না, এ সত্যই বড্ড জরুরী সরকারী কাজ।'

সর্দার নাকি এদের ভয় দেখে একটুখানি তাজ্জব বেনে গিয়েছিল। ধীরে স্নুস্বে মুণ্ডটা ফের গামছায় বেঁধে হেলে ছুলে থানার দিকে রওনা দিয়েছিল।

ম্যাজিস্ট্রেট মরতুজা সাহেবের এজলাসে যখন সর্দার দাঁড়ালে তখন তিনি তাকে জিজ্ঞেস করলেন, 'তুই মেয়েটাকে খুন করতে গেলি কেন?'

সর্দার বললে, 'করব না? বেটি আমাকে বললে, দেখ সর্দার আমার উপর তুই যদি চটে গিয়ে থাকিস তবে আর কোনো মেয়ে-ছেলেকে নে না, এই ছুনিয়াতে আমিই তো একহ-ই-ঠো লড়কী নই! আর তোকে যদি আমার ভালো না লাগে তবে তুইও তো একহ-ই-ঠো মর্দ নস; তুই বেছে নে তোর-ঠো, আমি বেছেনি হামার-ঠো।' ঐসী বেতমীজ? হারামজাদী আমার মুখের উপর এইরকম বেশরম

বাত বললে। তাকে খুন করে আমি সরকারী কাম করেছি হুজুর। আমাকে এরা বেহক্ হাজতে পুরে রেখেছে, আপনিই বলুন হুজুর।

ম্যাজিস্ট্রেট সর্দারকে দায়রায় সোপর্দ করার সময় সরকারী উকিলের দিকে তাকিয়ে ইংরেজিতে বললেন, 'দেয়ার ইজ্জ এ নট অব ট্রুথ ইন ওয়াট দি গাল সেড ! ঐ খাঁটি কথাটি মেনে নিলে পৃথিবীতে খুনের সংখ্যা অনেক কমে যেত।'

এই নিয়ে ক্লাব মেতে রইল খুনের খবর পৌঁছানোর থেকে সর্দারকে চোদ্দ বছর জেল পর্যন্ত। তারপর এই লাকউড়া বাগিচার ছোট সাহেব করলে আত্মহত্যা। কেন করল তার কোনো সন্ধান পাওয়া গেল না। কেউ বললে, দেশে যে মেম সায়েবের সঙ্গে তার বিয়ের কথা পাকাপাকি ছিল সে নাকি আর কারো সঙ্গে ভিড়ে গিয়েছে, কেউ বলে সায়েব যে এদিকে এক কুলী-রমণীর কৃষ্ণালিঙ্গনে চব্বিশ ঘণ্টা চুর হয়ে থাকত সেই খবর শুনে সে রমণী অশ্রু পুরুষ খুঁজে নিয়েছে, কেউ বললে, তিনমাসব্যাপী ঝাড়া বাদলের ঠেলায় টিলার নির্জন বাসে খেপে গিয়ে মদ ধরে—তাও আবার কুলীদের ধায়েধরী—তারপর দিবা-রাত্তিরেও সে মদের নেশায় ছ-ঠ্যাঙওলা বাঘের দিকে সে অনবরত গুলি ছুঁড়তে থাকে, শেষটায় বাঘ নাকি তার মাথার ভিতর ঢুকে যায়, চিৎকার করে সেই ফরিয়াদ জানাতে জানাতে একদিন সেই বাঘকে আপন কানের ভিতর দিয়ে পিস্তলের গুলি চালিয়ে খুন করে।

ততদিন ও-রেলিদের কথা প্রায় সবাই ভুলে গিয়েছে। ক্লাব যখন গুজবের তাড়িতে মত্ত তখন ও-রেলিদের বংশধর জন্মের খবর পৌঁছল পানসে শরবতের মতো। কেউ সামান্য চাখলে, অর্থাৎ জিজ্ঞেস করলে, তাই নাকি, কবে হল? কেউ সামান্য ভুরু কৌঁচকালে। মুকুব্বিরা বললেন, 'ভালোই হয়েছে, বাচ্চাই অনেক সময় বাপ-মায়ের মাঝে সেতু হয়ে ছুজনােকে এক করে দেয়।'

শুধু বিষুহুড়ার মেম বাঁকা হাসি হেসেছিলেন ।

‘সে হাসির অর্থ বলা শব্দ কারণ এটা ব্যক্ত’—হু জাহাজের মাঝখানে তক্তা পেতে যেমন এ-জাহাজে ও জাহাজে জোড়া লাগানো যায় ঠিক তেমনি ঐ তক্তা তুলে ধাকা মেরে হু-নৌকোর মাঝখানের দূরত্ব বাড়িয়েও দেওয়া যায় ।

পয়লা বাচ্চার বাপ্তিস্ম করার সময় ক্যাথলিকরা ধুমধাড়া ক্লা করে বাঙালী ঠাকুরদার পয়লা নাতির অন্তপ্রাশনের চেয়েও বেশী । মেবল্ কিন্তু সব-কিছু সারতে চেয়েছিল সাদা-মাটাভাবে । ও-রেলি দেখা গেল ঠাকুরদা-গোত্রের । সে চায়, পালা-পরব করতে । ওদিকে পাদ্রী জোনস সাহেব প্রটেস্টান্ট—তিনি ক্যাথলিকের বাচ্চাকে বাপ্তিস্ম করবেন কী করে ? এ যেন পাঁড় বোষ্টমের ছেলেকে শান্ত দিচ্ছে মস্তদীক্ষা—শ্মশানে মড়ার উপর মুখোমুখি বসে মড়ার খুলিতে কারণ-ভর্তি-হাতে । ও-রেলি কিন্তু জোনসকেই অম্মরোধ করলে বাপ্তিস্মের তাবৎ ব্যবস্থা করতে ।

গড্-ফাদার অর্থাৎ ধর্মপিতার অভাব মধুগঞ্জে হত না । মাদামপুরের বড় সায়েব, ডি. এম. যে-কেউ আনন্দের সঙ্গে রাজী হতেন, ‘পুয়োর ডেভিল—বেচারি ! একলা-একলি মনমরা হয়ে থাকে, ঐটুকুতে যদি সে খুশি হয় তবে হোয়াই নট্—নিশ্চয়ই—অফ কোর্স—অবশি, অতি অবশি ।’ কিন্তু ওদিকে দেখা গেল, ও-রেলি পাঁড় ক্যাথলিক । ক্যাথলিক বাচ্চার গড্-ফাদার হবে প্রটেস্টান্ট ! মস্ত যে খুশি পড়াক, বাপ্তিস্ম যে খুশি করুক সে তো পাঁচ মিনিটের ব্যাপার ; কিন্তু ধর্মবাপ তামাম জীবনের । সেখানে প্রটেস্টান্ট হলে চলবে কেন ? কলমা যে খুশি পড়াক, কিন্তু মুরশীদ ধরার সময় দেখে-বেছে নিতে হয় ।

ও-রেলি পরিবার বাদ দিলে মধুগঞ্জে আছে মাত্র একজন ক্যাথলিক—বাটলার জয়সূর্য । ও-রেলিদের মতই একেবারে খাঁটি । ও-রেলি বললে, সেই হবে ধর্মবাপ । শুনে পাদ্রী সায়েব পর্যন্ত অনেক ‘যদি’

অনেক ‘কিন্তু’ অনেক ‘ইউ নো হোয়াট আই মিন’ অনেক ‘বাট অফ কোর্স’ বলে ইতি-উতি করে মূহু আপত্তি জানিয়েছিলেন, এমন কি, কলকাতা থেকে তাঁর পরিচিত ভদ্র ক্যাথলিক আনাবার ব্যবস্থা করে দেবেন বলেছিলেন, কিন্তু ও-রেলি একদম নেই-আঁকড়া,—বলে ধর্মের চোখে সব ক্যাথলিকই বরাবর—পোপ যা, জয়সূর্যও তা ।

ও-রেলির কথার কোনো জমা-খরচ পাওয়া গেল না । বাপ্তিস্মের বেলায় সে দিলদরিয়া—হেরেটিক প্রটেস্ট্যান্টই সই অথচ ধর্মবাপের বেলা সে কটর—ক্যাথলিক না হলে জর্ডনের জল অশুদ্ধ হয়ে যাবে । তখন ‘বিদেশী ঠাকুর ছেড়ে দেশের কুকুর’ । ওদের ভাষায় বলতে হলে ‘মাই রিলিজিয়ন রাইট অব রঙ, মাই মাদার—ড্রাক্ক অর সোবার ।’

হ্যাঁ, ‘ড্রাক্ক অর সোবার’ কথাটা ওঠাতে ভালই হল । জয়সূর্য পৃথিবীর আর পাঁচ লক্ষ বাটলারের মতো অধিকাংশ সময়ই থাকে ড্রাক্ক আর সোবারের মাঝখানে । আর মোকা পেলেই গুত্তা খেয়ে ড্রাক্কের দিকেই কাত । অবশ্য তাকে গড়-ফাদার হতে হবে শুনে তন্মূহূর্তেই বেচারার নেশা কেটে পিয়েছিল । গবেটের মত বিড়বিড় করে কী একটা বলতে গিয়ে খেল ও-রেলির ধমক আর কড়া তর্ক,—অন্তত পরবের দিনটায় যেন সে সাদা চোখে গির্জায় যায় ।

সে এক বিচিত্র বাপ্তিস্ম । মেবল্‌ দ্বন্দ্বের ঘাত-প্রতিঘাতে অল্প অল্প কাঁপছে, ও-রেলি পাথরের পুতুলের মত দাঁড়িয়ে, পাদ্রী সায়েব নার্বাস আর জয়সূর্য তার বরাবরের গির্জের পোশাক পরে বিহ্বলের মত এদিক-ওদিক তাকাচ্ছে । সবাই ভাবলে, ব্যাটা আজ টেনে এসেছে ।

একমাত্র সোমই ঠাণ্ডা মাথায় সবকিছুর তদারক করলে । পাদ্রী-টিলার মেয়েদের বেশীর ভাগই জয়সূর্য জাতের—পরবের উৎকট দিকটা শুধু তাদেরই চোখে ধরা পড়ল না ।

বাপ্তিস্মের পরই কিন্তু গির্জে থেকে বেরিয়ে জয়সূর্য না পান্তা ।

সন্ধ্যার সময় সোম তাকে খুঁজে বের করল উজ্জান গাঙের ঘাটে বাঁধা এক নৌকোর ভিতর। ছ'বোতল ধাত্তেশ্বরী শেষ করে বুঁদ হয়ে বসে আছে।

সব খবরই আণ্ডা-ঘরে পৌঁছল।

বিষ্ণুছড়ার মেম বললেন, 'ডিসগ্রেসফুল !'

মাদামপুর তাঁর অন্তরঙ্গজনকে বললেন, 'খাক ! এবার থেকে ওদের আর একদম ঘেঁটিও না। কাট দেম একদম ডেড। কী যে হল, কী যে হচ্ছে কিছুই বুঝতে পারছি নে।'

দিশী কথায় বলে, ঐ বুঝলেই তো পাগল সারে।

## নয়

মুসলমান শাস্ত্রে বর্ণনা আছে, লাশ গোর দিয়ে লোকজন চলে আসার পর গোরের ভিতর কী কাণ্ড-কারখানা হয়।

কুরানে স্পষ্ট বলা আছে, ইয়াম্-উল্-কিয়ামত—অর্থাৎ প্রলয়ের দিন সবাইকে আল্লাতালার সামনে গিয়ে দাঁড়াতে হবে। তিনি তখন সকলের বিচার করে ধার্মিককে পাঠাবেন স্বর্গে আর পাপীকে নরকে। এখন প্রশ্ন, কিয়ামত কবে হবে তার তো কোনো হদিস পাওয়া যায় না, এই মুহূর্তেই হতে পারে আবার এক কোটি বৎসর পরেও হতে পারে—ততদিন অবধি গোরের ভিতর মরাদের কী গতি হয় ?

কুরান নয়—অন্য শাস্ত্রে বলেন,—গোর দিয়ে আত্মীয়স্বজন চল্লিশ পা চলে আসার পর ছই ফিরিস্তা।—দেবদূত গোরের ভিতর ঢুকে তাকে জিজ্ঞেস করেন, তার ইমান ( ধর্মমত ) কী ? সে যদি খাঁটি মুসলমান হয় তবে তৎক্ষণাৎ বলে ওঠে, 'আল্লা এক, আর মুহম্মদ সাহেব তাঁর প্রেরিত পুরুষ।' ফিরিস্তারা উত্তর শুনে খুশি হয়ে বললেন, তোমার ইমান ঠিক, কিন্তু এখনো তো কিয়ামতের

কিছু দেরি আছে। ততক্ষণ অবধি এই নাও এক গাছা তসবী। আল্লার নাম স্মরণ করো।' তারপর শাস্ত্র বলেন, লোকটি খুশি হয়ে তসবী হাতে নিতেই তার স্মৃত্যুটি ছিঁড়ে গিয়ে তসবীর দানাগুলো কবরময় ছড়িয়ে পড়বে। সে তখন ব্যস্ত হয়ে দানাগুলো কুড়োতে না কুড়োতে দেখবে, কিয়ামতের শিঙে ফুঁকে উঠেছে—ছুটে গিয়ে আল্লার সামনে দাঁড়াবে আর সকলের সঙ্গে সারি বেঁধে।

আর যদি সে পাপাত্মা হয় তবে সে ইমান বলতে পারবে না। ফিরিস্তারা তখন তাকে ধমুরীরা যেমন তুলোর ভিতর যন্ত্র চালিয়ে দেয় ঠিক তেমনি তার সর্বসত্তা ছিন্নভিন্ন করে দেবেন—তুলোর মতো সে বিশ্ব-ব্রহ্মাণ্ডময় ছড়িয়ে পড়বে। আবার সব কটা টুকরো জুড়ে দিয়ে ফিরিস্তারা আবার ঐ প্রক্রিয়া চালাবেন। পাপীর মনে হবে, এ যন্ত্রণা যেন যুগ যুগ ধরে চলছে।

অথচ পুণ্যাত্মা হয়তো মরেছিল কিয়ামতের এক লক্ষ বৎসর পূর্বে ; পাপাত্মা মরেছিল কিয়ামতের এক সেকেণ্ড আগে।

অর্থাৎ পুণ্যাত্মার বেলা আল্লা এক লক্ষ বৎসরকে তার চৈতন্যের ভিতর এক সেকেণ্ডে পরিণত করে দেবেন আর পাপাত্মার বেলা এক সেকেণ্ডকে লক্ষাধিক বৎসরে।

আজকের দিনের ভাষায় তুলনা দিতে বলা যেতে পারে পুণ্যাত্মার বেলা যেন তিন মিনিটের রেকর্ডের গতিবেগ বাড়িয়ে এক সেকেণ্ডে বাজিয়ে দেওয়া হল, পাপাত্মার বেলায় সেই রেকর্ডই বাজানো হল এক ঘণ্টা ধরে।

তাই বোধহয়, হিন্দু পুরাণেও আছে, নরের এক লক্ষ্য বৎসরে ব্রহ্মার এক মুহূর্ত।

কিন্তু এ কি শুধু মৃত্যুর পরই? জীবিত অবস্থায়ও তো ঐ-ই। মিলনের শত বৎসর মনে হয় এক মুহূর্ত, আর 'ক্ষণেক আড়ালে বারেক দাঁড়ালে' মনে হয় 'লাখ লাখ যুগ' ধরে সে যেন কোন্ স্মৃদুরে অস্তহিত হয়ে গিয়েছে।

‘মোতির মালা’ গল্পে তাই দীর্ঘ কুড়ি বৎসরের ছুঃখ-হুঁদৈবের বর্ণনা মোপাসাঁ দিয়েছেন দশ ছত্রে আর মৃত্যুদণ্ডে দণ্ডিত খুনীর তিনদিন মেয়াদের বর্ণনা দিয়েছেন যুগো পুরো একখানা কেতাব লিখে ।

বাপিস্ব-পরবের পর চার বৎসর কেটে গিয়েছে । এ চার বৎসর মেব্ল ডেভিডের কেটেছে তসবীর দানা কুড়োতে কুড়োতে না তুলো-ধুনো হয়ে হয়ে তার খবর দেবে কে ? কাজল-ধারা নদীর মত নিরবধি তাদের জীবনগতি সমুখ পানে ধেয়ে চলেছিল, না সামনের নীলপাথরী পাহাড়ের মত স্থাণু হয়ে পড়েছিল তাই বা বলবে কে ? মধুগঞ্জ শুধু দেখল, যে বারান্দায় সায়েব আর মেম বসে থাকত, বটালার রেকর্ডের পর রেকর্ড বদলে যেত সেখানে একটি চতুর্থ প্রাণী প্রথম দোলনায় শুয়ে তারপর পেরেম্বুলেটারে বসে এবং সর্বশেষে টলমল হয়ে হেঁটে হেঁটে বারান্দাটাকে চঞ্চল করে তুলল । যেখানে আর ছুটি প্রাণী—জয়সূর্যকে ধরলে কখনো বা তিনটি—আপন আপন আসনে ধ্যানমগ্ন সেখানে এই নূতন প্রাণীটির আনাগোনার অস্ত নেই । কখনো সে মেব্লের কোলে মাথাগুঁজে ছুটি খুদে হাত দিয়ে উরু জড়িয়ে ধরে, মেব্ল তার কালো চুলের ভিতর দিয়ে আঙুল চালিয়ে দেয়, কখনো সে ডেভিডের আস্তিন ধরে টানাটানি আরম্ভ করে, তখন সে তার দিকে এক-দৃষ্টিতে তাকিয়ে থাকে । আর কখনো বা জয়সূর্যের গলা জড়িয়ে ধরে তার-ই কাছ থেকে শেখা গান ধরত—

‘ক্-ক্-ক্-কেটি, ছয়েন দি ম্-ম্-মুন শাইনস্—’

একমাত্র ওরই জীবনে এখনো তসবী, ধুমুরী কেউই আসেনি । ‘সময়’ কী বস্তু সে এখনো বোঝেনি—টেকোর ভয় নেই উকুনের ।

বাচ্চা প্যাট্রিকের চতুর্থ জন্মদিনে ও-রেলিরা স্থির করলে, মেব্ল বাচ্চাকে নিয়ে বিলেত চলে যাবে, সেখানে বাসা বেঁধে তার পড়াশোনার ব্যবস্থা করবে । মধুগঞ্জের ইস্কুল দিশীর কাছে অক্সফোর্ড-সম হতে পারে, কিন্তু সায়েবের বাচ্চা যদি সেখানে ‘ট্যাশ উচ্চারণ শেখে তবেই চিন্তির ! বড় হয়ে সে বাপ মাকে প্রতি সন্ধ্যায় অভিসম্পাত না দিয়ে

ছইন্ধি-সোডা স্পর্শ করবে না, সে যে ইয়োরেশিয়ান নয়, সেকথা বোঝাতে গিয়ে গলদঘর্ম হতে হবে, বোঝাবার মোকা না পেলে সেই ঘর্মে ডুবে মরতে হবে ।

টমাস কুক্, অ্যামেরিকান এক্সপ্রেস, আর ছুনিয়ার যত জাহাজ কোম্পানির ছবির বিজ্ঞাপন, চটি বই, জাহাজের টাইম-টেবলে ও-রেলির বারান্দা ভরতি হয়ে গেল । হিন্দীতে বলে :

‘বাঘ কা ভাই বাঘেরা

কুদে পাঁচ তো কুদে তেরা’

‘বাঘ যদি দেয় পাঁচ লক্ষ, তবে তার ভাই বাঘেরা মারে তেরোটা ।’ বাঙলায় প্রবাদ ‘ধরে আনতে বললে বেঁধে আনে ।’ অর্থাৎ যাত্রী যদি কোম্পানিকে লেখে আমি লগুন যাব, তবে তারা যে শুধু ঐ জাহাজেরই খবরওয়ালা চটি বইই পাঠায় তাই নয়, সঙ্গে পাঠায় আরেক হন্দর ‘পথিক-দিক্-দর্শন’—তাতে আছে নরওয়ারের ফিয়োর্ডে যেতে হলে কোন্ জামা-কাপড় অপরিহার্য, মধ্য আফ্রিকায় উট চড়তে হলে আগে-ভাগে ইনকোলেশন নিতে হয় কি না । ফলে সেই পর্বত-প্রমাণ কাগজপত্রের মাঝখানে বিলাতগামী জাহাজের বিশল্যকরণী খুঁজে বের করা হুম্মানের—অর্থাৎ সাধারণ মানুষের কর্ম নয় । ও-রেলি সেই অষ্টাদশ পর্বে উদয়াস্ত ডুব মেরে পড়ে রইল ।

সোম এসেছিল একদিন সরকারী কাজে । কাগজপত্রের ডাঁই দেখে শুধালে, ‘স্মর, গুপ্তিসুদ্ধ নর্থপোলে চললেন নাকি ? এর চেয়ে অল্প দলিল-দস্তাবেজ নিয়ে তো মঙ্গল কিংবা শনিতে ভ্রমণ করে আসা যায় ।’

ও-রেলি এক তাড়া কাগজ সোমের দিকে ছুঁড়ে ফেলে বললে, ‘মঙ্গল-শনির কথা বলতে পারিনে, কিন্তু নর্থপোলে যেতে হলে এ-সবের দরকার হয় না । সেখানে যাবার জন্তে কোনো স্টীমার-সার্ভিস নেই—আস্ত জাহাজ চাটীর করতে হয় । এখানে ঠিক তার উল্টো । কত সব অল্টারনেটিভ দেখো : বোম্বাই থেকে জাহাজ ধরবে, না কলম্ব থেকে কিংবা মাদ্রাজ থেকে ? পি. এণ্ড. ও. নেবে, না মার্কিন জাহাজ.

না জর্মন ? ফরাসীও নিতে পারো—জাহাজগুলো বড় নোংরা, কিন্তু রান্না ভারী চমৎকার। তুমি কি একটা প্রবাদ বলো না, দি ডোম ইজ্ ব্লাইণ্ড ইন দি ব্যাম্বু-জাঙ্গল ? আমার হয়েছে তাই।’

বহুকাল পরে সায়েবের তাজা-দিল দেখে সোম খুশি হল। বললে, ‘তাহলে সায়েব, অত্ ভক্ষ্য ধনুগুণ—ইট্ দি বো স্টিং টুডে—অর্থাৎ সবচেয়ে সস্তা জাহাজ নিলেই হয়।’

ও-রেলি বললে, ‘দেখো সোম, আমাকে আর ধাপ্পা দেবার চেষ্টা করো না। গোড়ার দিকে কিছু জানতুম না বলে তুমি তোমার আপন মাল গুড্ ওল্ড ইণ্ডিয়ান উইজডম্ বলে পাচার করেছ বিস্তর। এখন আর সেটি চলছে না। আমার পন্চা-টাণ্ট্রা, হিটোপুডেস পড়া হয়ে গিয়েছে। ধনুর ছিলে খেতে গিয়ে তোমারই শেয়ালের কী হয়েছিল মনে আছে?’

সোম ইস্কুলের ছেলেদের ভঙ্গীতে তড়াক করে আসন ছেড়ে দাঁড়িয়ে বললে, ‘খুব মনে আছে, স্মর ! ছিলে ছিঁড়ে গিয়েছিল। তা যাবে না ? আপনারাই তো বলেন, ‘ডিম না ভেঙে মমলেট বানানো যায় না।’

ও-রেলি বললে, ‘ডিম দিয়ে মামলেড্, কী করে হয় হে ? মামলেড্ তো হয় কমলালেবুর খোসা দিয়ে।’

‘আজ্ঞে মামলেড্ নয়, মমলেট ?’

‘ও ! অমলেট !’

‘আজ্ঞে না। অমলেট হয় বিলেতে, বিলিতি ডিম দিয়ে। দিশী ডিমে হয় মমলেট। তা যখন মামলেড্ মমলেটের কথাই উঠল, ওসব তৈরি করেন মেয়েরা। জাহাজ বাছাইয়ের ভার মেমসাহেবের হাতে ছেড়ে দিলে হয় না ?’

ও-রেলির মুখ কঠিন হল। সোমের দৃষ্টি এড়াল না।

স্মরসিক যদি বদমেজাজী আর খামখেয়ালী হয়, তবে তাকে নিয়ে বড় বিপদ। যন্ত্র চট করে বেসুরো হয়ে যায় আর তার বিকৃত স্বর সব-কিছু বরবাদ করে দেয়।

ও-রেলির 'ছঃ' বীণাবাদ্যের মাঝখানে প্যাঁচার কণ্ঠের মত শোনাল ।

সোম বুঝলে, কেঁচো খুঁড়তে গিয়ে চোঁড়া বেরিয়েছে । এইখানেই খামা উচিত, না হলে হয়তো কেউটে বেরুবে । কিন্তু হঠাৎ থেমে গিয়ে বিদায় নিলে সেটা হবে আরো বেতলা । একটুখানি ইতি-উতি করে শুধালে, 'আপনি পোর্টে ওদের সী অফ করতে যাচ্ছেন তো ?'

ও-রেলি বললে, 'না ।'

তারপর একটু ভেবে নিয়ে, জিজ্ঞেস না করা সত্ত্বেও বললে, 'বাটলার পৌঁছে দিয়ে সেখান থেকে সে দেশে যাবে । অনেককাল ছুটি নেয়নি বলছিল ।'

কণ্ঠে কিন্তু বিরক্তির সুর ।

সোম না হয়ে আর কোনো নেটিভ হলে ভাবত, এই সাদা-মুখগুলোর মতিগতি বোঝা ভার, কিন্তু সোম মেলা ইংরেজ চড়িয়েছে । সে অত সহজ সমাধানে সন্তুষ্ট নয় । বড় ভারী মন নিয়ে সোম বাড়ি ফিরল । ও-রেলিকে সে সত্যই ভালোবেসে ফেলেছিল ।

‘সোনামুগ সরু চাল সুপারি ও পান

ও হাঁড়িতে ঢাকা আছে ছুই-চারিখান

গুড়ের পাটালি ; কিছু বুনা নারিকেল

ছুই ভাও ভালো রাই-সরিষার তেল—’

এই সব পর্বতপ্রমাণ মালপত্র নিয়ে আমরা সফরে বেরই, আর সায়েবরা কিরকম মাত্র একটা স্টুটকেস হাতে নিয়েই গটমট করে গাড়িতে ওঠে, তাই দেখে বাঙালীর ভারি ঈর্ষা হয় । কিন্তু ঐ স্টুটকেসটির ভিতরকার মালপত্র তৈরি করতে গিয়ে সায়েবদেরও হিমসিম খেতে হয় । মোকামে পৌঁছানোর পর বাঙালী যদি দেখে ধুতির অনর্টন তাহলে সে কারো কাছ থেকে ও জিনিসটি ধার নিয়ে পরতে পায়—এমনকি কুর্তাতেও খুব বেশী আটকায় না—কিন্তু সায়েবরা কোট-পাতলুন ধার নিয়ে পরতে পারে না, ফিট হল কি না সেটা মারাত্মক প্রশ্ন ।

মেব্‌লকে তাই বাচ্চার কাপড়-জামা তৈরি করতে বেশ বেগ পেতে হল। ভূমধ্যসাগর অবধি আবহাওয়া গরম, মধুগঞ্জের জামা-কাপড়েই চলবে। কিন্তু তারপরের জন্ম যে গরম জিনিসের প্রয়োজন, সে তো মধুগঞ্জে পাওয়া যায় না। তাই ফ্লানের, সার্জ, টুইড আনাতে হল শিলঙ থেকে, আর আনাতে হল শহরের বুড়ো খলিফাকে। তাই নিয়ে পড়ে রইল মেব্‌ল দিনের পর দিন, আর ও-রেলি বাস-স্ট্রুটকেস-ছাটকেসে সাঁটতে লাগল জাহাজের লেবেল। যে বাস যাবে কেবিনে তার এক রঙ, যেটা যাবে স্টোররুমে তার অন্য রঙ এবং যেটা হাতে থাকবে তার জন্ম কোনো লেবেলের প্রয়োজন নেই। এই রামধম্মুর রঙের প্যাঁচে ও-রেলি তো একবার মতিচ্ছন্ন হয়ে বাচ্চার পিঠে লেবেল লাগিয়েছিল আর কি।

বিদায়ের আগের সন্ধ্যায় জিনিসপত্র-সব ফিটফাট ছিমছাম হল। পরদিন ভোর ছ'টায় ও-রেলি মোটর হাঁকিয়ে সবাইকে কুড়ি মাইল দূরে স্টেশনে পৌঁছিয়ে দেবে। চাকর-বাকরদের বললে তারা যেন বাড়ি গিয়ে তাড়াতাড়ি শুয়ে পড়ে, কারণ পরদিন ভোরবেলা এসে মালপত্র ওঠাতে তাদের সাহায্যের প্রয়োজন। কম্পাউণ্ডে রইল শুধু বাটলার—অন্য চাকর-বাকরদের সেখানে রাত্রিবাসের কোনো ব্যবস্থা ছিল না।

পরদিন ভোরের দিকে বৃষ্টি হল। চাকর-বাকরেরা কোনো-গতিকে ছ'টায় বাঙলো পৌঁছে দেখে সবাই চলে গিয়েছে—গারাজ খালি, বাড়ি তালাবন্ধ। ও-রেলি সায়েবের সব-কুছ তড়িঘড়ি, ঝটপট, কাঁটায় কাঁটায়। চাকরেরা আন্দাজ করলে সামান্য পাঁচ মিনিট দেরিতে আসার জন্ম তাদের একটুখানি বকুনি খেতে হবে।

সায়েব ফিরল বেশ বেলা গড়িয়ে যাবার পর। আরদালি আসমৎ-উল্লা সায়েবের জন্ম দুখানা কার্টলিস আর আলুসেদ্ধ করে রেখেছিল, কিন্তু সে কিছু না খেয়ে সোজা দোতলায় গিয়ে শুয়ে পড়ল।

সব-কিছু শুনে রায়বাহাছর কাশীশ্বর চক্রবর্তী বললেন, 'আহা, বেচারী, এবারে একদম একা পড়ে গেল।'



তাই আমার গোরের উপর নিচের ছটোর যে-কোনো একটা  
খোদাই করে দিতে পার :

( For a Godly Man's Tomb )

Here lies a piece of Christ ; a star in dust  
A vein of gold ; a china dish that must  
Be used in Heaven, when God shall feast the just.

কিংবা

( For a Wicked Man's Tomb )

Here lies the carcasse of a cursed sinner,  
Doomed to be roasted for the Devil's dinner.

ডেভিড ও-রেলি ।

---

তঁার জুনিয়র জালেবুর রহমান বলেছেন, ‘আমি ভাবছি অস্ত্র কথা । বাচ্চাটা বিলেত গেল বাঘ হয়ে ফিরে আসবার জ্ঞা । তখন লাগাবে নেটিভদের উপর জোর ডাঙা । এ-মুল্লুকে থাকলে তাদের তবে দরদী হয়ে যেত, ছাতির খুন ঠাণ্ডা আর দিলও মোলায়েম মেরে যেত ।’

রায়বাহাছর বললেন, ‘সে কী কথা ! ও-রেলির মত ভদ্রলোকের ছেলে কি কখনো বৈরীভাব নিতে পারে ? কী বলা সোম ?’

সোম বললে, ‘আপনার ছেলের বিলেত যাওয়ার কী হল ?’  
রায়বাহাছর বললেন, ‘জানেন ব্রাহ্মণী ?’

তালেবুর রহমান বললেন, ‘সোম ভাবে সে একটা মস্ত ঘড়েল ।’  
ক্লাবে হল অস্থ প্রতিক্রিয়া । প্রায় সবাই বললে, ‘গেছে গেছে, আপদ গেছে । কেলেঙ্কারিটা তো চাপা পড়ল । এখন ক্লাবের ছেলে ও-রেলি ক্লাবে ফিরে এলেই হয় ।’

কিন্তু আরেকটি বৎসর কেটে গেল । ও-রেলি ক্লাবে এল না ।

## দশ

বাড়ির সামনে জ্যোতিষ্মান এবং অন্ধকারে মানুষের তৃতীয় চক্ষু-স্বরূপ ল্যাম্প-পোস্টটা সম্বন্ধেই যখন সে ছুদিন বাদেই অচেতন হয়ে যায়, তখন অদৃশ্য ও-রেলিকে ক্লাব যে ভুলে যাবে, তাতে আর আশ্চর্য হবার কী আছে ! কিন্তু যোদিন খবর এল ও-রেলি মধুগঞ্জ থেকে বদলি হয়ে গিয়েছে, সেদিন ক্লাবে তার সম্বন্ধে আর-এক প্রস্ত আলোচনা করে নিলে ।

মাদামপুর আর বিষ্ণুছড়াই প্রথম খবর পেলেন ডি এম-এর কাছ থেকে ।

মাদামপুর বললেন, ‘ভালোই হল । যাচ্ছে কক্সবাজার না কোথায়, সেখানে কেলেঙ্কারিটা হয়তো পৌঁছয় নি এবং পৌঁছলেও সেটা বাসি হয়ে গিয়েছে । ওখানে গিয়ে হয়তো পুয়োর ডেভিল

আবার নর্মাল লাইফে ফিরে আসতে পারবে। আমি সত্যি তাকে  
বড্ড মিস করতুম।’

বিষ্ণুছড়া চুপ করে রইলেন, ভালো মন্দ কিছু বললেন না।

মাদামপুর শুধালেন, ‘কী হে, চুপ করে রইলে যে? হুইস্কি  
চড়েছে নাকি?’

বিষ্ণুছড়া বললেন, ‘সাতটা ছোটায়? আই লাইক ছাট—আপনিও  
যেমন!’ তারপর মাথা ঝাঁকুনি দিয়ে খাড়া হয়ে বসে বললেন, ‘আমি  
সে কথা ভাবছিনে। আমার কানে এসে সেদিন পৌঁছিল, মেব্লরা  
নাকি আদপেই ইংলণ্ড পৌঁছয় নি।’

মাদামপুর বললেন, ‘আমিও শুনেছি, কিন্তু তারা পৌঁছিল কি না  
তার খবর দেবে কে? মেব্লের সঙ্গে ক্লাবের কারো তো এমন দহরম-  
মহরম ছিল না যে, বন্দর বন্দর থেকে পিকচার-পোস্ট-কার্ড পাঠাবে  
আর লগুন পৌঁছে কেবল। মোকামে পৌঁছে প্রতি মেলে স্কার্ফ,  
সুয়েটার আর গরম মোজা, প্যার স্কটিশ উলে তৈরী! হোম মেড!’

বিষ্ণুছড়া বুঝলেন, সায়েবের একটু চড়েছে—বয়স রয়েছে কি না,  
অল্লেই একটু কেমন যেন হয়ে যান—না হলে স্কার্ফ, সুয়েটারের কথা  
বলবেন কেন? ও বস্ত্র মধুগঞ্জে পরবে কে? সাদা চোখে এ ভুলটা  
করতেন না, হয়তো বলতেন টিনের বেকন, সার্ভিন। চেপে গিয়ে  
বললেন, ‘কলকাতার ও শী-র সঙ্গে নর্থ ক্লাবে দেখা হয়েছিল, সে  
বললে, মেব্ল আর তার বাচ্চাকে সে মাস তিনেক আগে দেখেছে  
মসুরিতে, সঙ্গে ছিল ও-রেলি। তোমার মনে আছে কি না জানিনে,  
ও-রেলি তখন ছুটি নিয়ে মসুরি গিয়েছিল।’

এবারে মাদামপুর হা হা করে হেসে উঠলেন, ‘কে বলেছে? ও শী?  
কটা মেব্ল আর কটা ডেভিড্ দেখেছিল জিজ্ঞেস করো নি? ও তো  
সকালে খায় কড়া হর্স-নেক, দুপুরে জিন, সন্ধ্যায় রুম্ আর রাত্রে হুইস্কি।  
সন্ধ্যায় দেখে থাকলে নিশ্চয়ই ছুটো, আর রাত্রে দেখে থাকলে চারটে  
ও-রেলি দেখেছে। কটা মসুরি দেখেছে সেকথা জিজ্ঞেস করেছিলে কি?’

বিষ্ণুছড়া বুঝলেন, এখন আর কথা-কাটাকাটি করে কোনো লাভ নেই। তাই বললেন, 'সোমও বলছিল মেব্লরা লগুনে আছে।'

মাদামপুর আশ্চর্য হয়ে শুধালেন, 'সোম বললে? আশ্চর্য! ও তো কখনো কোনো খবর কাউকে দেয় না। মধুগঞ্জের বানান জিজ্ঞেস করলে ভাবখানা করে যেন সরকারী টপ সিক্রেট। আমি তাকে একদিন বলেছিলুম, 'ফাইন ওয়েদার, সোম।' মুখখানা করলে যেন আলীপুরের আবহাওয়া দফতর থেকে রিপোর্ট না এলে সে ঐ একস্ট্রিমলি কনফিডিয়েনশেল খবর কনফার্ম করতে প্রস্তুত নয়। তাই বলছি সোম যখন বলেছে তখন ওটা বাইবেল-বাক্য।'

কিন্তু বিষ্ণুছড়ারই ভুল। হঠাৎ চেয়ারখানা তার কাছে টেনে এনে মাদামপুর একটুখানি সামনের দিকে ঝুঁকি নিচু গলায় অত্যন্ত সাদা গলায় গম্ভীরভাবে বললেন, 'ফোখায় আছে, কোখায় নেই, ওসব খোঁচাখুঁচি করতে গেলে আবার সেই ধামাচাপা ডাট্টি লিনেন বেরিয়ে পড়বে। তাতে হইয়োরে পীয়ন কমিউনিটির কী লাভ? বরঞ্চ ক্ষতিরই সম্ভাবনা। নো নিউজই যদি হয়, তবে জান তো প্রবাদ, 'নো নিউজ ইজ গুড নিউজ।'

বিষ্ণুছড়া অভয় পেয়ে বললেন, 'বিশেষ করে সামের কথাই পাকি খবর। কিন্তু ও-রেলিকে একটা বিদায়ভোগ দিতে হবে না! ক্লাবে আসুক আর না-ই আসুক, চাঁদা তো ঠিক ঠিক দিয়ে গিয়েছে, এমন কি টেনিসের একস্ট্রাও চ্যারিটি-ফ্যারিটির পয়সাও কামাই দেয় নি।'

মাদামপুর বললেন, 'সাইগু করে দেখতে পার। কিন্তু আসবে কি।'

এ সম্বন্ধে মাদামপুর এবং বিষ্ণুছড়ার মনে সন্দেহ জাগা কিছুমাত্র অস্বাভাবিক নয়। কিন্তু ও-রেলি আসতে রাজী হল। তবে ইঙ্গিত করলে যে, ডিনারের বদলে মামুলী টি-পার্টি হলেই ভালো হয়। ক্লাব রাজী হল।

ক্লাবের প্রায় সবাই সেদিন হাজিরা দিলেন। ও-রেলি সঙ্গে নিয়ে

এল তার বঁদলী সমারসেট ডীনকে । চটপটে ছোকরা, সমস্তক্ষণ কথা কয় আর এক সিগারেট থেকে আরেক সিগারেট ধরিয়ে দেশলাইয়ের খর্চা বাঁচায় । ও-রেলি ডীনকে ক্লাবের সঙ্গে সাড়ম্বর পরিচয় করিয়ে নিয়ে বললে, 'হাঁনি স্কটলাণ্ড ইয়ার্ড থেকে খাশ তালিম নিয়ে তৈরি হয়ে এদেশে এসেছেন, মধুগঞ্জ ঐর সেবায় উপকৃত হবে ।'

গুজোব রটাতে ফিসফাস-গুজগাজ করতে ইংরেজ এবং বাঙালীতে কোনো তফাৎ নেই, কিন্তু যাকে নিয়ে এ-সব করা হয়, তাকে সোজাসুজি প্রশ্ন করাটা ইংরেজের অভ্যাস নয় এবং এটিকেটের খেলাফ । তাই মেব্লু সম্বন্ধে ও-রেলিকে মুখের উপর কেউ কোনো প্রশ্ন শুধালে না । একেবারে কোনো প্রকারের অনুসন্ধান না করাটা আবার মুর্খবিবদের পক্ষে ভালো দেখায় না । তাই বুড়ো মাদামপুর ও ডি.এম. শ্রেণীর দু-একজন ও-রেলির পারবারের খবর নিলেন কোনো প্রকারের প্রশ্ন জিজ্ঞেস না করে, অর্থাৎ শুদ্ধু আশা প্রকাশ করলেন, মেব্লুরা বিলেতে ভালো আছে নিশ্চয়ই । ও-রেলি ঘাড় নেড়ে মায় দিলে ।

মোটের উপর পাটিতে কোনোরকমের অস্বস্তি কিংবা আড়ষ্টতার ভাব দেখা গেল না । ও-রেলি ঘুরে ঘুরে সকলের সঙ্গে কথা কইলে । বাংলাদেশে তখন স্বদেশী আন্দোলন প্রায় সব শহরেই ছোট-বড় দ'য়ের সৃষ্টি করেছে—কথাবার্তা হল সেই সম্বন্ধেই বেশী । ও-রেলি আইরিশম্যান, তাই সে বুঝিয়ে বললে, এ-সব আন্দোলন নির্মূল করা পুলিশের কর্ম নয়, বিলেতের পার্লামেন্ট যদি সময়োপযোগী ব্যবস্থা অবলম্বন না করেন, তবে সম্ভ্রাসবাদ বাড়বে বৈ কমবে না । অবশু তার অর্থ এই নয়, পুলিশ হাত পা গুটিয়ে বসে বসে বিড়ি ফুঁকবে—সে তার কর্তব্য করে যাবে, তবে তারও একটা সীমা আছে ।

মাদামপুর এ বাবদে কট্টর । কিন্তু ও-রেলি তার বক্তব্য এমনভাবে গুছিয়ে বললে যে, তিনি পৰ্ব্বন্ত বাগান ফেরার সময় বিষ্ণুছাঁড়াকে বললেন, 'পিটি, ছোঁড়াটার পারিবারিক জীবন সুখের হল না । ওকে

কিন্তু দোষ দিয়ে লাভ নেই। হোঁড়ার মাথাটা ঘাড়ের সঙ্গে ঠিকমত  
ছু করাই আছে। আমি সত্যই প্রার্থনা করি, ও যেন জীবনে সুখী হয়।’

বিষ্ণুছড়াও সায় দিয়ে বললেন, ‘হোয়াই নট। ইট ইজ নেভার  
টু লেট টু বিগিন্ এগেন্।’

মীরপুরের মেম দরদী রমণী। তিনি ও-রেলিকে একবার এক  
লহমার তরে একলা পেয়ে তার ডান হাত চেপে বলেছিলেন,  
‘ও-রেলি, তুমি আমার ছেলের বয়সী তাই তোমাকে বলি, জীবনটা  
একেবারে ছবছ জিগশো ধাঁধার মতো—প্রথমবারেই সব কটা  
মেলাতে না পারলে নিরাশ হবার মতো কিছু নেই। তোমার উপর  
আমার আশীর্বাদ রইল।’

ও-রেলি স্পষ্টই বিচলিত হয়েছিল। আধো-আধো ধন্যবাদ দিয়ে  
তাড়াতাড়ি সেখান থেকে কেটে পড়েছিল।

পার্টি শেষ হতেই ও-রেলি নিয়ে গেল ডীনকে তার বাঙলোয়।  
ডিনার খেয়ে ও-রেলি তার ডেরা তুলে মোটরে যাবে স্টেশন, আর  
ডীন খাটাতে তার বাঙলোতে আপন ডেরা। চাকরি-জগতে সরকারী  
বাসা সম্বন্ধে এ-ই হচ্ছে এদেশে আইন—অবশ্য সাদা কালিতে লেখা।

ডীন সবেমাত্র বিলেত থেকে এসেছে, তার উপর সে বকর-বকর  
করতে ভালোবাসে—এককালে ও-রেলিও গালগল্প জমাতে কিছুমাত্র  
কম ওস্তাদ ছিল না—কাজেই সে একটানা গল্প বলে যেতে লাগল।  
ও-রেলিরও ব্যবস্থাটা মনঃপূত হল, তাই যদি বা ডীন ছ-একবার  
জড়তার খাতিরে তাকে কথা বলবার চেষ্টা করলে সে তাতে সাড়া  
না দিয়ে ঊলটে ছ-একটা প্রশ্ন জিজ্ঞেস করে তাকে আবার  
বকর-বকর করাতে তাতিয়ে দিলে।

ও-রেলির মালপত্র মোটরে তোলা হয়ে গিয়েছে—এখন তার  
ওঠবার সময় হল দেখে ডীন শুধালে, ‘এখানে ভালো করে কাজ চালাবার  
ছন্দ আপনি কোন টিপ্‌স্ দেবেন কি? আমার তাতে উপকার হবে।’

ও-রেলি বললে, ‘সে কথা যে আমি ভাবি নি তা নয় এবং দেবার

মতো টিপ্‌স্‌ থাকলে আমি অনেক আগেই এ প্রস্তাব পাড়তুম—'

ডীন বললে, 'সরি, আমি বড্ড বেশি কথা বলি,—না ?'

ও-রেলি বললে, 'নটেটোল । চূপ করে অগ্নের কথা শুনলেই অপর পক্ষকে বেশি চেনা যায় তা নয় । অনেক সময় নিজে কথা বলে অগ্নের উপর কী প্রতিক্রিয়া হয়—তার মাথা নাড়াতে, হাঁ না বলাতে, কোন্‌ প্রসঙ্গে সে ইন্‌টেরেস্ট নিচ্ছে, কোন্‌টাতে নিচ্ছে না—তাই দিয়ে মানুষ চেনা যায় অনেক বেশি । তার উপর সমস্তক্ষণ কথা বললে অল্প পক্ষ কোনো প্রশ্ন শুধাবার সুযোগ পায় না—যে প্রস্তাব তোমার ইচ্ছে নেই, সেটা বেশ এড়িয়ে যাওয়া যায় । মধুগঞ্জ লোক্যাল বোর্ড চেয়ারম্যান এ ব্যাপারে চ্যাম্পিয়ন । আপ্রয় কথা শুঁবার সম্ভাবনা দেখলেই তিনি পাখি শিকার, ৯০ সালের ভূমিকম্প, আর গিরের কিত্তে না ইঞ্চির কিত্তে ভালো, এ-সব নিয়ে এমন গল্প জোতেন যে, তাঁর ঘর থেকে বেরনোই মুশকিল হয়ে ওঠে ।'

'সে কথা যাক আমি মাত্র একটা টিপ্‌ দেব । আপনার আপসের সোম—তার সঙ্গে তো আপনার আলাপ হয়েছে—বড় খাঁটি আর বুদ্ধিমান লোক । আপনি তো স্কটল্যান্ড ইয়ার্ড থেকে অনেক নূতন পদ্ধতি শিখে এসেছেন, সেগুলোর কটা এখানে কাজে খাটবে জানিনে, তবে একথা আপনাকে বলতে পারি সোম যেখানে ফেল মারে, সেখানে করার মতো বড় কিছু একটা থাকে না । অস্তুত আমি কিছু পারি নি ।'

ডীন একটুখানি অবিশ্বাসের সুরে বললে, 'দেখে তো কিন্তু বুদ্ধ বলে মনে হয় ।'

ও-রেলি হেসে বললে, 'প্রিসাইসলি ! ঐ তার একটা মস্ত রেস্ট । কিন্তু এদেশে অল্‌ ছাট্‌ স্টিন্‌ক্‌স ইঞ্জ নট্‌ রট্‌ন্‌ ফিশ্—ঝলঝল করলেই সোনা নয় হচ্ছে তার উণ্টো প্রবাদ । বর্মাতে একরকম ফল আছে, তার গন্ধ পচা নর্দমার মতো ; কিন্তু একবার সে ফল যে খেয়েছে, তার ঐ ফলের জন্তু নেশা হয় আফিমের চেয়েও বেশী । সোম ঐ বর্মী-ফল ।'

‘তাহলে গুড-নাইট

‘গুড-নাইট ।’

### এগারো

‘স্বীষ্টালয় থেকে সত্যাগত’—‘ফ্রেশ ফ্রম ক্রিষ্টিয়ান হোম’-ওলাদের এদেশে এসে বায়নাঙ্কার অন্ত থাকে না । এটা নেই, ওটা চাই, সেটা কোথায়—সুবো-শাম লেগেই আছে । তবু যত বড় উন্নাসিকই হোক না কেন, পুলিশ সায়েবের বাঙলোটি কিছুমাত্র ফেলনা নয় ।

ডিনার খেয়ে ছুজুনাই এসে বসেছিল চণ্ডা বারান্দায় । বস্তুত ঐ বারান্দাটাই বাড়ির সবচেয়ে আরামের জায়গা । ও-রেলি চলে যাওয়ার পর ডীন বেয়ারাকে দিয়ে সিগারেটের তাজা টিন খুলে আরাম করে গা এলিয়ে বসল । লগুন ছেড়েছে অবধি জাহাজে ট্রেনে সর্বত্র হৈ-হুল্লোড়ের ভিতর দিয়ে তার সময় কেটেছে, ছ-দণ্ড নিজের মনে নূতন নূতন অভিজ্ঞতার জমা-খরচ মিলিয়ে নিতে পারে নি—অথচ গুণীরাই জানেন যারা কথা কয় বিস্তর তারাই নির্জনতা খোঁজে শাস্ত্রজনের চেয়ে বেশী ।

পেট্রোমাক্স জ্বলছে । তার আলো বারান্দার বাইরের অন্ধকার কিন্তু ফুটো করতে পারছে না । ওদিকে আবার বর্ষার গুমোট । আকাশ খমখম করছে । গাছগুলো অন্ধকারের সঙ্গে মিশে গিয়ে গা ঢাকা দিয়েছে । সিগারেটের ধোঁয়া পর্যন্ত ডাইনে-বঁয়ে, উপর-নিচে কোনো দিকে যেতে চায় না । এ অবস্থায় মুখের ধোঁয়া দিয়ে খাশা রিং বানানো যায় । মুখ থেকে বেরিয়েই রিংগুলো একটার পিছনে আরেকটা সারি বেঁধে অনেকক্ষণ ধরে দাঁড়িয়ে থাকে । তখন সিগারেট খেকোরা আর সিগারেটের নেশা করে না—রিঙের নেশায় পিলপিল করে চক্করের পর চক্কর বের করতে থাকে ।

ব্যাচেলাররা দেরিতে শুতে যায়, এ-কথা সবাই জানে, আর তামাকখোররা যায় আরো দেরিতে । ‘আরেকটা খেয়েই উঠছি’,

‘আরেকটা খেয়েই উঠব’ করে করে ঘুমে আর সিগারেটে যখন লড়াই বেশ জমে ওঠে তখন অনেক সময় রেক্সর লড়াইয়ে ক্লান্ত দিয়ে ঘুমের শরণ নেয়, সিগারেটও চটে গিয়ে কার্পেট পোড়ায়।

ডীনের চোখ ঘুমে জড়িয়ে এসেছে, ডান হাত চেয়ারের হাত থেকে খসে বুলে পড়ছে, ডিলে আঙুল থেকে সিগারেটটা খসিখসি করছে, এমন সময়—

এমন সময় ডীন দেখে তিনটি প্রাণী—মূর্তি—কী বলি?—বেড-রুম থেকে বেরিয়ে সিঁড়ি দিয়ে নিচের তলায় নেমে গেল। সে বসে ছিল বারান্দার এক প্রান্তে, বেড-রুম অল্প প্রান্তে—সিঁড়ি তার-ই গা ঘেঁষে।

ডীনের চোখে কাঁচা ঘুমের ছানি। তার ভিতর দিয়ে সবকিছু যেন আবছা আবছা, যেন কুয়াশার ভিতর দিয়ে দেখা দিল, কিংবা যেন সিনেমার পর্দাতে ডিলে ফোকাসের ছবি।

• তিনটি মূর্তির বৈশিষ্ট্য লক্ষ্য করার পূর্বেই তারা সিঁড়ি দিয়ে নিচে নেমে গিয়েছে। ডীন শুধু দেখলে প্রথমটি দৈর্ঘ্যে মাঝারি, দ্বিতীয়টি ছোট এবং তৃতীয়টি বেশ লম্বা—বাস আর কিছূ না।

সম্মুখে ফিরে ডীন ছুটে সিঁড়ি দিয়ে নামল। চতুর্দিকে ঘোরঘুটি অন্ধকার, নিচের তলায় ছাতা-ল্যাম্প বেয়ারা অনেকক্ষণ হল নিবিসে দিয়েছে, উপরের তলায় আলো সেখানে পৌঁছয় না। ডীন সস্ত বিলেত থেকে এসেছে—মফঃস্বলে টর্চের কী প্রয়োজন এখনো জানতে পারে নি। তার টর্চ নেই। ছুটে গেল গেটের কাছে; সেখানে ঘাস্তার ক্ষীণ আলোতে দেখলে, চতুর্দিকে জনমানবশূণ্য।

সাপ, চোর, শেয়াল দেখলে আমরা চীৎকার করে চাকর-বাকরদের ডাকি, কারণ আপন দেহ রক্ষার জন্ত এদের উপর আমরা নির্ভর করেছি যুগ-যুগ ধরে। বিলেতের লোক কাজকর্ম চালাচ্ছেন বিন্ চাকরে বহুকাল ধরে। তাই সম্মুখে ফিরেও ডীন টেঁচামেচি আরস্ত করলে না। ধীরে ধীরে বারান্দায় ফিরে আবার চেয়ারে বসল।

আকাশ-কুমুম কেউ কখনো দেখে নি—সে শুদ্ধ কল্পনামাত্র; স্বপ্ন

আমরা দেখি, কিন্তু তার পিছনে কোনো বাস্তবতা নেই ; রজু দেখে যখন সর্প ভ্রম হয় তখন সে সর্প বাস্তব নয় বটে, কিন্তু ভ্রম কেটে যাবার পরও রজুটিকে ধরতে-ছুঁতে পাই। ডীন যা দেখল সেটা এর কোনো পর্যায়েই পড়ে না। তাহলে কি সে বাস্তব জিনিস প্রত্যেক করল ? তাই বা কী করে ? বেড-রুমে থাকার কথা নয়—ডিনার শেষ হওয়ার পর চাকররা চলে গিয়েছিল, ও-রেলি যাওয়ার পর চাকররা চলে গিয়েছিল, ও-রেলি যাওয়ার পর উপরের তলায় তো সে একেবারে একা বসে ছিল। তবে কি ওরা মেথরের দরজা দিয়ে বাথ-রুম বেড-রুম হয়ে বারান্দায় বেরিয়ে এল ? ডীন চেক্-আপ করে দেখলে মেথরের দরজা ডবল লক্টে বন্ধ।

তবে কি মগপান ? অসম্ভব। খেয়েছে মাত্র ছোট্ট ছ পেগ—তাও ডিনারের আগে। ছ পেগে বঙ্গ-সন্তানেরই চিন্তা-চাঞ্চল্য হর না—ও দিয়ে তো ইংরেজ কপালে তিলক কাটে।

ছোটোছোটো আর উত্তেজনায় ডীনের ঘুম ততক্ষণে ক্ষীণ নয়—লীন হয়ে গিয়েছে। বিছানায় ছটফট না করার চেয়ে বরঞ্চ চেয়ারে বসে প্রতীক্ষা করাই ভালো, যারা গেছে তারা ফিরে আসে কি না। পুলিশের লোক—প্রথম সন্থিতে ফেরা মাত্রই সে ঘড়ি দেখে নিয়েছিল। এরা বেরিয়েছিল ১২টা ৩০ এবং ৩৫-এর মাঝামাঝি। যদি তারা নিতান্তই ফেরে তবে তো ফিরবে ভোরের আলো ফোটার আগেই। লীন পিস্তলটা স্ট্রোকেশ থেকে বের করে পেগ-টেবিলের উপর রেখে সিঁড়ির দিকে তাকিয়ে রইল।

ঘণ্টা চারেক সিগারেট পোড়ানোর পর লুপ্ত ঘুম ফিরে এল কিন্তু যাদের জন্ম এত অপেক্ষা তারা আর এল না।

সকালবেলা বেয়ারা বেড-টী এনে দেখে সায়েব চেয়ারের উপরে বেঘোরে ঘুমে কাতর। শেষ সিগারেট হাত থেকে পড়ে গিয়ে পেগ-টেবিলের বার্নিশ পুড়িয়ে দিয়েছে।

আরো একটু ক্ষতি হল ডীনের। সেদিনই আঙাঘরের বেয়ারা-

মহলে রটে গেল, নূতন সাহেব বোতল-বাসী-পিয়সী। কেউ প্রশ্ন পর্বস্ত  
করল না, স্নে-বেয়ারা চা এনেছিল সে বোতল খালি পেয়েছিল না ভর্তি।

সকাল হতে না হতেই ভিজিটারদের ঠালা। তাদের সঙ্গে  
লৌকিকতা করতে করতে ডীন ভাবছে আগের রাত্রে কথ।  
দিনের আলো প্রথর হওয়ার সঙ্গে সঙ্গে ডীনের কাছে রাত্রে  
প্রহেলিকা হাসির বিষয় হয়ে দাঁড়াল। স্বপ্নের ঘোরে কিংবা ঘুমের  
জড়তায় কী দেখতে কী দেখেছে তাই নিয়ে সে ছুটোছুটি করলে—  
ইস্তেক পিস্তল বের করলে! কী আশ্চর্য! এদেশে একটানা  
বিশ বছর কাটানোর পর অসহ্য গরম আর সুদীর্ঘ বর্ষার ঠালায়  
ইংরেজদের মাথায় ছিট জন্মায়—দেশে ফিরে গিয়ে তার ধকল কাটায়  
পুডিং দিয়ে থানা আরম্ভ করে আর সূপ দিয়ে শেষ করে। তাদেরই  
একজন, ডীনের এক মামাকে নিয়ে সে কতই না ঠাট্টা-মশকরা  
করেছে, আর বেচারী মামা কিছু না বলতে পেরে শুধু হম-হম  
করেছে। আর তার নিজের সেই অবস্থা এই প্রথম রাত্রেই। পিস্তল  
গুঁচায় স্বপ্নের পেট ফুটো করতে? তার হল কী?

এমন সময় সোম এসে খবর দিলে, কাল রাত্রে তের-সতীতে  
জলে ডাকাতির খবর এসেছে। বোধ হয় গোটা তিনেক খুনও  
হয়েছে। সে অকুস্থানে যাচ্ছে।

ইংরেজের বাচ্চা নিজেকে এতক্ষণে সংযত করতে শিখেছে।  
কোনো চাঞ্চল্য না দেখিয়ে শুধালেন রাত কটায় কাণ্ডটা ঘটেছে? কী  
জানি, ঠিক বলা যাচ্ছে না, ছপুর কিংবা শেষ রাতে।

সোম চলে গেল।

‘টু হেল’—অর্থাৎ চুলোয় যাগগে বলে ডীন মবুগঞ্জের ম্যাপ মেলে  
গেজেটিয়র খুলে পড়তে বসল।

কিন্তু চুলোয় যাগগে এললেই যদি সব আপদ চুলোয় যেত তাহলে  
গোটা পৃথিবীটাকেই হামেহাল নরককুণ্ডের মতো জ্বালিয়ে রাখতে

হত । সন্ধ্যা হতে না হতেই দিনের বেলায় হেসে উড়িয়ে-দেওয়া আপদ  
 ডীনের মনের ভিতর ‘কিন্তু কিন্তু’ করে ইতি-উতি করতে লাগল । ডিনারে  
 বসে মনে হল কাল রাত্রে ঘটনা স্বপ্ন নয়, মায়া নয়, মতিভ্রমও  
 নয়—ইংরিজিতে ভাবতে গেলে ইলুশন, ডিলুশন হ্যালুসিনেশন কিছুই  
 নয় । প্রেসটিডিজিটেশনও নয় কারণ ঐ রাত সাড়ে চব্বিশটার সময়  
 তাকে ম্যাজিক দেখিয়ে বোকা বানাতে যাবে কোন্ ভাঁড় ?

বাগানের আম-জাম-লিচুর অন্ধকার ক্রমেই যেন বারান্দার দিকে  
 গুড়িগুড়ি এগিয়ে আসছে । প্রতিপদ আকাশের মেঘময় অন্ধকারও  
 নেবে আসছে নিচের দিকে, ছুই অন্ধকারের ভিতর কী যেন গোপন  
 যোগ-সাজস রয়েছে । সেই নিরেট জমে-ওঠা অন্ধকারের ভিতর দিয়ে  
 গাছপালার মধ্যে সূক্ষ্ম—অতি সূক্ষ্ম—ছিদ্র করে কাজলধারার উপর  
 দিয়ে বেয়ে যাওয়া নৌকার ক্ষীণ প্রদীপের আলোক মাঝে মাঝে  
 এসে পৌঁছচ্ছে বাঙলোর দিকে । কিন্তু সে আলোক চোখে পড়ে ঐ  
 দিকে অনেকক্ষণ ধরে এক দৃষ্টিতে তাকিয়ে থাকলে । সে আলো  
 তখন যেন চোথকে আরো কানা করে দেয়—চতুর্দিকের অন্ধকার যে  
 কতখানি পুঞ্জীভূত নীরন্ধ তখনই ঠিক ঠিক বোঝা যায় ।

অন্ধকারে মানুষ যেমন নিজেকে সাহস দেবার জন্ম শিস দেয়,  
 পেট্রোমাল্গটাও ঠিক তেমনি মুহূ একটানা শাঁ—শব্দ করে যাচ্ছে আর  
 ভয়ে মরছে হঠাৎ কখন অজানাতে অন্ধকার তার লম্বা আঙুল দিয়ে  
 বাতির চাঁবিতে দম দিয়ে তার দম বন্ধ করে দেবে ।

ডীন চাকর-বাকরকে বিদেয় দিয়ে পিস্তল কোলে নিয়ে বসেছে  
 সিঁড়ির দিকে মুখ করে । টিপয়ের উপর রিস্টওয়াচ ।

রাত ঘনিয়ে এল । আগের রাত্রে ভোরের দিকে চোথের ছ  
 পাতা জুড়েছিল মাত্র কয়েক মিনিটের জন্ম, দিন কেটেছে নানা  
 কাজের ঠেলায় এখন বারে বারে ঘুম পাচ্ছিল, কিন্তু আজ তো  
 সর্বচৈতন্য কোলম্যান মাস্টার্ডের মতো তীক্ষ্ণ সজাগ রাখতে হবে ।  
 সে আজ আর্দো মদ খায় নি, জাস্ট টু বি অন ১০০% সেক সাইড ।

ঘড়িতে বারোটা বেজেছে। ডীন ভাবলে, এবারে আরো সজাগ হতে হবে। রুমালটা ভিজিয়ে এনে চোখে বোলাবার জন্ত এদিক ওদিক খুঁজছে এমন সময় হঠাৎ দেখে সেই ত্রিমূর্তি বারান্দা পেরিয়ে সিঁড়ি দিয়ে নেমে যাচ্ছে। ডীন মন স্থির করে রেখেছিল দেখামাত্র পিস্তল হাতে ছুটে গিয়ে ওদের ঠােকাবে কিন্তু কাজের বেলায় এক মুহূর্ত দেরি হয়ে গেল—ছুটে গিয়ে যখন নিচের বারান্দায় নামল তখন ত্রিমূর্তি বাগানের বড় জামগাছটার কাছে হাওয়া হয়ে গিয়েছে। ঘড়িতে দেখে তখনো বারোটা—অর্থাৎ সকালে দম দেওয়া হয় নি।

এবারে ডীন ছুটোছুটি করলে না। মাই গড বলে চাপরাশীর টুলে বসে পড়ল—ভীষণ বিপাকে না পড়লে ইংরেজ ‘মাই গড’ বলে না। অনেকক্ষণ পর সে বেড-রুমে ঢুকল। ক্লাস্তিতে নিজ্রাজাগরণে মেশা আশ্বস্তির ভিতর দিয়ে কাটল।

সকালবেলা সোম এল। তিনটে নয়, ছুটো খুন।

সেদিকে খেয়াল না করে ডীন শুধালেন, ‘সোম, এ বাড়ি ভূতুড়ে ?’  
সোম বললে, ‘জানি নে স্তর।’

‘তুমি ভূত মান ?’

‘নো, স্তর।’

‘তাহলে এ বাড়ি কিংবা বে কোনো ভূতুড়ে হয় কী করে ?’

‘জানি নে স্তর।’

ডীন বলতে যাচ্ছিল, ‘তুমি একটা গবেট, আর তোমার প্যারা বস্ একটা আস্ত গাড়ল—না হলে তোমাকে শার্লক হোমসের মতো ঠাওরালে কেন ? ঠিকই তো, বোকাকে বুদ্ধিমান মনে করা, এ যেন গাধা দেখে বলা এটা ঘোড়া। যে এ কথা বলে সে শুধু গাধা চেনে তা নয়, ঘোড়াও চেনে না।

তারপর ডীন আরো পাকাপাকিভাবে আটঘাট বেঁধে ত্রিমূর্তির জন্ত ত্রিরাত্রি অপেক্ষা করল, কিন্তু তাকে নিরাশ হতে হল।

সপ্তাহের শেষে আই জি-কে রিপোর্ট লেখার সময় ডীন এ ব্যাপারটা

সম্বন্ধে লিখব-কি-লিখব-না করে করে কী করে যে লিখে ফেললে নিজেই বুঝতে পারলে না। ভাবলে ওটা কেটে ফেলি—সে বিলক্ষণ জ্ঞানত, ইংরেজ এ সব কেছা নিয়ে নির্মম হাসাহাসি করে—কিন্তু তাহলে আবার নূতন করে রিপোর্ট লিখতে হয়, আর লেখালেখির ব্যাপারেই পুলিশ বাবাজীরা হামেশাই একটুখানি কাহিল।

যাগকে বলে শেষটায় পয়লা পাঠই পাঠিয়ে দিলে।

তিন দিন বাদে উত্তর এল। তার শেষ ছত্র, 'ডিক্স লেস স্পিরিট'।

ডীন খাপ্লা হয়ে বললে, 'ড্যাম দি স্পিরিট।'

## বারো

প্রথম বিশ্বযুদ্ধ জয় করে ইংরেজ সগর্বে তার ইতিহাস রচনা করেছে। যুদ্ধে হেরে জর্মন তার সলজ্জ ইতিহাস লিখেছে। ছুটোর কোনোটা থেকেই প্রকৃত সত্য জানবার উপায় নেই। তাই মনে হয়, ইংরেজের ইতিহাসটা যদি জর্মন লিখিত এবং জর্মনেরটা ইংরেজ তাহলেও হয়তো খানিকটে সত্যের কাছে যাবার উপায় থাকত। কিংবা যদি ভারতবাসী লিখিত—কারণ সে যে এ বাবদে অনেকখানি নিরপেক্ষ সে কথা অস্বীকার করা যায় না।

তাই চা-বাগানের আশেপাশের, বিশেষ করে মধুগঞ্জের লোক বিলক্ষণ জানে ইংরেজ তার শৌর্ধবীর্ষ নিয়ে যতই লক্ষ্য রাখুক না কেন চা-বাগিচার সায়েবদের ভিতর লেগে গিয়েছিল ধুকুমার। তার ইতিহাস লেখা হয় নি, কোনো কালে হবেও না।

হাতিম-তাই না সিন্দবাদ কোন্ এক দেশে গিয়েছিলেন যেখানে মানুষ প্রাকৃতিক নিয়মে বড়ো হয়ে কিংবা অসুখ-বিসুখ করে মরে না। প্রতি সন্ধ্যায় সবাই এক জায়গায় ম্লান মুখে বসে কিসের যেন অপেক্ষা করে, আর হঠাৎ এক গম্ভীর ডাক শুনে ওদের একজন লাফ দিয়ে উঠে

দূর দিগন্তে পালিয়ে যায়, কেউ তার পিছু নেয় না, সে-ও আর কোনো দিন ফিরে আসে না ।

চা-বাগিচার বড় মেজো ছোট বেবাক সায়েব রোজ সন্ধ্যায় ক্লাবে বসে প্রতীক্ষা করেন, লড়াইয়ে যাবার জন্ম বিলেত থেকে কোন দিন কার ডাক পড়ে । এবং কাজের বেলা দেখা গেল হাতিম-তাই-এর গল্পের লোকগুলোর মত ঐরা পত্রপাঠ বিলেতের দিকে ছুট দেন না— ঐদের অনেকেই আছেন ডাক এড়াবার তালে । সিভিল সার্জেন ইংরেজ তার উপর কট্টর সাম্রাজ্যবাদী, সার্টিফিকেট পাওয়া অসম্ভব, কাজেই এদের উর্বর মস্তিষ্ক তখন লেগে যায় নূতন নূতন ফন্দি ফিকিরের অনুসন্ধানে । এক ভীতু তো সাহস করে বাঁ হাতের কজ্জীতে গুলী মেরে সেটাকে জখম করে লড়াই এড়ালে । মাদামপুর বিফুছড়া নিজেদের ভিতর লজ্জায় মাথা হেঁট করলেন ।

তঁারই মাঝখানে কে যেন খবর এনে দিল ও-রেলি লড়ায়ে যাবার জন্ম নিজের থেকে প্রস্তাব পেড়েছিল, কিন্তু ভারত সরকার রংকটের অসুবিধা হবে বলে তাকে যেতে দিল না, কারণ সে ইতিমধ্যেই জনপঞ্চাশেক বাঙালী ছোকরাকে রিক্রুট করেছে এবং তার ভিতর গোটা পাঁচেক টেরোরিস্টও আছে ।

ও-রেলি সম্বন্ধে আর সব কথা ক্লাব এক মুহূর্তেই ভুলে গিয়ে এক বাক্যে বললে, শাবাশ ।

পুলিসের ক্লাবে আই. জি. এসেছিলেন মধুগঞ্জ টুরে । ক্লাবে বসে ও-রেলির উচ্ছ্বসিত প্রশাস্ত শব্দে নিজের ডিপার্টমেন্টের প্রতি গর্ব অনুভব করলেন । তার সম্বন্ধে দু-একটি কথা বলতে না বলতেই ক্লাবের নয়া-বুনা সব সদস্য দফে দফে তার গুণকীর্তন করলেন, এবং বিফুছড়ার ছোট মেমই বিগলিতাশ্রু হলেন সবচেয়ে বেশী ।

ক্লাব ভাঙল অনেক রাত্রে, পরদিন কাইজারের খড়ের মূর্তি পোড়াবার সুব্যবস্থা করে । বেয়ারারা তাই নিয়ে নিজেদের ভিতর হাসাহাসি করলে । সায়েবদের বড়কাট্টাই যে কী বেহদ বেশরম

ফঙ্গাবেনে সে-কথা তারা লড়াই লাগাবার কয়েক মাস পরেই টের পেয়ে গিয়েছিল। ওদিকে আবার তাদের যে-সব ভাই-বোনেরা মাত জন্মে কখনো লড়াই দেখে নি তারা যেতে আরম্ভ করল ইরাকে। ভাই নিয়ে পূব বাঙলায় গান পৰ্বন্ত রচনা হয়ে গেল। সেপাই ফিরে এসেছে মৈসপট থেকে দেশে ; বউ জিজ্ঞেস করছে,

মিয়া, গেছলায় যে বসরায়,

দেখছনি দালান ?

ছোট ছোট সেপাইগুলি লাল কুঁতি গায়

হাঁটু পানিৎ ল্যামা তারা

পিস্তত মারাৎ যায়—

মিয়া গেছলায় যে বসরায়, মিয়া গে— (সোম) !

এ গীতে তবু বরঞ্চ গ্রাম্য মেয়ের সরলতা আর কল্পনাশক্তির খানিকটা বিকাশ পেয়েছে, কিন্তু সায়েবদের ছেলেমানুষি কত চরমে পৌছে গিয়েছে তার প্রমাণ বেয়ারাগুলো পেল যেদিন মধুগঞ্জের পাগলা চৌঁচিয়ে গান ধরলে,

মরি, রাই, রাই, রাই,

জর্মনিরে ধরে এনে,

হার্মনি বাজাই !

এ গানের না আছে মাথা না আছে কাঁথা—পাগলা জগাইয়ের ‘গানে’ কখনো থাকতও না—অথচ সায়েবরা গান শুনে ভাবলেন জগাই জর্মনির কান খুব করে মলে দিচ্ছে। পাগলাকে ডেকে এনে ক্লাবে তার ‘নৃত্যসম্বলিত’ গান শোনা হল, প্রচুর বকশিশ দেওয়া হল, এবং তাকে একটা মেডেল দেওয়া যায় কিনা সে সম্বন্ধে আনোচনা হল।

‘বাঙাল’ গাছে ফলে না, ‘বাঙালে’র চাষ পূব-বাঙলার একচেটে নয়, তাই সায়েবদের ‘বাঙালপনা’ দেখে বাঙাল বেয়ারাগুলো হাসলে জোর একপেট আর পাগলা জগাইকে খেতাব দিলে ‘জঙ্গীলাট’।

রাত্রে আই. জি'র নিমন্ত্রণ ছিল ভীনের বাংলায় ।

সূপ শেষ হতে না হতেই ডি এম-এর বাংলা থেকে জরুরী খবর এল 'স্বদেশী'দের আড্ডায় বোমা ফেটে হুজ্জন মারা গিয়েছে—ভীন যেন তড়িঘড়ি ঘটনাস্থলে পৌঁছয় । ভীন তাদের অভিসম্পাত দিতে দিতে খানা ছেড়ে উর্দি চড়ালে ।

আই. জি. বাঙাল ভাষা বেশ শিখে গিয়েছিলেন । একা একা খানা খাওয়ার একঘেয়েমি কাটাবার জন্ত বাটলাদের সঙ্গে গল্প জুড়ে দিলেন । এককালে বড়লোকদের যদি শখ হত ছোট লোকদের সঙ্গে গল্প করার তবে তাঁরা ডেকে পাঠাতেন চন্দ্রবৈঠকে—মুখ-চন্দ্রটিকে বিচক্ষণ বৈঠকের মতো থাকসুরত করে তোলার সঙ্গে সঙ্গে নাপিত হুজুরকে ছুনিয়ার নানা খবর নানা গুজব শুনিয়ে ওকিবহাল করে তুলত । বিলেতে এখনো ও কর্মটি করে বাটলার এবং খানদানি সায়েবদের যাঁরাই দেশী ভাষা শিখতে সক্ষম হয়েছেন তাঁরাই এ-দেশে সেই রেওয়াজটি চালু রেখেছেন ।

সায়েবের মতির গতি ধরতে পেরে খয়রুল্লা আলোচনা আরম্ভ করলে জিনিসপত্রের দাম বেড়ে যাওয়া নিয়ে—সায়েব সায় দিলেন, তারপর ভরসা দিলেন লড়াই শিগগিরই খতম হয়ে যাবে—সায়েব শুধু 'হুঁ' বললেন—খয়রুল্লা কথার মোড় ফিরিয়ে বললে, দিশী লোক বসরা থেকে বেশ ছু পয়সা বাড়িতে পাঠাচ্ছে—সায়েব আনন্দ-প্রকাশ করলেন ।

খানার শেষ পদ ছিল পনিরে রান্না আস্ত আগুা । বহুকাল ধরে বিলেত থেকে পনির আসছে না বলে বড় সায়েব তাই নিস্বে প্রশংসা ও বিশ্বয় প্রকাশ করলেন । খয়রুল্লা দেমাক করে জানালে এ পনির বিলেতি নয়, এ জিনিস তৈরি হয় মৈমনসিংহের অষ্টগ্রামে । বিদেশী পনির যখন এ-দেশে পাওয়া যেত সেই আমলেই ও-রোল সায়েবের মেম দিশী পনিরের সন্ধান পেয়ে তাই দিয়ে এই নূতন সেভারি আবিষ্কার করেন । খয়রুল্লার মতে তাঁর মতো পাকা রাঁধুনি এদেশের

কখনো আসে নি। সে তখন জয়শূৰ্ণের মেট—তার কাছ থেকে সে এ জিনিসটে বানাতে শিখেছে।

বড় সায়েব জানতেন মিসেস ও-রেলি বিলেতে। তবু কথার পিঠে কথা বলার জ্ঞান আপন মনেই যেন শুধালেন, 'তা মেম সায়েব তো এখন বিলেতে?'

খয়রুল্লা একটুখানি চুপ করে থেকে বললে, 'বোধ হয় তাই। তবে সঠিক কেউ বলতে পারে না। মীরপুর বাগিচার বেয়ারা বলছিল তিনি মসুরি না সিমলে কোথায় যেন।'

এবারে সায়েব একটুখানি আশ্চর্য হলেন। বললেন, 'সে কী, হে? এই সামান্য খবরটাও সঠিক জান না?'

খয়রুল্লার দিলে চোট লাগল। পুলিশ সায়েবের বেয়ারা হিসেবে জাতভাইদের ভিতর তার খুশ-নাম ছিল যে, সে ছনিয়ার সকলের নাড়ীনক্ষত্র জানে, তাকে কি না সায়েব পষ্ট ইঙ্গিতে জানিয়ে দিলেন সে একটা আস্ত উজ্বুক, ছনিয়ার কোনো খবর রাখে না। তার চেয়ে যদি তিনি তাকে খবর দিতেন যে সে এদিকে জানে না, ওদিকে কিন্তু তার বিবি বিধবা হয়ে গিয়েছেন, তা হলেও তার কলিজা এতখানি ঘায়েল হত না। তাই ইজ্জত বাঁচাবার জ্ঞান বললে, 'সঠিক খবর তো দিতে পারেন শুধু ও-রেলি সায়েবই। তা, তিনি তো কারো সঙ্গে কখনো কথা বলেন না, তাঁকে শুধাতে যাবে কে?'

বড় সায়েব খানদানী ঘরের ছেলে। সায়েব-মেমদের নিয়ে চাকর-নফরের সঙ্গে তিনি কথাবার্তা বলতে চান না; আলোচনাটা ওদিকে মোড় নিচ্ছে দেখে বললেন, 'ঠিক বলেছ।'

খয়রুল্লাও পেটে আঙ্কেল ধরে। সায়েব যদি বা কথার মোড় ফেরালেন সে তাঁর সামনে খাড়া করে দিলে একখানা নিরেট পাঁচিল।

বললে, সে বহু মেহন্নত করে ক্লাব থেকে কিঞ্চিৎ উত্তম কফি ষোগাড় করে এনেছে, পারকুলেটরে সেটা চড়িয়ে রেখেছে, সায়েব যদি একটু মর্জি করেন ?

ডিনার শেষ হলে পর খয়রুল্লা বললে, সে সায়েবকে সার্কিট হাউসে পৌঁছিয়ে দেবার জন্তু নিচের তলায় অপেক্ষা করবে। কফিলিকার-সিগার তিনটিই উত্তম শ্রেণীর ছিল বলে সায়েব তদগোঁই ডেরা ভাঙবার কোনো প্রয়োজন বোধ করলেন না। জানালেন, তিনি একাই সার্কিট হাউস যেতে পারবেন।

রাত একটার সময় ডীন ফিরে এল। বড় সায়েবকে নিতান্ত একা-একা ডিনার খেতে হল বলে আবার দুঃখ প্রকাশ করলে।

বড় সায়েব সোজাসুজি জিজ্ঞেস করলেন, 'মিসেস ও-রেলি এখন কোথায় তুমি জান ?'

ডীন হেসে বললে, 'কেন ? আপনিও কিছু শুনেছেন নাকি ?'

'না, তো। আমি শুনেছি, তিনি বিলেত না মসুরিতে সে-কথা কেউ জানে না। আমার কাছে একটু আশ্চর্য ঠেকল।'

ডীন বললে, 'ঠেকারই কথা। কিন্তু এ নিয়ে কারো কোনো কৌতূহল নেই। এর পিছনে আবার একটুখানি কেলেকারি কেছা রয়েছে। মেবল্ এখান থেকে সরে পড়াতে কেছাটা প্রায় সবাই ভুলে গিয়েছে।'

তারপর ডীন ক্লাবে যা-কিছু শুনেছিল সে কথা তাঁকে সংক্ষেপে জানিয়ে বললে, 'পাছে আমি ব্যাপারটার গুরুত্ব না বুঝতে পেরে এলোপাতাড়ি প্রশ্ন জিজ্ঞেস করি, তাই মাদামপুরের সায়েব—এ অঞ্চলে তিনিই মুরুবি—আমাকে এখানে আসার দিনই সমস্ত কথা খুলে বলে ইঙ্গিত করেন যে, এ ব্যাপার নিয়ে নাড়াচাড়া করে কোনো লাভ নেই, ক্ষতিরই সম্ভাবনা। আমিও তাঁকে বলেছি, বাদার অফিসারের ফ্যামিলি অ্যাক্‌গেয়ারে আমি কনসার্নড নই।'

বড় সায়েব বললেন, 'ঠিক বলেছ !'

আরো পাঁচ রকমের কথা হল—বিশেষ করে লড়াই নিয়ে জল্পনা-কল্পনা। দুজনেই ইয়কশারের লোক, কাজেই দুজনারই পরিচিত অনেক লোকের প্রমোশন, জখম, বাহাছরি, মৃত্যু নিয়ে অনেক

মুখ-ছুখ প্রকাশ করা হল।

রাত প্রায় একটার সময় বড় সায়েব শেষ ফ্রেম ছাড়া খেয়ে উঠলেন। সিঁড়ি দিয়ে নামতে নামতে হঠাৎ বললেন, 'কই হে, তোমার ত্রিমূর্তির সঙ্গে আলাপ করিয়ে দিলে না?'

ডীন যেন শুমতে পায় নি এমনভাবে বললেন, 'আপনি বাগদাদের কাজীর গল্প জানেন?'

বেমক্লা হঠাৎ কাজীর গল্প কেন উপস্থিত হল তার হৃদয় না পেয়ে বড় সায়েব বললেন, 'না তো।'

ডীন বললে, 'মুর্গা খেতে খেতে কাজী বাবুর্চীকে শুধালেন, মুর্গার আরেকটা ঠ্যাং কোথায়? বাবুর্চী বললে, মুর্গাটার ছিল মাত্র একটা ঠ্যাং। কাজী বললেন, একঠ্যাঙী মুর্গা কেউ কখনো দেখে নি। বাবুর্চী বললে, বিস্তর হয়, সে দেখিয়ে দেবে। তারপর শীতকালে এক দিন আঙিনায় একটা মুর্গা এক ঠ্যাং পালকের ভিতর গুঁজে দাঁড়িয়ে ছিল—বাবুর্চী কাজীকে দেখিয়ে দিলে একঠ্যাঙী মুর্গা। কাজী দিলেন জোর হাততালি। মুর্গা ছসরা ঠ্যাং বের করে ছুটে পালাল। কাজী বললেন, ঐ তো ছসরা ঠ্যাং। বাবুর্চী বললে, সোঁদিন খাওয়ার সময় তিনি হাততালি দিলে ছসরা ঠ্যাং-ও বেরোত।'

বড় সায়েব বললেন, 'উত্তম গল্প কিন্তু—'

ডীন বললে, 'এতে আবার কিন্তু কী? আপনি আমাকে উপদেশ দিয়েছিলেন কম হুইস্কি খেতে—ত্রিমূর্তি হুইস্কির চোখে দেখেছিলুম কি না! আপনি যদি আচ্ছা করে আজ হুইস্কি খেতেন, তবে তার-ই 'হাততালিতে' ত্রিমূর্তি বেরিয়ে আসতো।'

অঞ্চ সায়েব খেয়েছিল পাঁচটা 'ব্রা'—বড়া।

মনে মনে ভাবলেন, 'ছোকরা তুখোড়।' বাইরে হেসে বললেন, 'আচ্ছা, আসছে বারে না হয়, ম্যাকবেথের তিন ডাইনির স্বরণে তিন বোতল খেয়ে ত্রিমূর্তিকে ইনভোক করা যাবে।'

ডীন বললে—'খাইস ওখ—তিন সত্যি।'

## ভেরো

লড়াইয়ের ঙ্গ টাকা তোলার মতলবে ইংরেজ নানা ফন্দি-ফকির চালালে—তারই একটা ‘আওয়ার ডে,’ পূব বাঙলার এই প্রথম ফ্যাগ ডে । নেটিভরা বিক্রপ করে ‘আওয়ার ডে’-কে নাম দিলে ‘আওয়ার দে’ অর্থাৎ ‘আরো দে’ । ওদিকে ভারতবাসীদের কাছ থেকে এ দুঃসংবাদ আর লুকিয়ে রাখা যাচ্ছিল না যে, ইংরেজ ক্রমাগতই লড়াই হারছে । চতুর্দিকের অভাব অনটনের সঙ্গে সঙ্গে ইংরেজের গৌরবও কমে যাওয়াতে পূব বাঙলায় আরম্ভ হল বাজার লুট । ইংরেজ ভয় পেয়ে গেল যে, একবার যদি এ অরাজকতা ছাড়িয়ে পড়ে, তবে সেটা ঠেকানো সম্পূর্ণ অসম্ভব হয়ে দাঁড়াবে ।

দেখা গেল, ও-রেলির এলাকায় কোনো বাজার লুট হয় নি । আই. জি. গেলেন ঐ এলাকা পরিদর্শন করতে আর ও-রেলির কাছ থেকে সলা-পরামর্শ নিতে ।

ও-রেলির বাঙলোয় বসে আলাপচারি করতে করতে সন্ধ্যা হয়ে গেল দেখে সে সায়েবকে ‘পট্টলোক্’ খেয়ে যেতে বললে ।

খেতে বসে সুখ-দুঃখের আলাপ আরম্ভ হল । বড় সায়েবের পরিবারও বিলেতে, তাই নিয়ে তাঁর দুর্শ্চস্তার অবধি নেই, তবে সামান্য এই যে, তাঁর স্ত্রী লড়াইয়ের কাজে যোগ দিয়েছেন আর বড় মেয়ে তো নার্স হয়ে ফ্রান্সে গিয়েছে ।

দীর্ঘনিশ্বাস ফেলে সায়েব বললেন, ‘লড়াইয়ে যে শুধু মানুষ জখম হয় আর মরে সেইটেই তো শেষ কথা নয়, কত পরিবার যে লওভও হয়ে যায় তার কি কোনো স্টাটিস্টিকস্ কেউ নেয় ? তোমার বউ-বাচ্চা কী রকম আছে ?’

‘ভালোই ।’

‘চাঠপত্র ঠিকমতো পাচ্ছ তো ?’

‘হুঁ । তারপর বলল, ‘ও-সব কথা বাদ দিন । আমি আমার মনকে আদপেই বিলেতমুখে হতে দিইনে । যতটা পারি কাজকর্মে ডুব মেরে থাকি ।’

বড় সায়েব বললেন, ‘সরি ! কিছু মনে কোরো না, ও-রেলি । আমি পরের পারিবারিক সুখ-দুঃখের কথা সচরাচর জিজ্ঞেস করিনে ; নিজের দুশ্চিন্তারই আমার অবসান নেই ।’

ও-রেলি চুপ করে রইলো ।

মাস দুই পর সায়েব ডীনকে চিঠি লিখলেন,

‘প্রিয় ডীন,

আমি বড় সমস্যায় পড়ে তোমাকে চিঠি লিখছি । প্রায় ছমাস হল আমি রাধাপুর মফঃস্বল যাই । সেখানকার অবস্থা খুব সন্তোষজনক সে খবর তুমি জান—তার জন্ম ও-রেলিকেই আন্তরিক ধন্যবাদ জানাতে হয়, সে কথাও তোমার অজানা নয় । দেশে যে সে শান্তিরক্ষা করতে পেরেছে, সেইটেই সবচেয়ে বড় কথা নয়, আমি মুগ্ধ হয়েছি অল্প কারণে ।

ভারতবর্ষে একদিন আমাদের প্রাধান্য আর থাকবে না, এ জিনিসটা আমার কল্পনার বাইরে নয়, কিন্তু আমরা জর্মনির কাছে পরাজিত হব এবং ফলে আমরা জর্মনি ছনদের তাঁবেতে আসতে পারি, এ জিনিসটার কল্পনাও আমি করতে পারিনে । এ-লড়াই জেতার জন্ত ভারতে শান্তি গোঁণ—মুখ্য, ভারতকে এই যুদ্ধে আমাদের হয়ে লড়ানো । ও-রেলি এ-কাজটি তার এলাকায় অবিধ্বাস্যরূপে সমাধান করতে সক্ষম হয়েছে । তার কার্ষপন্থা ও সরলতা দেখে আমি মুগ্ধ হয়েছি ।

তাই আমাদের সকলের কর্তব্য তাকে সর্বপ্রকারে সাহায্য করা ।

গতবার যখন তার সঙ্গে দেখা হয়, তখন পরিবারের কথা উঠেছিল । আমার প্রশ্নের সামান্যতম উত্তর না দিয়ে সে আমার

দিকে যে ভাবে তাকালে তাতে আমার মনে হল, এই বিষয় নিয়ে তার মনের কোণে এক গভীর বেদনা লুকনো আছে। আমার মনে হল, তার সম্বন্ধে আমরা যে-সব গুজব শুনেছি, সেগুলোর কিছুটা তার কানে পৌঁছেছে এবং গুজবের বিরুদ্ধে লড়াই অসম্ভব জেনে চুপ করে সব অপবাদ সয়ে নিয়েছে।

হয়তো এটা বিচক্ষণের কর্ন। কিন্তু আমার মনে হল, এ বিষয়ে আমাদেরও কর্তব্যবোধ থাকা দরকার। যে মানুষ তার সম্বন্ধে জঘন্য অপবাদ সহ করেও আপন দেশের জন্ত অগ্নানমুখে অবিশ্রাম খেটে যাচ্ছে—এবং খাটছে কাদের জন্ত? যারা তার বিরুদ্ধে গুজব রটিয়েছে তাদেরই জন্ত—তার মনের জ্বালা লাঘব করার জন্ত যদি আমরা আমাদের কড়ে আঙুলটিও না তুলি তবে, আমরা যে মুন খেয়েছি তার উপযুক্ত নই। আর যদি আমাদের প্রক্ষেপনের কথা তুলি তবে বলব, 'তুমি আমি পুলিশ; অসৎকে মাজা দেওয়া যেমন আমাদের কর্তব্য, সজ্জনকে অশ্রায় আক্রমণ থেকে রক্ষা করা আমাদের ততোধিক কর্তব্য,—ভারতীয় পুলিশ এ কথা ভুলে গিয়েছে।

আমি তাই স্থির করলুম, ও-রেলিকে না জানিয়ে তার স্ত্রীর অনুসন্ধান করে সত্য খবর মধুগঞ্জের ইয়োরোপীয় সমাজকে গোচর করাব। এবং তারপরও কারো বিষ-জিভ যদি লকলকানি আরম্ভ করে, তবে ব্রাস্কেলটাকে মধুগঞ্জের ক্লাবহাউসের সিঁড়িতে চাবকে দেব।

মেবল্ এবং তার বাচ্চা কোন মাসে বিলেত গিয়েছিল সে খবর বের করে আমি বোম্বাই, মাদ্রাজ, কলকাতা, কলম্বো এমন কি চাটগাঁর বন্দরের সব প্যাসেঞ্জার লিস্ট তন্ন তন্ন অনুসন্ধান করেও তাদের নাম পেলুম না।

ও-রেলিকে মস্তুরিতে নাকি মেবল্দের সঙ্গে দেখা গিয়েছিল—সব কটা ইউরোপীয় হোটেলে অনুসন্ধান করেও ওদের নাম পাওয়া গেল না, অথচ ও-রেলির নাম সাভয় হোটেলের রেজিস্ট্রিতে রয়েছে।

ভারতবর্ষের হিল-স্টেশনে কোনো ইউরোপীয় রমণীর পক্ষে নাম ঠাড়িয়ে বেশী দিন কাটানো প্রায় অসম্ভব, ছদ্মনামে ছদ্ম পাসপোর্ট নিয়ে বিলেতে যাওয়া সম্পূর্ণ অসম্ভব ।

সব দিক যখন ব্র্যাক্‌ বেরল তখন আমি মেবল্‌দের বাটলারটার অনুসন্ধান করলুম সিংহলে তার গ্রামে । খবর এল সাত বৎসর ধরে সে গ্রামে ফেরে নি ।

তাই আমি বড় সমস্যায় পড়েছি ।

তুমি কি মধুগঞ্জে অত্যন্ত সাবধানে এ সম্পর্কে অনুসন্ধান করে কোন্ পথে এগোতে হবে, সে সম্বন্ধে কিছু হৃদিস দিতে পার ?

মনে রেখো, আমি এ যাবৎ সব অনুসন্ধান করেছি অতিশয় গোপনে, এবং বেশির ভাগ নিজে নিজেই—পাছে ও-রেলি খবর পেয়ে মর্মান্বিত হয় যে, আমিও মধুগঞ্জের বক্সওয়ালাদের\* মতো কুচুটে । তুমিও সাবধানে কাজ করবে । আমাদের উদ্দেশ্য ও-রেলিকে মিথ্যা অপবাদ থেকে মুক্ত করা । সে-কর্মে সফলতা নাও পেতে পারি, কিন্তু তাকে আরো ছুঃখ দেওয়া অত্যন্ত গর্হিত হবে ।

শুভেচ্ছাসহ

ডাড্‌নি ।'

ঠিক সাতদিন পর বড় সায়েব ডীনের কাছ থেকে একখানি ছোট চিঠি পেলেন ।

'যতদূর সম্ভব শীঘ্র এখানে আসুন ; সব আলোচনা মুখোমুখি হওয়ার প্রয়োজন ।'

বড় সায়েব খবর দিয়ে মধুগঞ্জে পৌঁছলেন । মোটরেই জিজ্ঞেস করলেন, 'ব্যাপারটা কী ?' ডীন উত্তর না দিয়ে শুধু ড্রাইভারের দিকে আঙুল দেখালেন ।

---

\* 'টা-চেন্ট বা চায়ের বাক্স নিয়ে কারবার করে বলে চা-বাগিচার সায়েবদের অবজ্ঞার্থ অগ্র ইংরেজ নাম দিয়েছে 'বক্সওয়ালা' । হিন্দী 'ওয়ালা' প্রত্যয় ব্যবহার করার অর্থ যে তারা 'হাক্ক-নেটিভ' ।

রাত্রে ডিনারের পর চাকরদের বিদায় দিয়ে ডীন বড় সায়েবকে তার স্টোর-রুমের তালা খুলে ভিতরে নিয়ে গেল।

সায়েব দেখলেন, টুকরো টুকরো হাড়ে জোড়া তিনটি কঙ্কাল। একটা বড়ো, একটা মাঝারি আরেকটা ছোট্ট শিশুর।

তালা বন্ধ করে ছুজনে ফিরে এলেন। বড় সায়েব একটা নির্জলা বড় হুইস্ক থেয়ে জিজ্ঞেস করলেন,

‘কোথায় পেলেন?’

‘বাগানে লিচুগাছের তলা খুঁড়ে।’

‘কী করে সন্দেহ হল?’

ডীন খানিকক্ষণ চুপ করে থেকে বললে, আপনার চিঠি থেকে আমি দৃঢ় সিদ্ধান্তে পৌছই যে, মেবল্দের কোথাও খুঁজে পাওয়া যাবে না। তাই আমি অবিশ্বাস্ত্র জিনিসে বিশ্বাস করে আপন অনুসন্ধান আরম্ভ করলুম—বরঞ্চ বলতে পারেন শেষ করলুম।

এ বাঙলোয় প্রথম দু রাত্রে আমি যে ত্রিমূর্তি দেখেছিলুম, সেগুলো আমার মন থেকে কখনো মুছে যায় নি। যে গাছতলায় ছায়ামূর্তিগুলো হঠাৎ মিলিয়ে যায়, সে গাছটাকেও আমি স্পষ্ট মনে রেখেছিলুম। আপনার সব তল্লাসীই যখন নিষ্ফল হল, তখন আমি যে কাজ করলুম সেটা শুনলে স্কটল্যান্ড ইয়ার্ডে আমার গুরুরা হাসবেন। কিন্তু যে জিনিস আমি স্পষ্ট দেখেছি, যার সম্বন্ধে আমার মনে কোনো দ্বিধা নেই, সে জিনিস স্কটল্যান্ড ইয়ার্ডের কাছে—আপনার কাছে—যতই অবিশ্বাস্ত্র হোক না কেন, আমার কাছে তা-ই বিশ্বাস্ত্র, সে-ই আমার থেই।

জায়গাটা খোঁড়ার আরেকটা কারণ : যদি কিছু না পাই, তবে আমি সমস্ত ব্যাপারটা সম্বন্ধে নিশ্চিত হতে পারব।’

বড় সায়েব দু হাতে মাথা চেপে ধরে রইলেন অনেকক্ষণ ধরে।

ডীন সায়েবকে আরেকটা পেগ দিলেন।

সায়েব শুধালেন, ‘তোমার কী মনে হয়?’

ডীন কোনো উত্তর দিলে না, প্রশ্নটা যেন সে শুনতেই পায় নি।

এবারে সায়েব মাথা ঝাঁকুনি দিয়ে উঠে দাঁড়ালেন। বললেন, 'এ কাজ যদি ও-রেলির হয়, তবে বলব, যথেষ্ট শ্রাস্ত কারণ না থাকলে তার দ্বারা এটা কখনো সম্ভবপর হত না।'

ডীনও উঠে দাঁড়াল। বললে, 'খোঁড়াখুঁড়ি করার আমার তৃতীয় কারণ সেইখানেই। আপনার শেষ সিদ্ধান্ত যদি ও-রেলির সপক্ষে যায়, তবে এই কঙ্কালগুলো নিয়ে আপনি যা ভালো মনে করেন তাই করতে পারবেন। এটা তো আপনার কেস।'

বড় সায়েব বললেন, 'মাই কেস! ও গড।'

বড় সায়েব পরদিন রাধাপুর গিয়ে সোজা উঠলেন ও-রেলির বাঙলোয়। কোনো ভূমিকা না দিয়েই বললেন, 'ও-রেলি মদগঞ্জ তোমার বাঙলোর বাগান খুঁড়ে তিনটি কঙ্কাল পাওয়া গিয়েছে। এ সম্বন্ধে তোমার কিছু বলবার আছে কি? কিন্তু পূর্বে তোমাকে আমি সাবধান করে দিচ্ছি—তুমিও জান—'

সায়েব বাক্য শেষ করলেন।

ও-রেলি তখন একটু শুকনো হেসে বললে, 'আমাকে কিছু সাবধান করতে হবে না। এই নিন।' বলে সে কোটের ভিতর বৃকের পকেট থেকে একতাড়া কাগজ বের করে সায়েবের হাত দিলে।

## চোদ্দ

প্রিয় সোম,

এ চিঠিটা তোমাকে লিখছি ; এ চিঠিটা বিশ্বসংসারের যে কোনো লোককে লেখা যেত । তবু তোমাকেই কেন লিখছি তার কারণ তুমি আমাকে হৃদয় আর মন দিয়ে যে রকম বুঝতে চেষ্টা করছে এ রকমটা আর কেউ কখনো করে নি—না এদেশে না আমার আপন দেশে—এক মেবল্ ছাড়া । ‘হৃদয় আর মন’ দিয়ে বলবার সময় আমি ইচ্ছে করেই ‘হৃদয়’ আগে ব্যবহার করেছি ; তার কারণ আমি আইরিশম্যান, আমি ইংরেজ নই । আমি আমার পাঁচটা জাতভাইয়ের মতো হৃদয় দিয়ে ভাবি, আর মন দিয়ে অনুভব করি । ইংরেজ তার মনকে হৃদয়ের আগে স্থান দেয় এবং বহু ইংরেজের আদপেই হৃদয় আছে কি না তাই নিয়ে আমার মনে সন্দেহ আছে । কিন্তু থাক, এ-সব সস্তা পাইকারি হিসেবে কোনো জাত কিংবা দেশ সম্বন্ধে রায় প্রকাশ । শুধু শেষ একটা কথা বলি, বাঙালীর সঙ্গে এ বাবদে আইরিশম্যানের অনেকখানি মিল আছে । জানিনে, তোমার কাছে খবর পৌঁছেছে কি না, আলিপুরের মামলায় যারা হাজতে ছিল তাদের প্রতি দয়া দেখিয়ে এক আইরিশ ডাক্তারকে এদেশের ইংরেজ কর্তাদের কাছে হুমকি খেতে হয়েছে । এই আইরিশ ডাক্তারের সঙ্গে আমার এবং তোমার হৃদয়ের মিল রয়েছে । দেশে আমার জাতভাইরা ইংরেজের বিরুদ্ধে লড়াই স্বাধীনতার জন্ত । তাদের জন্ত আমার হৃদয়ে যথেষ্ট দরদ । ওদিকে ইংরেজ আমাকে যে দায়িত্ব দিয়েছে সেটাকেও অস্বীকার করতে পারিনে । তোমার বেলাও তাই, অরবিন্দ-কোম্পানির প্রতি তোমার সহানুভূতি ; ওদিকে যে ইংরেজ রাজতন্ত্র এ দেশে প্রচলিত তার সদৃশ-গুলো তোমার চোখ এড়ায় না । আইরিশ ডাক্তার, তোমার এবং আমার, আমাদের সকলের ভিতর একই হৃদয় ।

সাধারণ লোক এ ক্ষেত্রে বলে, 'তাহলে চাকরি ছেড়ে দিলেই পার !'

এর সহস্র বছর যখন আমি আপন মনে খুঁজছি তখন তোমার মুকুট—  
যাকে প্রথম দর্শনে মনে হয়, আস্ত একটা গড-ড্যাম ফুল—কাশীধর  
চক্রবর্তীকে এক পুরস্কার-সভার বক্তৃতাতে অল্প কথা প্রসঙ্গে বলতে  
শুনলুম, 'সত্য-মিথ্যার দ্বন্দ্ব সংসারে তো চিরকালই লেগে থাকবে ; তাই  
কি আমরা সবাই সংসার ত্যাগ করে বনবাসে চলে যাই ? আর যদি  
যাই-ও, তাতেই বা কী ? সেখানে কি দ্বন্দ্ব নেই ?'

কথায় কথায় কোথায় এসে পড়লুম ! কিন্তু তোমার স্মরণ আছে,  
সোম, আমি যখন প্রথম এদেশে আসি তখন কী রকম মারাত্মক বাচাল  
ছিলুম । তুমিই নাকি মীরপুরকে একদিন বলেছিলে, 'সায়েব কথা কয়  
যেন ম্যাক্সিম্ গানের মতো—কট্ কট্ কট্ কট্ ট্-ট্-ট্ !' ঠিকই  
বলেছিলে । এবং আমিও মস্তব্যটা শুনে সেটাকে সববিশেষ প্রতিপন্ন  
করার জন্তু আরো শ তিনেক রৌণ্ড তদ্বৎই ছেড়েছিলুম ।

সে বাচালতা একদিন আমার লোপ পায় । আজ আবার সেটা  
ফিরে এসেছে । দীর্ঘ সাত বছরের জমানো কথা আজ তোমাকে বলতে  
যাচ্ছি । যে কলম-ধরাকে আমি ভূতের মতো ডরাতুম, আজ আমাকে  
সেই কলম ধরেছে । আমার একমাত্র ছুঃখ এ-চিঠি হয়তো কোনোদিন  
তোমার হাতে পৌঁছবে না । এটা হয়তো জবানবন্দী রূপে আদালতে  
পেশ করা হবে । যে অন্য তোমাকে সাদরে আপন হাতে খাওয়াতে  
চেয়েছিলুম, সেটা পৌঁছবে তোমার কাছে, পাঁচশো জনের ঐটে হয়ে ।

হ্যাঁ, আমার-ই কর্ম, আমিই করেছি । এর জন্তু আর কেউ দায়ী  
নয় । আমি একাই দায়ী আমি জানি, একমাত্র তুমিই জানতে  
পেরেছিলে যে, আমি দায়ী । তুমি আমাকে ধরিয়ে দাও নি কেন তারও  
আন্দাজ আমি খানিকটা করতে পেরেছি । বিশ্বের আদালতে আমাকে  
খাড়া না করে তুমি আমাকে তোমার নিজের আদালতে খাড়া করে  
হয়তো যথেষ্ট প্রমাণ পাও নি, হয়তো তোমার প্রত্যয় হয়েছিল যে,

এ অবস্থায় পড়লে তুমিও ঠিক এই রকম ধারাই, হয়তো ভেবেছিলে আমি তোমার ওপরওলা,—ওপরওলার অপরাধের বিচার করবেন তাঁর ওপরওলা, গুরুর বিচার করবেন ভগবান, চেলায় তাতে কিসের জিন্মেদারি। এ নিয়ে আমার কোনো কোঁতূহল নেই। জজ যখন আসামীকে খালাস দেয় তখন জজ কেন তাকে ছেড়ে দিলে তাই নিয়ে মাথা ঘামায় কোন্ আসামী ?

তুমি যে আমাকে হৃদয় দিয়ে খানিকটে বুঝতে পেরেছিলে সে বিষয়ে আমার মনে কোনো সন্দেহ নেই, তুমি হেন অন্ধের মত হাতড়ে হাতড়ে গুপ্তধনের কাছে পৌঁছে গিয়েছিলে, এইবারে আমি তোমাকে হাত ধরে বাকি পথটুকু দিয়ে যাব। কিন্তু যদি গুপ্তধনের কলসী তখন ফাঁকা বেরোয়, কিংবা যদি তার থেকে বেরোয় কেউটে....? তখন তুমি আমাকে দোষ দিয়ে না। আর তুমি যদি তখন তোমার রায় বদলাও তবে আমিও তোমাকে দোষ দেব না।

তাহলে গোড়া থেকেই আরম্ভ করি।

একদিন কথায় কথায় আমি তোমাকে আমার বাপ-মা সম্বন্ধে কী যেন সামান্য কিছু একটা বলি। তুমি সুযোগ পেয়ে এমন একটা প্রশ্ন শুধালে যার থেকে আমি আবছা-আবছা বুঝতে পারলুম, তুমি জানতে চাও আমি আমার রক্তে এমন কোনো দ্বন্দ্ব নিয়ে জন্মেছি কি না যার তাড়নায় আত্মবিস্মৃত হয়ে আমি অপরাধের পন্থা বরণ করলুম, এখানে বলে রাখি, সে স্থলে তুমি যে প্রশ্ন জিজ্ঞেস করেছিলে আমিও ঠিক সেই প্রশ্নই জিজ্ঞেস করতুম। কারণ অপরাধী নিয়ে আমাদের কারবার। হয় তাদের গায়ে বদ-খুন,—না হয় তারা বড় হয়েছে বদ আবহাওয়ার ভিতরে। আজ আমার আর স্পষ্ট মনে নেই তবে এটুকু এখনো স্মরণে আছে যে, তুমি কিন্তু প্রশ্নটি করেছিলে এমনি সূচতুরভাবে যে, আমি কোনো অফেন্‌স্‌ নিই নি।

তাই বলে রাখি, আমি আমার বাবার যেটুকু দেখেছি তার থেকে এমন কিছুই মনে পড়ছে না যা দিয়ে আমার চরিত্র বিশ্লেষণ করা যায়।

তিনি ছিলেন খাঁটি আইরিশম্যান, অর্থাৎ দু' মুঠো অন্ন আর তিন পান্তর মদের পরস্য হয়ে গেলেই কাজে ক্ষান্ত দিয়ে সোজা চলে যেতেন পাড়ার মদের দোকানে—তারপর তাঁকে আর এক মিনিটের তরে কাজ করানো যেত না। তুমি আয়ারল্যান্ডের মদের দোকান কখনো দেখ নি, তাই তুলনা দিয়ে বলছি সে হল কাশীশ্বর চক্রবর্তীর বৈঠকখানার মতো। সেখানে কুঁড়েমি আর গালগল্প ছাড়া অণু কোনো জিনিস হয় না—মদ সেখানে আনুষঙ্গিক মাত্র। মেয়েদের সামনে এ সব জিনিস ভালো করে জমে না বলে মেয়েরা 'পাবে' যায় না, চক্রবর্তীর বৈঠকখানায়ও তাদের প্রবেশ নিষেধ।

আমার বাবা ছিলেন গল্প বলায় ওস্তাদ, তাই তিনি ছিলেন 'পাবের' প্রাণ—চক্রবর্তীর বৈঠকখানায় শুনেছি সেই ব্যবস্থা।

তার কোনো প্রকারের চরিত্র দোষ ছিল না, তাকে কোনো প্রকারের উচ্ছৃঙ্খল আচরণ করতে আমি কখনো দেখি নি। অথচ তিনি আমাকে জীবনে একটিমাত্র উপদেশ লক্ষাধিকবার দিয়েছেন সেটি—'ডেভিড, যা খুশি তাই করাব, কারো পরোয়া করিস নি।' কেন তিনি এ উপদেশ দিতেন জানিনে, এর ভিতর কোনো দ্বন্দ্ব আছে কি না সে তুমি ভেবে দেখো। মা ছিলেন অত্যন্ত ধর্মভার, তিনি মুছ আপত্তি জানাতেন। বাবা তখন অণু কথা পাড়তেন, কিন্তু যেদিনই ঝড় ছর্ষোগে 'পাবে' যেতে পারতেন না, সেদিনই আমাকে মজাদার কেছা-কাহিনী শোনাতেন এবং তার সবগুলোতেই ইঙ্গিত থাকত,—'যা খুশি তাই করো', এমন কি যাচ্ছেতাই করো।'

এ উপদেশ কিন্তু আমার মনের উপর কোনো দাগ কাটতে পারে নি—অন্তত তাই আমার বিশ্বাস।

এ ধরনের পরিবার আয়ারল্যান্ডে বিস্তর—এর মধ্যে কোনো বিদ্যুটে নূতনত্ব নেই। এর থেকে আমি কোনো হৃদিস পাই নি—দেখো, তুমি পাও কি না।

তবে কি বাইরের দূষিত আবহাওয়া? এমন কোনো পৈশাচিক

ঘটনা যা দেখে আমি স্তম্ভিত হয়েছি, এবং সেই স্তম্ভনের সময় আমার অজানাতে সে ঘটনা আমার হৃদয়মনে ঢুকে গিয়ে ছুট জীবাপুর মতো বছরের পর বছর ধরে আমার সর্ব অচেতন সত্তা বিষয়ে দিয়ে দিয়ে শেষটায় হঠাৎ একদিন আমার মগজে ঢুকে আমায় বিবেকবুদ্ধিহীন উন্মাদ করে দিল ? কিংবা কোনো মারাত্মক প্রবঞ্চনা,—যে-দেবীকে হৃদয়ের পদ্মাসনে বসিয়ে দিনযামিনী পূজা করেছি, হঠাৎ দেখি সে মায়াবিনী, পিশাচিনী—আমার বুকের উপরে বসে আমারই হৃৎপিণ্ড ছিন্ন করে রক্ত শোষণ করছে ? কিংবা প্রেমের দেউলের মমতাপ্রতিমা গোপনে গোপনে বারাজনার আচরণ করছে—হঠাৎ একদিন ধরা পড়ে গেল, আমার বিশ্বসংসার অন্ধকার হয়ে গেল ?

না। আমার চোখের সামনে ঘটে নি। শুনেছি। তা সে তুমিও শুনেছ, সবাই শুনে থাকে, বইয়ে পড়ে থাকে।

তবু কি উলটোটা ? অবিশ্বাস্ত আত্মবিসর্জন, বহুযুগের বিরহ-দহনের পর মধুময় পুনর্মিলন, সমরে লুপ্ত পুত্রের গৃহ-প্রত্যাগমনে মাতার বিগলিত আনন্দাশ্রু সিঞ্চন ?

না। তাও দেখি নি। সেখানেও ইউ উইল ড্র ব্ল্যাক !

তবে হ্যাঁ, আমার জীবনের সবচেয়ে স্মরণীয় ঘটনা, মেব্লুকে দেখা, তাকে পেয়েও না-পাওয়া।

## পনেরো

আমার বাবা মা ছুজনেই ঐক মাসের ভিতর মারা যান। আমি বৃত্তি পেয়ে লগনে পড়াশুনো করতে এলুম।

আমার মনে হয় বড় শহরে মানুষের জীবন বৈচিত্র্যহীন। অকস্মাৎ গাজ্বাতিক সেখানে কিছু একটা ঘটে না। তার কারণ বড় শহরের জীবনশ্রোত বয় অতিশয় তীব্র গতিতে। তুমি তার উপর দিয়ে ভেসে যাচ্ছ খরবেগে। সে বেগে চলার সময় ডাইনে বাঁয়ে মোড় নেওয়া অসম্ভব। আর ছোট শহর, কিংবা গ্রামে জীবনগতি শান্ত, মন্দ। সে যেন গ্রামের নদী। তার উপর দিয়ে ভেসে যাওয়ার সময় সামান্য খড়-কুটোটি নানা চক্রে বহু প্যাঁচ খেয়ে খেয়ে এগিয়ে যায়। দেখে মনে হয় তার জীবনে স্বাধীনতা অনেক বেশী।

মানুষের জীবনের উপর লগনের চাপ জগদদল, তার দাবি বহুল—কিন্তু বৈচিত্র্যহীন। সকাল থেকে রাত বারোটা অবধি মানুষ বে কী বন্ধ পাগলের মতো ছোটোছোটো ছোটোপুটি করে সেই তুমি মধুগঞ্জের লোক বুঝবে কী করে? এবং যতদূর দেখতে পাচ্ছি, খ্যাস্ক গড়, মধুগঞ্জকে কখনও বুঝতে হবে না।

কিন্তু জানো সোম, সেই খরশ্রোতে ভেসে ভেসে হঠাৎ আমি একদিন শেষ সীমানায় পৌঁছে গেলুম। দেখি সম্মুখে ঘন নীল সমুদ্র আর তার উপর ফিরোজা আকাশের ঢাকনা। বিলেতের সমুদ্র আর আকাশ সচরাচর নীল রঙের বাহার ধরতে জানে না—কুয়াশা, বৃষ্টি আর বরফ তাকে করে রাখে ঘোলাটে, তামাটে, পাঁশুটে। আমার সঙ্গে সমুদ্রের চারি চক্ষের মিলন হল নিদাঘ মধ্যাহ্নে—নীলাম্বুজ আর নীলাকাশ সেদিন বর্ষণশেষে আতপ্ত কিশোর রৌদ্রে দেহখানি প্রসারিত করে দিয়েছেন।

সে সমুদ্র মেবল্।

তোমাকে বোঝানো অসম্ভব, সোম, কারণ এ জিনিস বোঝার জিনিস নয়। তোমার বহু সদগুণ আছে স্বীকার করি, কিন্তু প্রেম কী বস্তু তা তুমি জান না। কতবার দেখেছি ছোঁড়া-ছুঁড়ী পালিয়ে গিয়ে কেলেঙ্কারী করেছে, তুমি সর্বদাই সমাজের হয়ে তাদের উপর কড়া শাসন করেছ, পুলিশের কুলিশ পাণি দিয়ে। তারা কিসের নেশায় পাগল হয়ে সমাজের সব বেড়া ভাঙল, সব দড়াদড়ি ছিঁড়ল তুমি কখনো বুঝতে পার নি। আমি দু-একবার ইঙ্গিত করে দেখেছি তুমি অন্ধ, বরঞ্চ নৈতিক, সামাজিক ধর্ম রক্ষা করা যায় সর্ব প্রধান কর্তব্য সেই পাত্রী বুড়ো-বুড়ীর হৃদয়ে অনেক বেশি দরদ, তাদের চিত্ত বহুগুণে প্রসারিত।

মেব্ল্ সেই গ্রামের ছপুর্নে হাইড পার্কের গাছতলার বেঞ্চিতে বসে অলস নয়নে সার্পেন্টাইনের জলের দিকে তাকিয়ে তাকিয়ে কী যেন দেখাছিল।

তুমি তাকে দেখেছ, বহুবার বহু পরিবেশে দেখেছ, অবশ্য আমার চোখ দিয়ে দেখ নি, কিন্তু তুমি জান সে সুন্দরী। অসাধারণ সুন্দরী।

হিন্দুধর্ম, হিন্দু দর্শনের অনেক কিছু আমি এদেশে এসে শুনেছি, পড়েছি; কিন্তু তার অল্প জিনিসই আমি বিশ্বাস করতে শিখেছি। তার একটা জন্মান্তরবাদ। না হলে কী করে বিশ্বাস করি সেই সামাজিক কড়াকড়ির যুগে বিনা মাধ্যমে কী করে আমাদের আলাপ হল, প্রথম দর্শনেই কী করে দুজনার হৃদয়ে একে অন্নের জন্তু ভালোবাসা জন্মাল? এ যুদ্ধ বিলেতের অনেক পরিবর্তন ঘটিয়েছে, অজানা মানুষের সঙ্গে বিলেতের আলাপ-পরিচয় করা এখন আর কঠিন নয়, তার ধাক্কা সাত সমুদ্র পাড়ি দিয়ে আমাদের আগাঘরেও এসে পৌঁছেছে, সে খবর তুমি জান, কিন্তু সে যুগে দু-দণ্ডের ভিতর এতখানি হৃদয়তা পূর্বজন্মের সংস্কার ছাড়া অথ কোনো স্বতঃসিদ্ধ দিয়ে বোঝানো যায় না।

মেব্ল্ আমার কাছে সমুদ্রের রূপ নিয়ে দেখা দিয়েছিল।

হার মানায়। এই বক্সওয়ালা কেন যে ভ্যানর-ভ্যানর করে মধুগঞ্জের নিন্দে করে আমি ঠিক বুঝতে পারিনি, বোধহয় করাটা ফ্যাশান, কিংবা হয়তো ভাবে, না করলে খানদানী সায়েবরা ভাববে ওরা বুঝি নেটিভ, কালা আদমি বনে গিয়েছে।

লগুন থেকে মধুগঞ্জ! এর চেয়ে দূরতর পরিবর্তন আমি কল্পনা করতে পারিনি।

সেই মধুগঞ্জে আমি অনেক কিছু পেলুম। ভগবান অকৃপণভাবে ঢেলে দিলেন তাঁর সব দৌলত, তাঁর তাবৎ ঐশ্বর্য। নৌকো বাচ থেকে গারস্ত করে পাজী টিলার মেয়েগুলি।

ভালোই। এদের কথা উঠল। তুমি জান আমি ওদের সঙ্গে চলাচলি করার মতলব নিয়ে পাজী-টিলায় যাই নি, কিন্তু এক জায়গায় আমার অজানতে আমি একটা ভুল করে ফেলি। প্রাচ্য দেশের মেয়েরা যে এত স্পর্শকাতর হয় আমি অনুমান করতে পারিনি তাই আমি তাদের সামান্যতম গতানুগতিক হৃদয়তা জানাতেই হঠাৎ দেখি, ওরা দিচ্ছে তরুণীর অকুণ্ঠ প্রেম। আমার আপসোসের অন্ত নেই যে, সে ভালো-বাসার গ্যায় সম্মান আমি দেখাতে পারি নি। আশা করি ওরা জানতে পেরেছে যে, আমি ওদের কিরিঞ্জি বলে অবহেলা করি নি। আমি জানতুম, তুমি এই বিশ্বাসটি ওদের ভিতর জন্মাতে পারবে তোমার পাকা মুন্সিয়ানা দিয়ে, তাই তোমারই হাতে এটি সঁপে দিয়েছিলুম।

তারপর আমি বিলেতে গেলুম মেব্লকে নিয়ে আসতে।

এই পৃথিবীর গ্রামে গ্রামে, নগরে নগরে সর্বত্রই প্রাতি মুহূর্তে নরনারীর ভিতর প্রেম মুকুলিত হচ্ছে বিকশিত হচ্ছে, তার ফল কখনো মধুময় কখনো তিক্ত—এই হল জীবনের দৈনন্দিন, গতানুগতিক ধারা। কিন্তু যদি প্রেমের মেলা দেখতে চাও, প্রেম যেখানে অস্থ সব-কিছু ছাপিয়ে উপচে পড়ছে তবে একটিবারের জন্য কোনো এক জাহাজে করে সপ্তাহ তিনেকের জন্য কোথাও চলে যেয়ো। দেখবে কী উন্মাদ অবদান মেলার ফুটি সেখানে চলে—ইচ্ছে করেই ‘মেলা’ বলছি কারণ

এ জিনিস দৈনন্দিন নয়। জাহাজের অধিকাংশ নরনারী সেখানে সমাজের সর্বপ্রকার কড়া বন্ধন থেকে মুক্ত, প্রতিবেশীকে ডরিয়ে চলতে হয় না পাছে সে কেলেঙ্কারি কেছা সর্বত্র রটিয়ে দেয়—জাহাজ মোকামে পৌঁছলেই তো সবাই ছড়িয়ে পড়বে পৃথিবীর এ প্রান্ত থেকে ও প্রান্ত অবধি, কে কাকে জানাতে যাবে, কে কী করেছে? এবং সবচেয়ে বড় কথা, এ তিন হুণ্ডা মানুষ জীবন-সংগ্রাম থেকে সম্পূর্ণ বিচ্ছিন্ন, সর্ব-প্রকারের দায়িত্ব থেকে পূর্ণ মুক্ত। আহার নিদ্রা আশ্রয়—এ তিন সমস্তার সমাধান হওয়া মাত্রই, তা সে যত সাময়িকই হোক না কেন, —তিন মাস্তাহ কি কম সময়?—মানুষের জাগে আসঙ্গালপ্সা, যৌনক্ষুধা! সে যেমন বিরাট তেমন বিকট—স্থলবিশেষ। তাই এ রকম জাহাজে মানুষ এডিনিস না হয়েও পায় কার্তিকের কদর, মোনা-ইলসা না হয়েও ভিনাসের গুজা।

বুধা বিনয় করবো না। আমি জানি আমি কুরূপ কুজ্জিত নই। তাই আমার কাছে তখন বহু হৃদয় অব্যাহতকার, বহু যুবতী আমার দিকে স্থিরদৃষ্টিতে তাকিয়ে ঘন ঘন সাপ খেলাবার বাঁশি বাজাতে আরম্ভ করেছে। আর ছু-চারটি ভীকু লাজুক তরুণী নির্জনে পেলেকি করে একটুখানি হেমে বিশোরী-মুলভ নার্তিক্যাত নিতম্বে সচেতন টেউ তুলে দিয়ে জাহাজের নির্জনতর কোণের দিকে গুওয়ানা দিত।

কিন্তু আমি তো চলেছি আমার বধুর সন্ধানে। আমার কিয়ানে, যে আমার ব্রাইড হতে যাচ্ছে, আমার বঁধু, যে আমার বধু হতে চলেছে। প্রপেলারের প্রতি আঘাত আমাকে এগিয়ে নিয়ে যাচ্ছে তারই কাছে, এই লক্ষ লক্ষ টাকার জাহাজ, হাজার হাজার টাকার বেতনভোগী কর্মচারীরা এরা সবাই অহোরাত্র খাটেছে আমাকেই, শুধু আমাকেই, আমার রাণীর কাছে নিয়ে যাবার জন্তে। ঝড়-ঝঞ্জায় এ জাহাজ ডুবতে পারে না, বিশ্বব্রহ্মাণ্ড লোপ পেলেও এ জাহাজ পৌঁছবে মার্শেলেস বন্দরে, যেখানে জাহাজ থেকে দেখতে পাব, আমাদের প্রথম পরিচয়ের

দিন মেবল্ যে পোশাক পরে হাইড পার্কে বসেছিল সেই পোশাক পরে বন্দরের পারে দাঁড়িয়ে তার মন্ত্ রঙের রুমাল দোলাচ্ছে ।

‘ভগবান কোথায় ?’—নাস্তিক জিত্তেস করেছিল সাধুকে কুচ্ছ নাথনাসক্ত দীর্ঘতপস্মারত চিরকুমার সাধু বলেছিলেন, ‘তরুণ-ভরুণীর চৃষনের মাঝখানে থাকেন ভগবান ।’ আমার হৃদয় আমার মেবলের কমাল-নাড়ার মাঝখানে থাকবেন স্বয়ং ভগবান ।

থাক, সোম । আগেই বলেছি তোমাকে এ-সব বলা বৃথা । তবু বলছি, কেন জান । হয়তো বুঝতে পারবে, হয়তো হৃদয় দিয়ে অনুভব করতে পারবে । ‘অবিশ্বাস্ত তৌ কিছুই নয়, ‘অসম্ভবই বা কোথায় ?’

### নোলো

তুমি যে-সব ইংরেজদের চিনেছ তাদের ভিতর সত্যকার শিক্ষিত লোক কম । এবং যে ছ-একটি লোক সাহিত্য বা অথ কোনো রনের মন্ধানকোনো কালে বা হয়তো রাখত তারা ও আগ্রহের আবহাওয়ায় পড়ে এবং রসকয়হীন সরকারী-বেনরকারী কাজ করে করে স্থূল এবং অল্পভূক্তিহীন হয়ে পড়ে । ‘শেলি’, কীটস পড়ে যে আনন্দ পাওয়া যায় তার জন্ত বহুদিন বহু বৎসর পরে মনে মনে হৃদয়ের অন্তস্থলে এক বিশেষ ‘ধর্মসাপনা’ করতে হয় । অল্প ইংরেজই সেটা করে থাকে, এবং করলেও সে তার পাঁচজনকে সে সম্পক্ষে কোনো খবর দেয় না । তাই ইচ্ছে করেই ‘ধর্মসাপনা’ সমাসটা ব্যবহার করলুম, কারণ তোমরা ঐ জিনিসকে করে থাক গোপনে গোপনে । আমার মনে হয় ছুটো একই জিনিস, ধর্মসাপনা এবং কাব্যসাপনার শেষ রস নেই ।

ফরাসীরা তোমাদের মতো । শক্ত সোমথ জোয়ান যদি গাল-গল্লের মাঝখানে হঠাৎ কবিতা আবৃত্তি আরম্ভ করে তবে তার পাঁচটা ফরাসী হরচকিয়ে ওঠে না, কিংবা বিষম খায় না । ফ্রান্সে তাই কাব্য-জীবন এবং ব্যবহারিক জীবনের ভিতর কোনো দ্বন্দ্ব নেই । তাদের প্রেম যে রকম অনেকখানি খোলাখুলি, সে প্রেমকে তারা তেমন কবিতা

আবৃত্তি করে গান গেয়ে আর পাঁচজনের সামনে রূপ দিতে, প্রকাশ করতে লজ্জিত হয় না ! তাই ইংরেজ হনিমুন করতে যায় ফ্রান্সে— জীবনের অন্তত ঐ কটা দিনের জন্ত সে খোলাখুলি প্রেম করতে চায়। তার জীবনের এ কটা দিন তোমাদের হোলির মতো। মাতব্বর কাশীধর চক্রবর্তীকেও সেদিন আমি 'রুং মেথে' সং সেজে 'টং কর্তে' দেখেছি। মুকন্দী রায় বাহাদুর যদি প্যারিসে হনিমুন করতে যেতেন (ভাবতেই কি রকম হাসি পায়—প্যারিসের রাস্তায় চোগা-চাপকান-পরা রাখবাহাদুরের সঙ্গে শোলক-পরা চৌলতে জড়ানো আট বছরের বউ ! ) তবে তিনি অতি অবশ্য রাস্তার পাশের গাছতলায় দাঁড়িয়ে খনে গলায় ঝুলানো হারমনিয়ামের প্যা প্যার সঙ্গে ভাটিয়ালি ধরতেন, কনে বউয়ের কোমর জাড়িয়ে ধরে ধেই ধেই করে খেমটা কিংবা পাল্কা নাচ জুড়তেন। ফ্রান্স দেশের বোতলেই শ্যাম্পেন নয়, তার আকাশে বাতাসে শ্যাম্পেন ছড়ানো।

মার্গেলেস থেকে দশ মাইল দূরে ছোট্ট শহর 'আক্স-আ-প্রভাসে' আমরা বিয়ে করব বলে স্থির করলুম। বিয়ের ব্যবস্থা করতে করতে যে তিনদিন লাগল সে সময়টা আমরা মার্গেলেসের সেরা হোটেলে কাটালুম 'আলাদা কামরায়—তখনো বিয়ে হয় নি, এক ঘর করি কী করে ? ফরাসীরা তাই দেখে কত না চোখ টিপে মুচকি হাসি হাসলে। একেই বলে ইংরেজের 'লেফাকা-তুরুস্তাম', ব্রিটিশ প্রজ্ঞারি, তোমাদের ভাষায় এদিকে 'ঘোমটা, ওঁদিকে 'খেমটা !

সবাই ঘুমিয়ে পড়লে তার ঘরে যে যেতে পারতাম না তা নয়। এমন কি হোটেলওয়াল 'বুদ্ধি করে আমাদের যে ছুখানা ঘর দিয়েছিল তার মাঝখানে একটি দরজা ছিল। সে দরজাটি ওয়ালপেপারের সঙ্গে এমন নিখুঁত কারিগরিতে মেশানো যে, আমাদের কারো নজরেই পড়ে নি। যে লিফট-বয় আমাদের স্ট্রাকেশ ঘরে নিয়ে এসেছিল তার বুঝতে বাকি রইল না যে, প্রেমের মন্দিরে আমরা একদম গাঁইয়া ভক্ত, আর ফরাসীরা সেখানে আমাদের তুলনায় বিদগ্ধ নাগরিক পাণ্ডা।

অর্থাৎ ফরাসী লিক্‌ট-বয় পর্ষস্তু বিলেতের ডন জুয়ানকে প্রেমের মুশায়েরায় ছু-চারখানি মোলায়েম বয়েত শুনিয়ে দিতে পারে। একবাক্য ইংরেজি না বলে ছোকরা অতিশয় সংস্কৃত কায়দায় শুধ মুদ্রা দিয়ে বুঝিয়ে দিলে দরজাটা কোন্ জায়গায় এবং সেইটেই যেন আসল কথা নয়, যেন আসল কথা—ওটাকে ছুদিক থেকেই বন্ধ করা যায়। মেব্‌লের মুখ একটুখানি রাঙা হয়ে গিয়েছিল।

যে দরজা বন্ধ করা যায়, সেটা খোলাও যায়। বাঙলা কথা।

জানিনে, মেব্‌ল তার দিকটে খোলা রেখেছিল কি না।

তোমাদের রাপাকেষ্টর দেখা হত কুঞ্জবনে, সেখানে দরজা-দেউড়ির বায়নাকী নেই। আমাদের দেশে দরজা নিয়ে বিস্তর কবিত্ত করা হয়ে গিয়েছে। অবশ্য তোমাকে সে বোঝানোর চেষ্টা পণ্ডশ্রম।

আমি কিন্তু যাই নি অন্ম কারণে। যাকে ছুদিন বাদে সব দিক দিয়ে আমি পাইব পাব, যে খনির সব মণি একদিন আমারই হবে, যে-নমুদ্রের সব মুক্তা আমারই—একমাত্র আমারই গলায় একদিন ছলবে, সে খনিতে আমি ঢুকতে যাব কেন চোরের মতো, সে নমুদ্রে আমি কেন হতে যাব বোম্বেষ্টে? মেব্‌লকে আমি বরণ করতে যাব বিশ্বসংসারের প্রসন্ন আশীর্বাদ নিয়ে।

এবং সবচেয়ে বড় কথা, যৌন সম্পর্কে যদিও আমার দেশ তোমাদের তুলনায় অনেকখানি ঢিলে তবুও জিনিসটে আমার কাছে কখনো সরল বলে মনে হয় নি। আমার মনে কেমন জানি একটা ভয় কী যেন একটা সন্দেহ সব সময়েই জেগে থাকত। আশ্চর্য, নয় কি? যে সরল রহস্যের ফলে বিশ্বসংসারে প্রতি মুহূর্তে নবজীবন লাভ করছে পশুপক্ষী, ফুলে রেণুতে যার সহজ প্রকাশ, তার প্রতি ভয়, তার প্রতি সন্দেহ! এ ভয়, এ সন্দেহ আমার এখনো যায় নি। তুমি হয়তো এ চিঠি শেষ করার পর তার কারণ আমার চেয়েও ভালো করে বুঝতে পারবে।

আমি ভেবেছিলুম, এ চিঠি আমি একদিনেই শেষ করতে পারব ; এখন দেখছি, ভুল করেছি। এত কথা যে আমার বুকের ভিতর জমা হয়ে আছে সে-কথা আমি জানতুম না। আমার অজানাতে যে আমি এতখানি খুঁটিয়ে খুঁটিয়ে দেখেছি এবং তারও এতখানি এখনো আমার স্মরণে রয়েছে সে-তত্ত্বই বা জানা কী করে ?

ওদিকে তুমি হয়তো অতিষ্ঠ হয়ে উঠেছ সব-কিছু এক ঝটকায় জেনে নেবার জন্য। কিন্তু সোম, জীবন তো আর রহস্য-উপন্যাস নয় যে, কৌতূহল দমন না করতে পারলে শেষ ক-খানা পাতা পড়েই সব-কিছু জেনে নেওয়া যায়। জীবন বরণ গানের মতো। তার গতি বিচিত্র, তার বিস্তর বহু! আমার সে গান তোমাদের ভাটিয়ালীর মত মধুর হয় নি এবং সরলও হয় নি—তা না হলে আজ আমার এ অবস্থা কেন—এ গানে অনেক কমসুরা, অনেক বেশুরা। সে গানের রেকর্ড তুমি এক মিনিটে বাজাতে গেলে আরো বেশুরা ঠেকবে, আমার প্রতি অবিচার করা হবে।

অ্যাক্‌স্-আ-প্রভাসের একটি ছোট্ট গির্জায় যেদিন আমাদের বিয়ে হয়, সেদিন বিধাতা ছিলেন আমাদের উপর অপ্রসন্ন। পুরোত যখন ভগবানের নামে একে অগ্নিকে স্বামী-স্ত্রীর কর্তব্য সম্বন্ধে সচেতন করে দিচ্ছেন, তখন বাইরে ভগবান ছাড়ছিলেন তাঁর লঙ্কার—বৃষ্টিঝড়ে আর বজ্রপাতের ভিতর দিয়ে। অ্যাক্‌স্ সেদিন সে প্রথম আঘাতে মধুগঞ্জ যে রুদ্ররূপ নেয় তাই নিয়েছিল। আমি যখন মেবল্‌কে বিয়ের আঙুটি পরাচ্ছিলুম ঠিক সেই মুহূর্তে বিদ্যুৎ চমকে ওঠে গির্জার সমস্ত রঙীন শার্মিগুলোতে যেন আগুন ধরিয়ে দিয়েছিল। মেবল্ তখন শিউরে উঠেছিল। আমি তার হাতে একটু চাপ দিয়ে তাকে আশ্বস্ত করেছিলুম। পুরোত যখন গভীর কণ্ঠে গির্জাতে সেই গতানুগতিক প্রশ্ন শুধালেন, এই যুবক-যুবতীর মিলনে কারো কোনো আপত্তি আছে

কি না, তখন কড়কড় করে বাজ পড়েছিল—আরেকটু হলে গির্জের গাঙ্গীর্ষ ভুলে গিয়ে মেবল আমাকে জড়িয়ে ধরত। মেবল বড় ধর্মভীরু, আকাশে বাতাসে, ঘাসে ঘাসে সে ভগবানের অদৃশ্য অঙ্গুলি দেখতে পায়। আমি তার হাতে আরো একটু চাপ দিয়ে তাকে আশ্বস্ত করেছিলুম।

সেদিন কিন্তু এ-সব ছুরোগ আমার মনে কোনো দাগ কাটে নি। সেদিনের সে ছুরোগে আমি ভগবানের করাস্থলিসঙ্কেত দেখি নি, আজও দেখাছিনে কিন্তু কেন জানিনে আজ যেন সমস্ত জিনিসটা এক ভিন্ন পরিপ্রেক্ষিতে আমার কাছে ধরা পড়েছে। দিনের আলোতে যে মাঠে ফুল কুড়িয়েছি, যে ঝরনায় পা ডুবিয়ে বসে ক্লান্তি জুড়িয়েছি, সন্ধ্যার অন্ধকারে সেখানে যেন প্রতি গর্তে কেউটির ফণা দেখতে পাচ্ছি। কী জানি, সব যেন ঘুলিয়ে গিয়েছে। কতবার ভেবেছি এ-সব কথা। কখনো এ-সব এলোমেলো চিন্তা পাট করে ভাঁজে ফেলে গুছিয়ে তুলতে পার নি।

সে রাত্রে আবেগে, উত্তেজনায় মেবল আমার বুকে তার মাথা রেখে ফুঁপিয়ে ফুঁপিয়ে কেঁদেছিল। কান্নার সঙ্গে সঙ্গে তার চেউ-খেলানো শরীরে যেন আরেক ধরনের চেউয়ের পর চেউ জেগে উঠেছিল। আমার হাত ছিল তার কোমরের উপর। আমি আমার হাত দিয়ে তার বিক্লেভ শাস্ত করার চেষ্টা করেছিলুম। চোখ দিয়ে দেখি, কান দিয়ে শুনি, এ ছ ইন্দ্রিয়ের মাধ্যমে জ্ঞান সঞ্চয় হয় বেশি, রসগ্রহণ করা যায় কম। স্পর্শের মাধ্যমে পাওয়া যায় রস—অনুভূতি জ্ঞান যেটুকু সঞ্চয় হয় তা নগণ্য। স্পর্শের নিবিড়তা রসলোকে গভীরতম। সে মানুষকে একে অন্বেষণ যত কাছে টেনে আনতে পারে অল্প কোনো ইন্দ্রিয় তা পারে না। চোখ দিয়ে যখন প্রিয়াকে দেখি কান দিয়ে যখন শুনি তার প্রেম নিবেদন তখন সর্বচৈতন্য ভরে ওঠে এক বিপুল মাধুরীতে কিন্তু চুম্বনের ভিতর যখন তার স্পর্শলাভ করি তখন পাই গভীরতম একাঙ্গবোধ। বরঞ্চ চুম্বনেরও সীমা আছে, সেখানেও ক্লান্তি আছে; কিন্তু গায়ে হাত

বুলনোর কোনো সীমাবন্ধন নেই। তাই মায়ের গভীরতম ভালোবাসার প্রকাশ পুত্রের গাত্রস্পর্শে। আরেকটু সাদামাঠা ভাষায় বলি, তোমাদেরই ভাষায়, মিঠে কথায় চিঁড়ে ভেজে না—তাতে দিতে হয় জল আর গুড়ের স্পর্শসুখ।

একটু চেষ্টা করলে হয়তো স্মরণ করতে পারবে ঠিক ঐ সময় মধুগঞ্জ অঞ্চলে হঠাৎ স্বদেশী আন্দোলন মাথা চাড়া দিয়ে ওঠে। কর্তারা বিচলিত হয়ে আমাকে ত্বর করেন, তদগুণেই ছুটি বাতিল করে কর্মস্থলে ফিরে আসতে। সে তার লগুন, প্যারিস বহু জায়গায় বিস্তর গুত্তা খেয়ে শেষতায় এসে পৌঁছয় অ্যাক্স-আঁ-প্রভাঁসে আমাদের বিয়ের পরদিন ভোরবেলায়। তৎক্ষণাৎ ছুটি দিতে হল মার্সেলেস বন্দরের দিকে।

‘মার্সেলেস বন্দরে জাহাজ ধরা আমাদের মধুগঞ্জের বাজার ঘাটে নৌকো ধরার মতো। সেখানে ছুনিয়ায় জাত-বেজাতের জাহাজ—এমন কি ‘গ্রাক’, ‘মিশরী’, তুকী পৰ্বন্ত—খেয়া নৌকার মতো বসে থাকে এবং সেখানে দিব্যি দরদস্তুর করা যায়, কত দামে তোমাকে ভূমধ্যসাগরের খেয়া পার করে পোর্ট সঙ্গদ নিয়ে যাবে—মধুগঞ্জের ঘাটে যেরকম দর কষাকষি করি। মার্সেলেসে ভারতগামী বড় জাহাজ না পেলে পোর্ট সঙ্গদে গিয়ে সেখান থেকে অনায়াসে অণু জাহাজ ধরা যায়—ঐ খাড়ি দিয়েই তো সব জাহাজকে বোম্বাই, কলম্ব যেতে হয়।

আমাদের কপাল ভালো না মন্দ বলতে পারব না; কোনো ভালো ব্যবস্থাই করতে পারলুম না। শেষটায় একটা মাল-জাহাজ জুটে গেল, সেটাই দেখলুম হিন্দুস্থান পৌঁছবে সঙ্কলের আগে, কারণ ছাড়বে ঘণ্টা তিনেক পরেই। তবে অসুবিধে এই যে, আমাদের নিজেদের জণ্ড কোনো কেবিন আর তাতে খালি নেই। আমাকে চুকতে হবে একটা পুরুষদের কেবিনে, আর মেব্লুকে একটা মেয়েদের। একেবারে ভারতীয় ব্যবস্থা। মর্দানা জানানো।

মেব্লু খুঁত-খুঁত করেছিল।

আমি হেসে বলেছিলুম, যে দেশে যাচ্ছ সেখানে ঠিক এই ব্যবস্থা। বিলেতে স্মোকিং, নন-স্মোকিং। ওদেশে লেডিজ এবং 'জেন্টলমেন'।

আমার মনে হয়েছিল, ভালোই হল, তাড়াতাড়ির কী?

ছোট জাহাজের এক কোণে, নিভুতে, গুটিনো দড়াদড়ির মাঝখানে আমরা ছুজ্জনায়ে পাশাপাশি বসতুম। সমুদ্রের উদ্দাম হাওয়া মেবলের চুল নিয়ে হলসুল বাধাত, কখনো খানিকটে নোনা জলের সূক্ষ্ম কণা তার গালে চুমো খেয়ে যেত, কখনো বা সমুদ্রের চাঁদের জোরালো আলো এসে তার মুখ অদ্ভুত দীপ্তিতে উজ্জ্বল করে তুলত। রাত একটা, দুটো, তিনটে বেজে যেত। একে অশ্রুর অবিচ্ছিন্ন সঙ্গস্থ বর্জন করে কেউই আপন কেবিনে যেতে রাজী হতুম না। কী হবে কেবিনে গিয়ে। সেখানে তো শুধু ঘুমের অন্ধকারে ডুবে যাওয়া ছাড়া অণু কোনো অল্পভূতি নেই। এখানে সমুদ্র-আকাশ, আলো-অন্ধকার, চন্দ্র-তার। তাদের কত অফুরন্ত সৌন্দর্য রাত্রির পর রাত্রি উছলে টেলে দিচ্ছে। কেউ দেখবার নেই। এই বিরাট সমুদ্রের ক ইঞ্চি জায়গা জুড়ে আছে ক-খানা জাহাজ? এবং সেই কটি জাহাজে সুষুপ্তিতে নিমগ্ন না হয়ে এ সৌন্দর্য পান করছে কটি নরনারী? আমিও এ সৌন্দর্য এরকমভাবে, তার পরিপূর্ণরূপে, ক্রমবর্ধমান গতিতে আগে কখনো দেখি নি। এর পূর্বে যে একবার এসেছি গিয়েছি তখন বেশির ভাগ সময় কেটেছে লাউঞ্জে তাস খেলে, 'বারে' জুইস্কি খেয়ে, কিংবা কেবিনে নাক ডাকিয়ে। 'বার' থেকে শেষ গেলাস খেয়ে কেবিনে যাবার সময় ডেকে দাঁড়িয়ে হয়তো ছ-পাঁচ মিনিটের জন্ত টুরিস্টদের মতো 'ও হাউ গ্র্যাণ্ড' বলেছি। পাকা ইংরেজ পাঁচজনের সামনে প্রাকৃতিক সৌন্দর্য অনেকক্ষণ ধরে দেখবার সাহস ধরে না—পাছে লোকে ভাবে লোকটা হয়তো কবি। 'ওয়াট? ছাট চ্যাপি রাইটস্ পোয়েমস্? গশ্! ওয়া (টে) ক (র)! মাই গিনেস্ ( গুডনেস্ )!' তার উপর আমি অব অল পার্দনস্ পুলিশের লোক?

আমরা জাহাজে উঠেছিলুম কৃষ্ণ ত্রয়োদশীতে আর বোম্বায়ে নামি পূর্ণিমাতে ।

এখানে হঠাৎ একটা কথা মনে পড়ে গেল, সোম, কিছু মনে কোরো না, সেটা যদি উল্লেখ করি । এর সঙ্গে আমার মূল বক্তব্যের কোনো যোগ নেই । তোমার মনে আছে কি না জানিনে, মধুগঞ্জে তোমার সঙ্গে পরিচয়ের দুদিন পরেই তুমি কথায় কথায় বলেছিলে, ‘পরশু তো পূর্ণিমা, সমস্ত রাত নৌকো বাওয়া যাবে ।’ আমি তখন কিছু বলি নি । পরে দেখলুম, শুধু তুমি না, তোমাদের দেশের আর সবাইও চাঁদের বাড়ি-কমা সম্বন্ধে সব সময়েই সচেতন । আমরা কেন অচেতন থাকি তার কারণ আমাদের দেশে বারো মাস যে কোন রাত্রের বৃষ্টি, ঝড় হতে পারে, শীতকালে বরফ, আর কুয়াশা তো লেগেই আছে চার শ পর্য্যন্ত দিন—ইচ্ছে করেই চার শ বললুম । ওখানে কে হিসেব রাখে চাঁদ রাতের বেলায় কখন যায়, কখন আসে, মাজা-ঘসা কাঁসার খালার মতো ঝকঝক করে, না নরুনে কাটা নখের মতো আকাশ থেকে কেটে পড়ে গাছের ডগায় আটকে থাকে ।

ভারতবর্ষে চাঁদকে না চিনে মফস্বলে কোন্ পুলিশ ঠিকঠিক কাজ করতে পারে ? পূর্ণিমাতে চুরির এলাকায় মোতায়ন করলে আধা ডজন পুলিশ, অমাবস্যায় তিনটে ! একমাত্র বর্ষাকালেই আগেভাগে কিছু ঠিক করা যায় না । বিলেতে বারোমাস তাই ।

কিন্তু আমি চাঁদকে সত্যি চিনতে শিখলুম জাহাজে, মেবলের সঙ্গে ; কৃষ্ণ ত্রয়োদশীতে চাঁদ কখন ওঠেন, কতখানি কাত হয়ে ওঠেন আর শুক্লা সপ্তমীতে চাঁদ কখন অস্ত যান, এদিকে কাত হয়ে না ওদিকে কাত হয়ে সে আমি ভালো করে জানলুম জাহাজে, ডেক-চেয়ারে, মেবলের গা ঘেঁষে । ক্লাস্তিতে সে বেচারী চেয়ারে ঘুমিয়ে পড়ত, তবু কেবিনে ঘুমুতে যাবে না । আমি ডেক-চেয়ারে ঘুমুতে পারিনে তাতে কিন্তু আমার কোনো ক্ষোভ ছিল না ।

ইয়োরাপীয়দের সঙ্গে প্রাচ্যের প্রথম পরিচয় হয় পোর্ট সঙ্গদে ।-

পোর্ট সঙ্গদের সঙ্গে গোটা মিশরের অতি অল্পই যোগসূত্র । তাই পোর্ট সঙ্গদ দেখে মিশর সম্বন্ধে রায় প্রকাশ ভুল । ও-শহরটা জন্মেছে এবং বেঁচে আছে জাহাজ-যাত্রীদের কল্যাণে । এবং জাহাজে যে রকম বহু যাত্রী কাণ্ডজ্ঞানবর্জিত হয়ে নব নব উল্লাস-উত্তেজনার সন্ধান করে, এখানেও ঠিক তাই । বরঞ্চ বলব বেশি । বরঞ্চ বলব, জাহাজে তুমি কী করলে না করলে তার সন্ধান তবু কেউ কেউ পেয়ে যেতে পারে, এখানে সে বালাই-ই নেই । এখানে তুমি ঘণ্টা পাঁচেক কী করে কাটালে, তার খবর জানবে কে ? দেশভ্রমণ বড় ভাল জিনিস--তার 'এক্সস্ট্র পাইপ' দিয়ে মেলা পাপ বেরিয়ে যায় ।

পোর্ট সঙ্গদের পাপ লুকিয়ে রাখা যায় না । মেব্লে'র চোখে পৰ্ব্বন্তু তার অভদ্র ইঙ্গিত খোঁচা মেরোছিল--যদিও আমি চেষ্টার ক্রটি করি নি, ও যেন সামান্য ছু-একটা কেনাকাটা করে, আর গোটা দুই মসজিদ দেখেই জাহাজে ফেরে ।

শেষটায় মেব্লে'কে বললুম, ও যে-দেশে যাচ্ছে, সেখানকার লোক লাঞ্চ, ডিনার আরম্ভ করে তেতো জিনিস দিয়ে । প্রাচ্যের সঙ্গে মোলাকাত-দাওয়াতের আরম্ভেই পোর্ট সঙ্গদের উচ্ছেভাজা যদিও অনেক বুড়বুড়দের কাছে সেই বস্তুই ক্রিসমাসকে লেডি ক্যানিং বলে মনে হয় ।

পোর্ট সঙ্গদ মিশরের প্রতীক নয়, বোম্বাইকে বরঞ্চ ভারতবর্ষের শহর বলা চলে । তাই যখন বোম্বাই দেখে মেব্লে' খুশি হলো, তখন আমার ভয়-ভাবনা অনেকখানি কেটে গেল । যদিও সে বেচারী বোম্বাইয়ের রাস্তায় হাঁতি সাপ আর গৌরীশঙ্করের জন্তু এদিক-ওদিক তাকিয়ে, দেখতে না পেয়ে একটু মন-মরা হয়েছিল বৈকি ?

বোম্বাইয়ে নেমেই ধরতে হল কলকাতা মেল । সেখানে নেমে

তড়িঘড়ি ফের শেয়ালদা—গোয়ালন্দ-চাঁদপুর হয়ে মধুগঞ্জে। মেবল্ অভিবৃত্তের মতো গাড়িতে জানালার কাছে বসে, গোয়ালন্দী জাহাজে ডেক-চেয়ারে খাড়া হয়ে ছুঁচোখ দিয়ে 'বাইরের' দৃশ্য ঘের্ন গিলছিল। তার কাছে সবই নূতন, সবই বিচিত্র। তার আনন্দে কিন্তু কাঁটা ফোঁটাত তোমাদের দেশের দারিদ্র্য। স্টেশনে স্টেশনে ভিখিরি দেখে দেখে শেষটায় বেচারী অশ্রু দিকে মুখ ফেরাত। বরঞ্চ আমি আয়ার-ল্যাণ্ডের ছেলে, ইংরেজ রাজত্বের ফলে আমার দেশে কী হয়েছে, সে সম্বন্ধে আমি কিছুটা সচেতন, কিন্তু লণ্ডনের মেয়ে মেবল্ এ-সব জ্ঞানবে কী করে? আবার সব দারিদ্র্যের জন্ত কেবল ইংরেজই দায়ী, এই সহজ সমাধানই বা তাকে বলি কী প্রকারে? ভাবলুম, মেবল্ বোকা মেয়ে নয়, নিজের থেকেই আন্তে আন্তে সবকিছু বুঝে নেবে।

মধুগঞ্জ আর আমাদের বাঙালোটি দেখে মেবল্ মুগ্ধ—ঠিক একদিন আমি যে রকম মুগ্ধ হয়েছিলুম। 'আম, 'জাম, 'নিম, 'লিচু গাছের কোনোটাই সে কখনো দেখে নি। খানার টেবিলে যে-সব ফল রাখা হল, তারও সব কটাই তার অজানা। 'কারি' যে এক নয়, 'দশ-বিশ রকমের হয়, সে কথা মধুগঞ্জে এসে প্রথম শুনল। এ-সব দেখে শুনে মেবলের বিশ্বাস হল, অ্যালিস ইন ওয়াণ্ডারল্যাণ্ডে ওয়াণ্ডার করবার মতো কিছুই নেই।

এ-সব জিনিস তোমাকে এত খুঁটিয়ে খুঁটিয়ে বলছি কেন সোম? একটু পরেই বুঝতে পারবে।

অ্যাক্স-অঁ-প্রভাঁস ছাড়ার পর মধুগঞ্জে এসেই আমাদের সত্যকার হনিমুন আরম্ভ হল। হনিমুন! হায় ভগবান, না'শয়তান—কাকে ডাকবে?

'এক মাস ধরে 'প্রতি'রাত্রে যে মর্মান্তিক সত্য আমার সর্বাঙ্গে চাবুক মেরে গেল, তার মূল 'ট্রাজেডি—আমি 'নিবীর্ষ—ইম্পোটেট। 'মেবল্কে যৌনতৃপ্তি দেবার ক্ষমতা আমার নেই।

কথাটা কত সহজে বলা হয়ে গেল। এ রকম সহজ কথা শোনা

তোমার আমার ছুজনেরই অভ্যাস—পুলিসের লোক হিসেবে। জজ কত সহজ সরল ভাষায় আসামীকে বলেন, ‘তাই তোমার ফাঁসি।’ কিন্তু সে কি তখন তার পূর্ণ অর্থ বুঝতে পারে ? পরেও কি পারে ? এর অর্থ তাকে বুঝতে হয় প্রাণ দিয়ে এবং প্রাণ দেবার পর বোঝাবুঝির রইলই বা কী ?

আমি ইম্পোস্টেট। রায়টা কত সহজ। কিন্তু এর সম্পূর্ণ অর্থ আমি এখনো বুঝি নি। দিনে দিনে পলে পলে পদাঘাত খেয়ে খেয়ে যেটুকু বুঝতে পেরেছি সে জিনিস আমি তোমাকে কিংবা এ সংসারের অন্ত কাউকে বোঝাব কী করে ? আমার যেদিন ফাঁসি হবে সেদিন আমি বোঝাবুঝির বাইরে চলে যাব বটে, কিন্তু তোমরা হয়তো সেই দিনই খানিকটে বুঝতে পারবে।

‘পনেরো দিন পরে তাই আমি কলকাতা গিয়েছিলুম, ডাক্তারদের কাছে। তাঁরা অনেক পরীক্ষা করে যা বললেন সেটাও অতি সহজ।’ নিজের থেকে যদি না সারে তবে ঔষুধপত্র কিছুর হবে না। কলকাতার ‘ডাক্তারদের’ হাইকোর্টে আমার মৃত্যুদণ্ড বহাল রইল।

ফিরে এসে যখন শুনলুম তুমি রটিয়েছ আমি কলকাতা গিয়েছি সরকারী কাজে তখনই বুঝতে পারলুম, তোমার ‘আনক্যানি ষষ্ঠবুদ্ধি’ দিয়ে তুমি বুঝতে পেরেছ কিছুর একটা হয়েছে এবং আর পাঁচজন যেন তার কোনো ইঙ্গিত না পায় তাই ও গুজবটা রটিয়েছ। ‘ধ্যাক্স’।

এত সরল জিনিস, কিন্তু আমার কাছে এখনো এটা রহস্য।

আমি দেখতে ভালো, সৌন্দর্যবোধ আমার আছে, আমি প্রাণবান পুরুষ, আমার স্বাস্থ্য ভালো, আবার জোর দিয়ে বলছি, সোম, আমার মতো স্বাস্থ্য পৃথিবীর কম লোকই পেয়েছে, আমার অর্থের অভাব নেই, বিলাসেও আমার ঝোক নেই, পাঁচজনের তুলনায় আমাকে বোকা বলা যেতে পারে না, এবং সবচেয়ে বড় কথা মেবলের মতো সুন্দরী, প্রেমময়ী রমণী আমি পেয়েছি প্রিয়রূপে পত্নীরূপে, সে আমাকে তার সমস্ত সম্ভা দিয়ে ভালোবাসে, আমাকে সে হৃদয় দিয়ে বরণ করে নিয়েছে—

এই পরিপাটি প্যাটার্নটি বোনার পর ভগবানের এ কি নিষ্ঠুর ঠাট্টা না'শয়তানের অট্টহাসি ! এই পাকফেক্ট প্যাটার্নটির উপর কে যেন ছড়িয়ে দিলে নিষ্পাপ শিশুকে হত্যা করে তার তাজা রক্ত । তোমাদের ভাষায় বলতে হলে, সুন্দর দুর্গাপ্রতিমা বহু যত্নে তৈরি করার পর তার উপর কে যেন ছিটিয়ে দিলে গোরক্ত । মর্মর মসজিদের মেহরাবে নাপাক শুয়রের খুন !

কেন, কেন, কেন ?

আমি কোনো উত্তর পাই নি ।

অনেক ভেবেছি । অনেক ভেবেছি বললে অল্পই বলা হল । আট বছর ধরে ঐ একটি কথাই ভেবেছি বললে ভুল বলা হবে না । কাজকর্মে লিপ্ত থাকার সময় আমার চেতন মন এ সমস্যা ভুলে যেত সত্য, কিন্তু হাতের কাজ শেষ হওয়া মাত্রই মন আবার সেই প্রশ্নে ডুব মারত । এখনো মারে । আমার এ জীবন-চৈভণ্ডের শেষ মুহূর্ত পর্যন্ত আমার মন ঐ কথাই ভাবে । আমি শেষ দিন পর্যন্ত 'ইডিয়ট' 'ইম্বেসাইলের মতো খাদ্য শুধু চির্বিবেছে বাব, কখনো 'গিলতে পারব না । এই যে পাঁচ লক্ষ্য ক্যাণ্ডল-মাইটের জোর সার্চলাইট আমার চোখের উপর জ্বলছে সেটাকে কখনো সুইচ-অফ করতে পারব না ।

• নিরাশ হয়ে আমি এক বৎসর ধরে অনেক 'ধর্মগ্রন্থ পড়েছি । কিন্তু কিছুই বুঝতে পারি নি । 'সব ধর্মই দোখ সন্ধান করে একই বস্তু—তার নাম 'স্মালভেশন, 'মোক্ষ, 'নির্বাণ, 'নজাত । কিন্তু আমি তো স্মালভেশন চাইছিনে ? আট বছরের বাচ্চা কি সুন্দরী কামনা করে ?

তোমরা অর্থাৎ 'প্রাচ্যের লোকই তাঁর ধর্ম বানিয়েছে । আমরা 'পশ্চিমের লোক কী এক অদ্ভুত যোগাযোগের ফলে তারই একটা 'খ্রীষ্টধর্ম গ্রহণ করেছি । কিন্তু মনে হয়, স্মালভেশন জিনিসটির প্রতি আমাদের ক্ষুধা নেই বলে আমরা ধর্মটা নিরেও নিই নি ।

তা না হলে এদিকে বলছি, কেউ ডান গালে চড় মারলে বাঁ গাল এগিয়ে দেবে, ওদিকে দেখো জর্মনদের মারার জ্ঞা আমরা শত শত কৌশল বের করছি, লক্ষ লক্ষ লোক মারছি। শুধু কি তাই? 'ডান গালে চড় মারলে বাঁ গাল এগিয়ে দেবে,' এ ধর্মে যে লোক বিশ্বাস করে না তাকে এটা গেলাবার জ্ঞা কত শার্লমেন, কত পোপ কত লোককে মেরেছে! পাদ্রীটিলার বুড়ো জোনকে বাদ দাও। বাদবাকি মিশনারিরা কী করছে? অসহায় নিকুপায় নিগ্রোদের জীবন অতিষ্ঠ করে তাদের ক্রীশ্চান বানাচ্ছে।

শুধু একটা ধর্মে আমি কিছুটা হৃদিস পেয়েছি। এবং আশ্চর্য সে ধর্মে আজ পৃথিবীতে বিশ্বাস করে বড় জোর দশ লক্ষ লোক। 'পার্সীদের ধর্ম, জরথুষ্ট্রী ধর্ম।

জরথুষ্ট্র বলেন, সৃষ্টির প্রথম থেকেই আলো-আঁধারের দ্বন্দ্ব। গালের প্রতীক আলুর মজদা—আমাদের ভাষায় ভগবান—আর অন্ধকারের প্রতীক আহিরমন—আমাদের ভাষায় শয়তান। জরথুষ্ট্রীদের মতে যারা আলুর মজদার পক্ষে তাদের বিশ্বাস, শেষ পর্বন্ত এ যুদ্ধে জয়ী হবেন তিনিই। আহিরমন আলুর মজদার সঙ্গে পেরে উঠবে না।

সংসারে যা কিছু সত্য শিব সুন্দর তা আলুর মজদার সৃষ্টি আর যত কিছু মিথ্যা, অমঙ্গল, কদর্ষ তা আহির মনের।

তবে কোন্ সুস্থ মানুষ এই শয়তানের পক্ষ নেবে?

সেই তো মজা সোম, সেই তো মজা।

দেখো নি, এ সংসারে উন্নতির জ্ঞা, স্বার্থের খাতিরে মানুষ কতখানি 'মিথ্যাচারী,' ক্রুর, 'মিত্র' হয়। আমরা পুলিসের লোক, আমাদের বিশ্বাস এই ধরনের লোকই পৃথিবীতে বেশি। এরা মুখে ভগবান আলুর মজদাকে মানে, পুজো চড়ায়, শিরনি বিলোয়, গির্জাতে মা-মেরির সামনে মোমবাতি জ্বালে, কিন্তু আসলে কি এরা আহির মনকেই জীবনদেবতারূপে বরণ করে নেয় নি? আপন জানা-

অজানায় এরা কি মেনে নেয় নি যে সুদূর ভবিষ্যতে যা হবার হবে, মজদা জিতুন আর মনই জিতুন, আমার এ জীবনকালে যখন দেখতে পাচ্ছি 'ক্রুর কঠিন' মিথ্যাচারী না হয়ে আমি সাংসারিক 'উন্নতি করতে পারব না তখন আর গত্যন্তর কী ?

এদের সবাইকে আমি দোষ দিইনে, সোম । কাচ্চা-বাচ্চা রয়েছে, তাদের খাওয়াতে পরাতে হবে, আত্মীয়স্বজন বন্ধু-বান্ধবের কাছে বিশেষ করে স্ত্রীর কাছে—যে তোমাতে সম্পূর্ণ আত্মসমর্পণ করে বসে আছে—, প্রতিদিন মাথা হেঁট করে স্বীকার করা যে আমি 'জীবনযুদ্ধে হেরেই চলেছি—কে শুনতে চায় সত্যাবলম্বন করে কিংবা না করে—এ কর্ম কি সহজ ?

তবেই দেখো সোম, পৃথিবীতে অধিকাংশ লোকই এ যাবৎ কার্ষত স্বীকার করে নিয়েছে যে, উপস্থিত আহির মনই শক্তিশালী, তাকে না মেনে উপায় নেই । এমন কি তাদের একটা 'বনাফাইডি' 'ডিপেন্‌স্' পর্যন্ত রয়েছে । শেষ বিচারের দিন যখন আল্লর মজদা এদের শুধাবেন, 'তোমরা আহির মনের পক্ষ নিয়েছিলে কেন ?' উত্তরে তারা ক্ষীণকণ্ঠে বলবে—স্পষ্ট দেখতে পাচ্ছে তখন তিনিই শক্তিশালী—'তখন, হুজুর, তিনিই ছিলেন শক্তিশালী, তাঁকে না মেনে উপায় ছিল কি ?' এটা কি খুব সহজত্তর ? কেন ভেবে দেখো, গ্রামের জুলুমবাজ জমিদারের 'ভয়ে যখন প্রজারা 'মিথ্যা' 'সাক্ষ্য দেয় তখন তুমি কি সব সময় 'ধর্মের শোলোক্' কপচাও ?'

কিন্তু আমার জীবনে এ দর্শনের প্রয়োগ কোথায় ?

পৃথিবীর সর্বত্র প্রাচীন শাস্ত্রেই আছে, অতি পূর্বযুগে নাকি একবার এক বিরাট বন্যা হয়েছিল ; প্রাচীন আসিরীয় বাবিলনীয় প্রস্তরগাত্রে সে ঘটনায় কথা খোদাই করা আছে, বাইবেলে তার বর্ণনা আছে, তোমাদের শাস্ত্রেও আছে 'কেশব তখন 'মীন-শরীর ধরে 'বেদ' বাঁচিয়েছিলেন, অর্থাৎ সে বন্যায় তোমাদের সভ্যতা সংস্কৃতি ভেঁসে যায়নি, কোনো এক মহাপুরুষ তার শ্রেষ্ঠতম জিনিস বাঁচাতে পেরেছিলেন ।

এই বন্যা নিয়ে একটি আধা-খ্রীষ্টানী আধা-মুসলমানী গল্প আছে।

সেই বন্যা আসার পূর্বে জৈহোভা তখনকার দিনের পয়গম্বর নূহকে ডেকে বললেন, বন্যায় সব ভেসে যাবে, তুমি একটা নৌকো বানিয়ে তাতে পৃথিবীর সব গাছ, ফুলের বীজ এবং যত প্রকারের প্রাণী এক-এক-জোড়া করে রেখো। বন্যার পর তাই দিয়ে পৃথিবী আবার আবাদ করবে। সাবধান, কিছু যেন খোয়া না যায়।

নূহ তাই করলেন, কিন্তু বন্যার পর দেখেন কী, ইঁহুরে তাঁর আঁড়ুরের বীজ খেয়ে ফেলেছে। আঁড়ুর ফলের রাজা। গোঁজা-মিল দিয়ে সে ফলটা হারিয়ে যাওয়ার কেছা তিনি চাপা দিতে পারবেন না। তারি বিপদে পড়লেন।

ওদিকে কিন্তু ছঁশিয়ার শয়তানও সব মাল এক-এক প্রস্তুত করে রেখেছিল। সে তখন নূহকে তার বাঁচানো আঁড়ুরের বীজ দেবার প্রস্তাব করলে—তার বীজ তো আর ইঁহুর শয়তানি করে খেতে পারে না—অবশ্য কুমলতব নিয়ে। নূহের মনেও ধোঁকা ছিল, কিন্তু তিনি তখন নিরুপায়—বে-আঁড়ুর ছনিয়া নিয়ে তিনি আল্লাকে মুখ দেখাবেন কী করে ?

পৃথিবীর জমিতে শয়তানের স্বভব নেই। তাই শর্ত হল, নূহ দেবেন জমি, শয়তান দেবে আঁড়ুরের বীজ। গাছের তদারিকও ৫০-৫০।

নূহ তো যত্ন করে সকাল সন্ধ্যা চারার গোড়ায় ঢালেন স্মিষ্ট, সুগন্ধি বসরাই গোলাপজল আর শয়তান ঢালে গোপনে গোপনে না-পাক শুয়রের রক্ত।

নূহের পাক পানির ফলে, ফলে উঠল মিষ্টি আঁড়ুর ফল। আঁড়ুরের মতো ফল পৃথিবীতে আর নেই। কিন্তু শয়তান যে দিয়েছিল না-পাক চীজ ; তারই ফলে আঁড়ুর পঁচিয়ে তৈরী হয় মদ। সেই মদ খেয়ে মানুষ করে মাতলামো, যত রকমের জষণ পাপ।

আহর মজদা আমার জীবনের প্যাটার্ন গড়েছিলেন অতি যত্নে ভালো কোনো রঙই তিনি সে প্যাটার্নে বাদ দেন নি, সেকথা তোমাকে পূর্বেই বলেছি ।

আহির মন আড়ালে দাঁড়িয়ে মুচকি মুচকি হাসছিল । সে তার শক্তি সম্বন্ধে সচেতন । প্যাটার্ন যখন শেষ হবার উপক্রম তখন সে তার ভিতর ছেড়ে দিল মাত্র একটি পোকা, এক রাত্রেই প্যাটার্ন কুটিকুটি হয়ে গেল ।

বিশ্বকর্মা তিন ভুবনের সুন্দর সুন্দর জিনিস নিয়ে তিলে তিলে গড়লেন অনবচ্ছা তিলোত্তমা । আহির মন তার রক্তে ঢেলে দিল গলিত কুষ্ঠের ব্যাধি ।

এ প্যাটার্ন রিপু-করা, এ গলিত কুষ্ঠকে নিরাময় করা আহর মজদার মুরদের বাইরে ।

১৮ই আগস্ট

যৌবনে বেঁচে থাকার আনন্দেই (জোয়া ছ ভিভ্) মানুষ এত মত্ত থাকে যে, মোক্ষের সন্ধান সে করে না । শেলি না কে যেন বলেছেন,

I have drunk deep of joy

And I will taste on other wine to-night.

যখন মানুষ সে আনন্দ থেকে বঞ্চিত হয়, অথবা যখন বৃদ্ধ বয়সে মৃত্যুর সম্মুখীন হয়ে ভয় পায় তখনই সে ও-সব জিনিস খোঁজে । এ-কথা শুধু ব্যক্তির পক্ষে সত্য নয়, গোটা জাতির পক্ষেও খাটে । তোমাদের জাতি যে কত পুরনো সেটা শুধু এই তত্ত্ব থেকেই স্পষ্ট বোঝা যায় যে তোমরা মোক্ষের অনুসন্ধান আরম্ভ করেছ খ্রীষ্ট-জন্মের পাঁচ শ কিংবা হাজার বছর পূর্বে । মুসলমানরা করল খ্রীষ্ট-জন্মের প্রায় ছ শ বছর পরে । তাই দেখো, এই মধুগঞ্জের মুসলমানরাই তোমাদের তুলনায় ফুর্তি-ফার্তি করে বেশি ; কামায় ঢাকাটা, খঁচা করে পাঁচ সিকে ।

আইরিশম্যানদের কাছেও মোক্ষ-সন্ধান এসেছে সম্প্রতি—তাও পাঁচ হাত হয়ে, ঘষা-মাজা খেয়ে। তাই আমার জীবনে না ছিল মোক্ষ-সন্ধানের জাতীয় ঐতিহ্য, না ছিল কণামাত্র ব্যক্তিগত প্রয়োজন। যে সব ধর্মের কথা এসে যাচ্ছে সেগুলোর অনুসন্ধান আমি করেছি আহির মনের মার খেয়ে। এবং যে সব মীমাংসায় পৌঁছেছি (তার কটা সম্বন্ধেই বা আমি সম্পূর্ণ নিঃসন্দেহ?—সম্পূর্ণ সত্য তো ভগবানের হাতে, মানুষের চেষ্টা তো ক্রমাগত যতদূর সম্ভব কাছে আসবার—) সেগুলো মাত্র কিছুদিন হল।

তাই আমার এ ‘জ্বানবন্দিতে’ আছুর মজদা, আহির মনের কথা আসা উচিত ছিল হয়তো সর্বশেষে। কিন্তু তা-ই বা বলি কি করে? আমরা ইতিহাস লিখি ক্রনোলজিকালি—কোন ঘটনা আগে ঘটেছিল, কোনটা পরে সেই অনুযায়ী। কিন্তু অভিধান লেখার সময় অ্যালফাবেটিকালি; যে শব্দ পৃথিবীতে প্রথম জন্ম নিয়েছিল সেইটে দিয়েই আমরা অভিধান লেখা আরম্ভ করিনে। আমার জীবন অভিধান তো নয়ই, ইতিহাসও নয়। আমি মরে যাওয়ার পর আমার জীবন তোমার কাছে ইতিহাসের রূপ নেবে। ইতিহাসের বর্তমান থাকে না, ভবিষ্যৎ নেই, তার আছে শুধু ভূত। আমি বেঁচে আছি, কাজেই আমার ভবিষ্যৎ আছে, কিন্তু সে থেকেও নেই আর ভূত আর বর্তমান এমনভাবে জড়িয়ে গিয়েছে যে, তার জট ছাড়িয়ে পাকাপাকি কালানুক্রমিকভাবে সব কিছু বলতে পারব না।

আহির মনকে স্বীকার করে আমি অধর্ম করেছি? অধর্ম অন্য় যাই করে থাকিনে কেন, আমি কিন্তু ভগ্নামী করি নি। সে-ই আমার সব চেয়ে বড় সান্দনা। কিন্তু আবার দেখো, আরেক নূতন ডিলেমায় পড়ে গেলুম। আমি যদি ভগ্নামী ঘৃণা করি তবে আমি আবার আছুর মজদাপন্থী হয়ে গেলুম! ভগ্নামী তো আহির মনের, সত্যনিষ্ঠা মজদার। এ দ্বন্দ্বের কি অবসান নেই?

হয়তো আছে হয়তো নেই। তাই হয়তো তখন অন্তরের দ্বন্দ্ব মূলতবী রেখে দেখতে হয় কর্মক্ষেত্রে মানুষ কী করে। সেখানে তো মানুষকে অহরহ ডিসিশন—মীমাংসা, নিষ্পত্তি—করতে হয়। এ সংসারে সকলের ভিতরেই কিছু না কিছু 'হামলেট' লুকিয়ে আছে যে 'সর্বক্ষণ 'টু বি অর নট টু বি'র 'সন্দেহ-সমুদ্রে দোহুল দোলায় দোলে, কিন্তু সঙ্গে সঙ্গে ডন কিক্সট্রও রয়েছে যে ক্ষণমাত্র চিন্তা না করে, নাঙা-তলোয়ার হাতে নিয়ে যাকে তাকে তাড়া লাগায়—আমরা যাকে বলি 'বার্কস আপ দি রঙ্ ট্রী—যে গাছে বেড়াল ওঠে নি তারই তলায় দাঁড়িয়ে উপরের দিকে তাকিয়ে করতে থাকে খেউ-খেউ।

বেচারী মেব্ল! সে আমার 'ডন কিক্সট্র' রূপটাই চিনত। লগুনে অ্যাক্স-আঁ-প্রভাসে কিছুটা ঘটলেই আমি তড়িঘড়ি অ্যাকশন নিয়ে তার একটা সমাধান করে দিতুম। ভুল যে করি নি তা নয়। একটা ঘটনার কথা বলি। অ্যাক্সের বনে গিয়েছি মেব্লকে নিয়ে বেড়াতে। হঠাৎ শুনি 'নারীকণ্ঠে পরিত্রাহি চিৎকার। ছুটে গিয়ে দেখি এক ছোকরা একটা মেয়েকে জাবড়ে ধরে চুমো খাবার চেষ্টা করছে আর মেয়েটা—বাপরে বাপ সে কী তীক্ষ্ণকণ্ঠ—'টেঁচাচ্ছে। আমি 'ডন কিক্সট্রের মতো ছোঁড়াটার 'কলার ধরে দিলুম হ্যাঁচকা টান আর গালে গোটা 'ছই চড়। মেয়েটা আমার দিকে তাকালে। আমি ভাবলুম, সে বুঝি আমার 'শিভালরির কদর জানাতে গিয়ে আমাকেই না চুমো খেয়ে বসে! কী হল, জান, সোম? মেয়েটা দৃঢ়পদে এগিয়ে এল আমার কাছে। তারপর বলা-নেই কওয়া-নেই, 'ছহাত দিয়ে 'ঠাস ঠাস করে মারলে আমার গালে—ছোঁড়াটার গালে নয়, 'আমার গালে—'গণ্ডা পাঁচেক চড়! মোজা বুলুনির স্পীড়ে। আমি তো বিলকুল বেকুব। তারপর মেয়েটা ছোঁড়াটার হাত ধরে হনহন করে 'চলে গেল বনের ভিতর।

মেব্ল শেষ অঙ্কটা দেখতে পেয়ে মাটিতে গড়াগড়ি দিয়ে হাসছিল।

কী করে জানব, বলো, কোন্টা প্রেমের 'ছাকরামোর চিৎকার' আর কোন্টা 'ধর্ষণভীতির সক্রমণ আর্তরব' ! একেই বলে 'বার্কিঙ' আপ দি রঙ্ টী !

সেই আমি কলকাতার ডাক্তারদের শেষ রায় শুনে ফিরে এলুম মধুগঞ্জে। মেব্লকে আদর না করে ঝুপ করে বসে পড়লুম ডেক-চেয়ারে ঘণ্টা তিনেকের তরে। ডন তখন ছামলেটের রূপ নিতে আরম্ভ করেছে। মেব্ল তখন আমার কপালে হাত বুলিয়ে আদর করছিল—আমি সাড়া দিই নি।

সব কথা মেব্লকে খুলে বলার প্রয়োজন হয় নি। কলকাতা থেকে ফিরে আসার পর আমি তার গাত্র স্পর্শ করছিলাম দেখেই সে সমস্ত ব্যাপার নিশ্চয়ই বুঝে নিয়েছিল। পরের দিন ভোরবেলা দেখি, মেব্ল ঘরে নেই। বারান্দায় পেলুম তাকে, একটা মোড়ার উপর দুহাত দিয়ে মুখ ঢেকে বসে আছে। আমি তার মাথায় হাত বুলিয়ে দেবার সাহস পর্বস্তু করতে পারলুম না।

তোমাদের দেশে নাকি নিষ্কাম প্রেমের আদর্শ আছে। যৌনক্ষুধাকে অবহেলা করে তোমাদের বহুলোক জীবনধারণ করে। আমাদের ক্যাথলিক পাদ্রী আর মিস্টিকরা রমণী-সঙ্গ কামনা করে না, তোমাদের বিধবারা যে রকম যৌনক্ষুধার নিবৃত্তি করে থাকেন। কিন্তু সঙ্গে ঐরা সর্বপ্রকার প্রেমকেও কাঁটার মতো দেহ-মন থেকে তুলে দূরে ফেলে দেন। তাঁদের শুধু লড়তে হয় শারীরিক প্রলোভনের সঙ্গে। আমার বেলা তো তা নয়, আমি ভালোবাসতে পারি, বাসিও, কিন্তু শরীর দিয়ে বাসতে পারব না। সেও হয়তো অসম্ভব কঠিন মনে হত না যদি মেব্ল আর আমি একসঙ্গে প্রতিজ্ঞা করে নিতুম। আমরা আমাদের প্রেম দেহের স্তরে নিয়ে যাব না।

তোমার মনে আছে, সোম, তোমার আমার সামনে আমাদের জেলের একটা ঘটনা ? স্বদেশী কয়েদীকে শেষ বিদায় দিতে এসেছে তার স্ত্রী, বাচ্চাকে কোলে করে। বাপ চেয়েছিল ছেলেকে কোলে

নিতে, বাচ্চাটাও মায়ের কোল থেকে ঝাঁপ দিচ্ছিল বাপের দিকে ।  
মাঝখানে লোহার জাল ।

আমরা ছুজনাই সে জায়গা ছেড়ে চলে এসেছিলুম । অবাস্তর, তবু যখন সুবাদটা এল তাই বলি, পরে আমার কাছে খবর এল, তুমি নাকি গোপনে তাদের মিলনের ব্যবস্থা করে দিয়েছিলে । খবরটা আমাদের দিয়েছিল জেলার, আরো গোপনে—তোমার বিরুদ্ধে আমাকে তাতানোর জন্ত । আমার ইচ্ছে হচ্ছিল, ব্যাটাকে ধরে হাট্টার নিয়ে তার ঞ্চাংটো পাছায় আচ্ছা করে চাবকাই । ভাষাটা একটু অভদ্র হল, না সোম ? কিন্তু আমি তখন খুনিয়া রাগের মাধ্যম যে অভদ্র ভাষা মনে মনে ব্যবহার করেছিলুম তারই ছবছ প্রকাশ দিলুম মাত্র । আহির মনকে মেনে নিয়েও ভণ্ডামি মেনে নিতে পারি নি সে কথা আমি পূর্বেই বলেছি । সে কথা থাক ।

আমার অবস্থা তখন আরো কঠোর । আমার আর মেবলের মাঝখানে যে জাল রয়েছে সেটা একদিন ছিন্ন হয়ে গেলে যেতেও পারে—কলকাতার ডাক্তাররা সেই অতি 'ক্ষীণ' আশাই দিয়েছিল—এবং প্রতিদিন প্রতি রাত্রি সেই আশাই আমাকে মুখ ভেঙেচিয়েছে ।

নিষ্কাম প্রেমের কথায় ফিরে যাই । কাব্য যদি মানবজীবনের দর্পণ হয় তবে শুধাই তোমাদের সে দর্পণে নিষ্কাম প্রেমের কতটুকু আভাস মেলে ? রায়বাহাদুর কাশীশ্বর আমাকে দিয়েছিলেন ছুখানি 'সংস্কৃত কাব্যের ইংরেজি অনুবাদ । 'মেঘদূত আর গীতগোবিন্দ । ('পর্নোগ্রাফি আর রিয়েল আর্টের মধ্যে তফাত কী তাই নিয়ে তখন একটা মোকদ্দমা চলছিল ; রায়বাহাদুরের মতে মেঘদূত-গীতগোবিন্দ আর্ট আর মিস্টিজ অব দি কোর্ট অব লণ্ডন অপ্রীল, যদিও তাতে শরীরের খুঁটিনাটি বর্ণনা অনেক, অনেক কম ) । এ বই ছুখানিতে কী নিষ্কাম প্রেমের ছড়াছড়ি ? অল্প বইয়ে থাকতে পারে এই ভেবে আমি রায়বাহাদুরের দ্বারস্থ হই । তিনি কবুল জবাব দিয়ে বললেন, 'সংস্কৃতে নিষ্কাম প্রেমের বলাই নেই, সে বস্তু এসেছে মুসলমান আগমনের পর বাঙলা-হিন্দীতে ।

খুব সম্ভব সূফীদের নিষ্কাম প্রেম থেকে এ বস্তু এ-দেশে পাচার হয়েছে। আমি তা হলে বলব, তোমরা যতদিন ভিরাইল, বীর্ষবান ছিলে ততদিন নিষ্কাম প্রেম সম্বন্ধে ছিলে সম্পূর্ণ অচেতন। নিষ্কাম প্রেম অনৈসর্গিক। কিন্তু থাক তোমাদের হিন্দুশাস্ত্র। আমি ক্রীষ্টানের ছেলে। আমি বরঞ্চ বাইবেলে যাই।

আমি বিলক্ষণ জানি বুড়ো পাদ্রী তোমাকে অনেক বাইবেল উপহার দিয়েছেন, বছবার তোমাকে বইখানা পড়বার জন্ত অমুরোধ করেছেন, কিন্তু তুমি পড় নি। কাজেই যে কটি লাইন তোমাকে শোনাব সেগুলো তুমি আগে কখনো শোন নি।

**“How beautiful are thy feet with shoes, O prince’s daughter !! the joints of thy thighs are like jewels, the work of the hands of cunning workman.**

**Thy navel is like a round goblet, which wanteth not liquor ; thy belly is like an heap of wheat set about with lilies.**

**Thy two breasts are like two young rose that are twins.**

**Thy neck is a tower of ivory ; thine eyes like the fishpools in Heshbon, by the gate of Bathrabbim : thy nose is as the tower of Lebanon, which looketh toward Damascus.**

**Thine head upon thee is like Carmel, and the hair of thine head like purple ; the king is held in the galleries.**

**How fair and how pleasant are thou, O love for delights !**

**This thy stature is like to a palm tree, and thy**

breasts to clusters of grapes.

I said, I will go up to the palm tree, I will take hold of the boughs thereof : now also thy breasts shall be as clusters of the vine, and the smell of thy nose like apples ;

And the roof of thy mouth like the best wine for my beloved, that goeth down sweetly, causing the lips of those that are asleep to speak.

I am beloved's, and his desire is towards me."

কী গভীর, হাউ সাবলাইম ! পাশবিক যৌনক্ষুধাকে সৃষ্টির কী মহিমময় অনিন্দ্যসুন্দর নন্দনকাননে তুলে নিয়ে গেল তার স্বর্ণপঙ্ক দিয়ে এ কবিতা ! এ যৌনক্ষুধা নন্দনের সুধায় সিঞ্চিত না থাকলে এর বর্ষণে ইন্দ্রপুরীর হাসি মুখে মেখে নিয়ে দেবশিশুরা মর্ত্যে অবতীর্ণ হ'ত কী করে ?

বিরাত বাইবেলে এই একটিমাত্র প্রেমের কবিতা ছিটকে এসে পড়েছে। কী করে পড়ল তার সছত্তর কোনো পণ্ডিত এখানে দিতে পারেন নি। তাই বোধ করি তাঁরা ধমক দিয়ে বলেন, এ প্রেম রূপক-রূপে নিতে হবে, এ প্রেমের সঙ্গে মানব-মানবীর প্রেমের কোনো সম্পর্ক নেই—এ প্রেম নাকি 'দি মিউচেল লাভ অব ক্রাইস্ট আণ্ড হিজ চার্চ' বর্ণনা করেছে। চার্চের বড় কর্তা স্বয়ং পোপ। এখানে আমি পোপের স্বার্থায়েষী করাঙ্গুলি-সঙ্কেত দেখতে পাই।

তোমাদের আদিরসাত্মক 'কামরসে-ঠাসা' বৈষ্ণব কবিতাও নাকি শুধু বৈকুণ্ঠের দেবদেবীর জন্ত। সেগুলোকেও নাকি প্রতীক হিসেবে নিতে হয়। এখানে কার স্বার্থ লুকানো আছে জানিনে।

আমি মানিনে। আমার দৃঢ় বিশ্বাস এ-সব কবিতা শব্দার্থে নিতে হবে। যৌন সম্পর্ক জীবনের অন্ততম গভীর সত্য। তাকে স্বীকার করে আমাদের কবিরা সত্যকে স্বীকার করেছেন মাত্র। এতে কোনো

• দুঃসাহস বা মূঢ়তার প্রশ্ন ওঠে না। তোমাদের কোনো মন্দিরে }  
 যৌন সম্পর্কের নগ্ন প্রস্তরমূর্তি দেখে কেউ কেউ আশ্চর্য হয়। আমি }  
 হইনে। 'কাব্যে যে সত্য কবির অকুণ্ঠ ভাষায় বর্ণনা করে স্বীকৃতি }  
 দিয়েছেন, শিল্পী প্রস্তর-গাত্রে সেটা খোদাই করবে না কেন ? }

তুমি বলবে, এ-সব গুরুগম্ভীর তত্ত্বের টীকা-টিপ্পনী কাটার কী  
 অধিকার আমার ? অধিকার তবে কার ? পুরুত-পাণ্ডাদের, পাদ্রী-  
 গৌসাইদের ? কিন্তু ভগবান তো তাঁদের পকেটের ভিতর। এ-সব  
 তত্ত্ব তাঁদের কী প্রয়োজন ? গীতগোবিন্দ, বাইবেল এগুলো তো আমার  
 মতো পাপীতাপীদের জন্ম সৃষ্ট হয়েছে। যে ভক্ত ভগবানকে পেয়ে  
 গিয়েছেন তিনি মন্দিরে যাবেন কী করতে ? মন্দিরে তো যাব আমি।  
 এ-সবের মূল্য যাচাই করব আমি, অর্থ বের করব আমি।

জীবনের এই গভীরতম রহস্যাবৃত সত্যের অত্যন্ত কাছে এসে  
 পড়েছি বলেই কি আহির মন আমাকে এর অনুভূতি থেকে বঞ্চিত  
 করল ?

২০শে আগস্ট

পলে পলে তিলে তলে কত যুগ ধরে আমি কি দহনে দগ্ন হয়েছি,  
 সে শুধু আমিই জানি। এ দহন কিন্তু সময়ের মাপকাঠি দিয়ে মাপা  
 যায় না। বেদনা থেকে নিষ্কৃতি পাবার জন্ম তোমাদের সাধকেরা  
 বলেন, বেদনা আসে মনের বটলনেকের ভিতর দিয়ে, সেই মনকে তুমি  
 যদি আয়ত্তে আনতে পার তবে আর কোনো বেদনা-বোধ থাকবে না।  
 এ-তত্ত্বটা আমি যাচাই করে দেখি নি, কারণ আমার মনে হয়েছে মনের  
 বটলনেক যদি আমি বন্ধ করে দিয়ে বেদনা-বোধকে খামিয়ে দি, তবে  
 সঙ্গে সঙ্গে আনন্দবোধের অনুভূতিও আমার চৈতন্যে প্রবেশ করতে  
 পারবে না। তার অর্থ, সর্বপ্রকার অনুভূতি বিবর্জিত হয়ে জড়জগতে  
 ইঁট-পাথরের মতো শুদ্ধমাত্র খানিকটে স্পেস নিয়ে এগসিস্ট করা।  
 তাহলে আত্মহত্যা করলেই হয়। পঞ্চভূতে পঞ্চভূত মিলে গিয়ে যে

যার পরিমিত্ত জায়গা দখল করে অস্তিত্ব বজায় রাখবে। তফাত কোথায় ?

আমাদের শুণীরা বলেন, হৃদয়-বেদনা ভুলতে হলে কাজের মধ্যে <sup>দু'বি আঁক</sup> বাঁপ দাও। <sup>স্বামি হেন্স</sup> মন তখন কাজে এমনি নিমগ্ন হয়ে যাবে যে অণু কিছু ভাবতে পারবে না। আমি তাই সেই সময়ে কাজে দিলুম বাঁপ। তোমার মনে আছে নিশ্চয়ই, আমি হঠাৎ কী রকম আমার এলাকার খুন-খারাবির আদমশুমারি নিয়ে উঠে পড়ে লেগেছিলুম, এলাকার বিরাট ম্যাপ তৈরী করে বদমায়েশির জায়গাগুলোতে চক্কর কেটে কেটে তার কেন্দ্রস্থলের বদমায়েশকে ধরবার চেষ্টা করেছিলুম ; দাগী আসামী জেল থেকে খালাস পেলেই তার গ্রামকে কেন্দ্র করে চতুর্দিকের গ্রামের চুরি-চামারির সংখ্যা বেড়ে যাওয়া থেকে তোমাদের কাছে সপ্রমাণ করলুম, ঘড়েল বদমাইশ আপন গাঁয়ে বদ-কাজ করে না।

তাতে করে শুধু তোমাদের অভিষ্ঠ করে তোলা হয়েছিল। আমার কোনো লাভ হয় নি।

কাজের ভিতর সমস্ত দিন তুমি যে বেদনা-বোধকে বাঁধ দিয়ে আটকে রেখে ভাবলে বেঁচে গেছ, সে তখন কাজের অবসানে তোমার সকল বাঁধ ভেঙে লগুভগু করে দেয় তোমার সর্ব অস্তিত্বকে। পলে পলে তিলে তিলে দিনভর তুমি যদি তোমার বেদনা-বোধকে নিয়ে পড়ে থাক, তাতে যদি কাজ কিংবা অণু কোনো কৃত্রিম উপায়ে ঠেকিয়ে রাখবার চেষ্টা না কর, তবে তার ইনটেনসিটি অনেকখানি কমে যায়। কিন্তু সলমনের বোতলে ভরা জিন্ যখন সঙ্কায় নিষ্কৃতি পায়, তখন তার বেধবড় মার থেকে আর কোনো নিষ্কৃতি নেই।

সেই মার খেয়ে খেয়ে এ-পাশ ও-পাশ করে করে—যেন এ-গালে চড় খেয়ে ও-পাশ হয়ে শুই, যেন ও-গালে চড় খেয়ে এ-পাশ হয়ে শুই—রাত বারোটায় এল ঘুম। কিন্তু শয়তান তোমায় নিষ্কৃতি দেবে কেন ? ঘুম ভেঙে ঘাবে রাত ছুটোয়।

পাশের খাটে মেব্ল শুয়ে। তার সোনালী চেউ-খেলানো এলো

চুল চাঁদের আলোর সঙ্গে মিশে গিয়ে বালিশের উপর ঐকেছে বিচিত্র নক্সা। তার কপালে ঘামের একটু একটু ভেজার আভাস, চাঁদের আলো তারই উপর সামান্য চিকচিক করছে, বিলের 'ভেট'-ফুলের পাপড়ির উপর এই আলোই আমি অনেকবার দেখেছি, ভাওয়ালির জানলা দিয়ে। মেবলের হাত ছুখানি তার শরীরের হৃদিকে আলসে লক্ষ্যমান হয়ে অর্ধমুষ্টিবদ্ধ যেন ছুটি 'ভেট'-ফুলের কুঁড়ি। আর তার সমস্ত কিশোর তনু যেন গাদা করে রাখা শিউলি ফুলের পাপড়ি—হ্যাঁ, মনে পড়ে গেল শিউলি ছিল মেবলের সবচেয়ে প্রিয় ফুল।

এই গরমের দেশে শীতের দেশের মেয়েকে চাঁদের আলোতে কী রকম অদ্ভুত, রহস্যময় দেখাত। আজ যদি হঠাৎ দেখি, আমার লিচুবনের ঘন সবুজের উপর গাদা গাদা বরফ জমেছে, তাহলে যে রকম সমস্ত বাগানখানা এক অবিশ্বাস্য সৌন্দর্যে ভরে উঠবে।

মেবলের এই নিশিকান্ত সৌন্দর্য আমার আত্মার ক্ষুধাকে অনির্বচনীয় তৃপ্তিতে কত শতবার ভরে দিয়েছে। আশ্বচ্ছ ফিকে বেগনি রঙের মসলিন নাইট-ড্রেসে জড়ানো মেবলের শরীর আমার কবি-মানসের শুষ্ক মূৎপাত্রকে অমৃতরসে বার বার ভরে দিয়েছে।

কিন্তু সঙ্গে সঙ্গে জ্বালিয়ে দিত আমার সর্ব-ধমনীতে এক অদম্য যৌনক্ষুধা।

মনে আছে, সোম, তুমি আর আমি একদিন মকস্বলের এক গ্রামে নিষ্ক্রিয় ক্রোধে দাঁড়িয়ে দাঁড়িয়ে দেখলুম, সমস্ত গ্রামখানা আগুনে পুড়ে ছাই হয়ে গেল—জল ছিল না বলে আমরা নিষ্ফল আক্রোশে শুধু ছটকট করেছিলুম।

সে আগুন তবু ভালো। 'নিরন্ন' বিধবার শেষ কাঁথাখানা পুড়িয়ে দিয়ে সে আগুন তবু তো তৃপ্ত হল।

আমার এ বহিঃজ্বালার শেষ নেই। পিরামিডের উপরে দাঁড়িয়ে আমি একদিন গ্রীষ্মের মধ্যাহ্নে সাহারার মরুভূমির দূরদিগন্তের শুষ্ক তৃষ্ণার দিকে তাকিয়েছিলুম, আর তার রুদ্রমূর্তি দেখে ভয়ে ভগবানের

নাম পৰ্বস্তু ভুলে গিয়েছিলুম। আহির মন আমার সৰ্বশরীরে সেই সাহাৰার জ্বালা জ্বালিয়ে দিল।

শরীরে এ জ্বালা নিয়ে মানুষ সমাজে মিশতে পারে না। আমি ক্লাবে যাওয়া বন্ধ করে দিলুম, লোকজনের সঙ্গে দেখা-সাক্ষাৎ কমিয়ে কমিয়ে শেষটায় একেবারে আলেকজাণ্ডার সালকার্ক হয়ে গেলুম। বিষ্ণুছড়া আর মাদামপুরের মেমেদের ফৌসফৌসানি আর ছোবলা-ছুবলি থেকে বঞ্চিত হয়ে আমার কোনো কষ্ট হয় নি; কিন্তু পাদ্রী টিলার মেয়েদের কলকল উচ্চহাস্ত, তাদের লাজুক নয়নে আধা-প্রেমের ক্ষীণ আভাস আমার জীবন থেকে নির্বাসিত হয়ে তাকে করে দিল আরো ফাঁকা। কে যেন বলেছে, 'দি মোর লাইফ বিকামস্ এম্পটি দি হেভিয়ার ইট্ বিকামস্ টু ক্যারি ইট'। জীবন যতই ফাঁকা হয়ে যায়, তাকে বহন করা হয়ে যায় ততই শক্ত। বড় খাঁটি কথা বলেছে। তবু আমি জীবনের সেই শূন্য ধামা বইতে পারতুম, কিন্তু সে ধামার সৰ্বাঙ্গে ছিল বিছুটি।

খুব সম্ভব আমারই দেখাদেখি মেব্লুও বাইরে যাওয়া বন্ধ করে দিল। কী ভেবে বন্ধ করল জানিনে। তার মনের কথা কিন্তু আমি তোমাকে বোঝাতে যাব না। তার প্রতি আমি অবিচার করেছি কি না, তার বিচার একদিন হয়তো হবে, কিন্তু তার মনের কথা বলতে গিয়ে আমি যদি উনিশ-বিশ করে ফেলি তবে সে অবিচার আমাকে কেউ ক্ষমা করবে না।

আমার ভিতরকার ডন কিব্‌স্ট্র ক্রমে ক্রমে কাতর হতে হতে রোগশয্যায় পড়ল। আর আমি, ও-রেলি, আস্তে আস্তে হ্যামলেটের রূপ নিতে আরম্ভ করলুম। বরঞ্চ হ্যামলেট বক্তৃতা ঝাড়ত প্রচুর—সামঞ্জস্যম প্রভোকেশনে সে বরবর করে নানাপ্রকারের দার্শনিক রায় জাহির করত এস্তার—তোমাদের যাত্রাগানে যে রকম ক্ষীণতম প্রভোকেশনে নায়ক-নায়িকা দূরে থাক, পাইক বরকন্দাজ পৰ্বস্তু লম্বা লম্বা গান গাইতে আরম্ভ করে। আমার মুখের কথাও শুকিয়ে গেল।

বেচারী মেবল্ ! গোড়ার দিকে সে আস-কথা পাশ-কথা বলে বলে আমাকে আমার কচ্ছপের খোলের ভিতর থেকে বের করবার চেষ্টা করেছিল ; শেষটায় সে চেষ্টাও ছেড়ে দিলে ।

তখন আমি খেতে আরম্ভ করলুম মদ । মাস তিনেক দিন-রাত্তির আমি ভাঁম হয়ে পড়ে থাকতুম । বাটলার জয়সুৰ্ধ, যে কি না ধ্যানেশ্বরী মালের পাঁট জলের মতো ঢকঢক করে গিলতে পারে, সে পর্যন্ত আমার পানের বহর দেখে রীতিমত ঘাবড়ে গেল । কখনো বলে ছুইস্কি ফুরিয়ে গিয়েছে, কখনো বলে সোড়া নেই । তারপর একদিন মাতাল হয়ে তার গালে মারলুম ঠাশ ঠাশ করে চড় । সংবিতে ফিরে বড় লজ্জা পেয়েছিলাম, সোম । আমি কি অশিক্ষিত 'বক্সওয়াল' যে আমি এ রকম অশ্রায় আচরণ করব ।

মদ খেয়ে লাভ হয় নি । মদ খেলে মানুষের যৌনক্ষুধা উগ্রতর হয়, তৃপ্তির ক্ষমতা কমে যায় । আমার অতৃপ্তির আক্ষোভ তাই মদ খেয়ে কখনো কখনো বিকট রূপ ধরেছিল । তার কথা বলতে আমার ঘেন্না ধরে ।

কিন্তু আসল কথাটা আমি শুধু এড়িয়েই যাচ্ছি । আমি শুধু বোঝাতে চাই, আমি কী কঠোর যন্ত্রণার ভিতর আমার জীবনটা কাটালুম, আর সেইটে কিছুতেই প্রকাশ করতে পারছি নে ! কিন্তু এ ছুঁদেবে আমি একা নই । তোমার মনে আছে—চৌধুরীর কেসটা ? ভদ্রলোক কী শাস্ত, দয়ালু প্রকৃতির, গরীব-দুঃখীদের ভিতর তাঁর দান-খয়রাতের কথা কে না জানে ? আর কী অপূর্ব সুন্দরী ছিলেন তাঁর স্ত্রী ? দেখে মনে হত অনন্তর্যোবনা—তাঁর ছেলেমেয়ে হয় নি । তাঁর ঘাড়টির কথা তোমার মনে পড়ে কি ? রাজধানীর গর্ব নিয়ে যেন সে ঘাড় তাঁর মাথাটি তুলে ধরত । একদিন তাঁর সে ঘাড় নিচু হয়েছিল— আমি অবশ্য স্বচক্ষে দেখি নি । তাঁর স্বামী যেদিন হোমোসেক্সুয়েল কেসে ধরা পড়লেন ।

আমি কিছুতেই বিশ্বাস করতে পারি নি এ রকম সাধুলোক কী

করে এ রকম নোংরামি করতে পারি। তিনি নিজে আমার খাশ-কামরায় স্বীকার করেছিলেন বলেই শেষটায় আমার প্রত্যয় হল।

কি'বিড়ম্বিত জীবন! ভগবান ভদ্রলোককে স্বাভাবিক যৌনক্ষুধা দেন নি। তাঁর অনৈসর্গিক যৌনক্ষুধাকে তিনি অদ্ভুত বিক্রমে কত বৎসর চেপে রেখে রেখে হঠাৎ একদিন কাণ্ডজ্ঞান হারিয়ে কুকর্মটা করে ফেললেন—শুনেছি তোমাদের সাধুসন্ন্যাসীদের মধ্যেও দৈবাৎ কখনো এ রকমধারা হয়েছে। সে ঘটনা বলতে গিয়ে ভদ্রলোকের মুখে যে আত্মাবমাননার প্রকাশ দেখেছিলুম, তার দাগ আমার মন থেকে কখনো উঠবে না। ভদ্রলোক শেষটায় বলেছিলেন, 'আমাকে এখন সমাজ'ঘেন্না করবে, কুষ্ঠরোগীকে মানুষ যে রকম বর্জন করে চলে। আমি সমাজের জ্ঞান কী করেছি, সে কথা সমাজ স্মরণ করবে না—আমি তাকে দোষও দিইনে—কিন্তু আমার সতী-সাক্ষী স্ত্রী, যিনি ভাবতেন আমি ধ্যান-ধারণায় আত্মসমর্পণ করেছি বলে তাঁকে অবহেলা করি, যার পুত্রোৎপাদন-ঐঙ্গাকে পর্ষন্ত আমি সম্মান দিই নি, তিনি কী ভাববেন?'

ওঃ! এ কেসটা ধামা-চাপা দিতে তোমাকে কী বেগই না পেতে হয়েছিল। রায়বাহাদুর কাশীশ্বর যদি অযাচিতভাবে গুহ সন্ধিসুড়ক আমাদের বাতলে না দিতেন, তবে আমরা চৌধুরীকে বাঁচাতে পারতুম না। কিন্তু আমার বিশ্বাসের অবধি নেই, হিন্দু সমাজের বিরাট পাণ্ডা রায়বাহাদুর কী করে এতখানি দরাজ-দিল হলেন! তবে হ্যাঁ শুনেছি, তোমাদের সাধু-সন্ন্যাসীর ভিতরও এ রকম কিছু একটা হলে অণু সন্ন্যাসীরা তাকে খুন করে না। হিমালয়ের উত্তরপ্রদেশে তাকে পাঠিয়ে দেয়। তোমাদের ধর্ম সত্যই বড় অদ্ভুত! কত শতাব্দীর অভিজ্ঞতার ফলে তোমাদের সাধুরা কত সত্য আবিষ্কার করেছে, আর তার থেকে পেয়েছে অন্তহীন সহিষ্ণুতা।

তুমি হয়তো জান না, চৌধুরী আমাকে এখনো দক্ষিণের এক আশ্রম থেকে মাঝে মাঝে চিঠি লেখে। শুনে খুশি হবে, তার স্ত্রী তার সঙ্গেই আছেন।

‘হু বৎসর কঠোর সংযমে নিজেকে মেব্লের কাছ থেকে দূরে রেখে এক গভীর রাত্রে নিজেকে সামলাতে না পেরে আমি তার কাছে যাই। কী হয়েছিল, তোমাকে বোঝাবার চেষ্টা করব না।

‘সেই রাত্রে ভোরের দিকে মেব্ল জয়শূর্যের ঘরে যায়।

‘সেই ভোরেই সে আমার পায়ের উপর তার মাথা রেখে অনেকক্ষণ ধরে কেঁদেছিল। তার চুল ভিজে গিয়েছিল, আমার পা ভিজে গিয়েছিল। আমাদের হৃৎকেন্দ্রের মুখ দিয়ে কোনো কথাই বেরয় নি।

থাক।

২২শে আগস্ট

মেব্ল যদি মরে যেত, তবে কি আমার এর চেয়ে বেশী কষ্ট হত? বলতে পারব না।

হঠাৎ যদি আমি অন্ধ হয়ে যেতুম, তাহলে কি বেশী কষ্ট পেতুম? বলতে পারব না। তখনো বলতে পারি নি, আজও পারব না।

আমি বিমূঢ়ের মতো বসে কয়েক দিন কাটাই।

আমার মনে হয় বড় শোক যখন আসে, তখন অনেক ক্ষেত্রেই মানুষ প্রথম ধাক্কাতেই তার বেদনা পূর্ণরূপে উপলব্ধি করতে পারে না। আস্তে আস্তে যেমন যেমন দিন যায়, সঙ্গে সঙ্গে অসহায় হরিণ-শিশুর শরীরকে ঘিরে যেন পাইথনের পাশ একটার পর একটা করে বাড়তে থাকে। শুনেছি, সে নাকি তখন আর আর্তস্বরে চিৎকার পর্যন্ত করে না। শেষ পাশ দেওয়ার পর পাইথন লাগায় আস্তে আস্তে চাপ। আমি কখনো দেখি নি। আমার মনে প্রশ্ন জাগে, হরিণ কি আমার চেয়ে বেশী কষ্ট পায়?

ফাঁসির আসামীও ঘুমোয়। ঘুম থেকে ওঠা মাত্রই নাকি তার মনে পড়ে অমুক দিন তার ফাঁসি। নিজের কোল থেকে প্রাণ-রস যুগিয়ে নিয়ে মানব-শিশু যখন জাগল, তখনই তার স্মরণে এল, সেই প্রাণটি তার অমুক দিন যাবে। পড়েছি, কোমর অবধি পুঁতে মানুষকে যখন

‘পাথর ছুঁড়ে ছুঁড়ে বধ করা হয়, তখন প্রথম কয়েকটা পাথরের ঘা  
 খেয়েই সে নাকি অজ্ঞান হয়ে ছমড়ি খেয়ে পড়ে যায়। চতুর্দিকের  
 ‘নরদানবরা তখন নাকি তাড়াতাড়ি ছুটে এসে জল দিয়ে তাকে চৈতন্যে  
 নিয়ে আসে। সংবিতে ফিরে এসে সে নাকি প্রথমটায় বুঝতে পারে না;  
 সে কোথায়—ট্রেনে ঘুম ভাঙলে আমরা যে রকম প্রথমটায় বুঝতে  
 পারিনে, আমরা কোথায়। তারপর আবার ছসরা কিস্তির প্রথম  
 পাথরের ঘা খেয়েই নাকি সে সেই নির্গম সত্য বুঝতে পারে, তাকে  
 পাথর ছুঁড়ে ছুঁড়ে মারা হচ্ছে। বর্ণনায় পড়েছি, তাকে নাকি অন্তত  
 ‘বারপাঁচেক এই রকম সংবিতে ফিরিয়ে এনে এনে মারা হয়।

শুনেছি, যে লোক যতটা খুন করে, চীন দেশে নাকি তার ততবার  
 ফাঁসি হয়। কিন্তু ফাঁসি একবারের বেশী হতে পারে কী করে? তোমরা  
 এই নিয়ে একটা ঠাট্টা করো না, অমুক লোকটার তিন মাসের ফাঁসি?  
 কিন্তু তা-ও হয়। বিদগ্ধ চীনেরা তারও একটা সূক্ষ্ম প্রক্রিয়া আবিষ্কার  
 করেছে। আসামীর গলায় ফাঁস দিয়ে আস্তে আস্তে তার দম বন্ধ করে  
 আনতে আনতে তাকে অজ্ঞান করে ফেলা হয়। অজ্ঞান হওয়া  
 মাত্রই ফাঁস টিলে করে দিয়ে জল ঢেলে, হাওয়া করে তাকে ফের  
 সংবিতে আনা হয়। যে যবার খুন করেছে, তার উপর এই প্রক্রিয়া  
 ততবার চলে। প্রতিবার সংবিতে আসামাত্র তার কী মনে হয় ভেবে  
 দেখো।

ধন্য সে-সব লেখক, যাঁরা এসব মর্মান্তিক ব্যাপার রসিয়ে রসিয়ে  
 বর্ণনা করেছেন। আমার মনে হয়, হয় তাঁরা স্যাডিস্ট, নয় তাঁরা আপন  
 জীবনে, আমরাই মতো কোনো এক কিংবা একাধিক নিষ্ঠুর  
 অভিজ্ঞতার ভিতর দিয়ে গিয়েছেন।

এখনো বলছি, শারীরিক ফাঁসির সংখ্যার একটা সীমানা আছে।  
 পাঁচ-সাত বার করার পর আসামী নিশ্চয়ই আর সংবিতে ফিরে আসে  
 না—অর্ন্ততন্য অবস্থা থেকে মৃত্যুর অতল গহ্বরে ডুবে যায়। কিন্তু  
 মনের ফাঁসি, আত্মার ফাঁসির সীমাসংখ্যা নেই। বাইরে প্রকৃতিতে যে

রকম রেগুতে রেগুতে প্রতিক্ষণ কোটি কোটি নবজন্মের সৃষ্টি, একই মানুষ সেই রকম ভিতরে ভিতরে মরে কোটি কোটি বার। এবং প্রতি দুই মৃত্যুর ভিতর যে সংবিৎ, তখন সে সংবিৎ শুধু তাকে জানিয়ে দেবার জন্ত, এই শেষ নয়, এই মৃত্যুযন্ত্রণাই শেষ মৃত্যুযন্ত্রণা নয়, আরো অনেকগুলো সম্মুখে রয়েছে।

এ-সব অভিজ্ঞতার সত্যতা সম্বন্ধে তোমার মনে যদি কোনো সন্দেহ থাকে তবে তারই একটা ক্ষুদ্রতম দৃষ্টান্ত আমি তোমাকে দিতে পারি যেখানে তুমি এ-সব অভিজ্ঞতার ক্ষীণতর রূপ খানিকটে যাচাই করে নিতে পারবে।

কোনো কোনো রুগীকে সারাবার জন্ত তিন তিন বার অস্ত্রান করে অপারেশন করতে হয়। প্রথমবারে সে অতটা ডরায় না, কিন্তু প্রথম এবং দ্বিতীয় বারের মধ্যে কয়েকদিন, এবং দ্বিতীয় ও তৃতীয় বারের মধ্যে কয়েক সপ্তাহ তার কী করে কেটেছিল, সে কথা তুমি তাদের কাউকে জিজ্ঞেস করলে অনায়াসেই জেনে যাবে। তিন বারের পরও যদি সে না সারে, তখন, জান সোম, সে আর দ্বিতীয় কিস্তিতে চতুর্থবারের মতো অপারেশন করাতে সম্মত হয় না। অসহ্য যন্ত্রণায় চিৎকার করে, এদিক ওদিক লুটতে লুটতে খাট থেকে পড়ে গিয়ে যন্ত্রণা এড়াবার জন্ত আত্মহত্যা করবে বলে আকুতি-মিনতি করে বিবেক জন্ত, কিন্তু তবু আবার অপারেশন করাতে রাজী হয় না। তার সর্বক্ষণ মনে পড়ে, প্রথম অপারেশনের ক্লোরোফর্মের জড় নেশা কেটে যাওয়ার পর সে কী অসহ্য যন্ত্রণায় ছটফট করেছিল, চিৎকার করার শক্তি পর্যন্ত ছিল না, গোঙরাতে গোঙরাতে মুখ দিয়ে শুধু ফেনা বের করেছিল।

সোম, আমার কিন্তু নিষ্কৃতি ছিল না। চিন্ময় বেদনার জগতে কোনো সরকারী আইন নেই, ডাক্তারী কোড নেই যে রোগীর বিনা অনুমতিতে তার অপারেশন করতে পারবে না। আমার মুখের প্রথম অপারেশনের ফেনা শুকতে না শুকতেই আমাকে সেই দুশমনের মতো

যমদূতদর্শন ডোমেরা টেনে নিয়ে যেত অপারেশন ঘরের দিকে। সেখানে আমাকে অপারেশন করা হত অষ্টাদশ শতাব্দীর পদ্ধতিতে—যখন ক্লোরোফর্ম আবিষ্কৃত হয় নি। তারা আমাকে ছুপায়ে তুলে ধরে মাথার উপর ঘোরাতে ঘোরাতে ভিরমি খাইয়ে, কিংবা তাতেও না হলে মাথায় ডাঙশ মেয়ে অজ্ঞান করে অপারেশনের জন্ম তৈরী করত। ছুরির ঘা ক্লোরোফর্মের নেশাকে কাটতে পারে না বলে আজকের দিনে অপারেশন চলে রোগীকে যন্ত্রণা না দিয়ে। আমার বেলা কিন্তু ছুরির ঘা আমাকে সংবিতে ফিরে নিয়ে আসত আর আমি সজ্ঞানে দেখতুম, আমার উপর ছুরি চলছে। পাছে আমার বিকৃত চিংকারে সার্জেনদের অপারেশন করাতে বাধা জন্মায় তাই ডোমরা আমার মুখ চেপে ধরে রাখত। গুঙরে গুঙরে শরীর যে তার টর্চার থেকে খানিকটে—সেকত অল্প—নিস্কৃতি পাবে তার সর্ব পস্থা বন্ধ।

‘চোখের সামনে’ মেব্লুকে দেখতে হত প্রতিদিন।

‘কেন আমি তাকে খুন করলুম না’ প্রথম দিনই ?

কিন্তু তার দোষ কী ? সে তো আর আমাকে ত্যাগ করে ঐ বাটলারটাকে গ্রহণ করে নি। বন্ধ পাগলও আমাদের দুজনকে একা-সনে বসিয়ে বিচার করবে না। আমার মনে হয় বহু বাজারের মেয়েও তাকে ঘরে ঢুকতে দেবে না। কোথায় সে আর কোথায় আমি ?

ঐখানেই তো ভুল। ‘জয়সূর্যের’ থাকবার মতো কিছুই নেই, সত্য, কিন্তু তার একটা সম্পদ আছে যেটা আমার নেই। সে সম্পদ কুকুর-বেরালেরও থাকে, সে কথা বলে লাভ কী ? যে মানুষ ছ মিনিট বাদে মরবে তাকে কি এই বলে সাস্থনা দেওয়া যায়, তুমি মরে যাবার পরও অনেক কুকুর-বেরালও বেঁচে থাকবে, তাই বলে কি তাদের বাঁচাটা তোমার মরার চেয়ে বড় ? মেব্লু তো নিয়েছিলো মাত্র এইটুকুই। তাকে ও জিনিস যে কোনো পুরুষই দিতে পারত। ক্ষুধার তাড়নায় মানুষ যে রকম নর্দমা থেকে খুঁটে তুলে তুলে ভাত খায়। তাকে কি আমরা দোষ দিই ?

গোড়ার দিকে আচ্ছন্নের মতো বসে এই সব চিন্তা করেছিলুম কিন্তু তখন সব ছিল ছেঁড়াছেঁড়া ! কোনো বিশেষ চিন্তা বা যুক্তি নিয়ে সেটাকে যে তার চরম ফৈসালায় ফেলে গ্রহণ বা বর্জন করব সে শক্তি আমার ছিল না । ফড়িঙের মতো আমার মন এ-ঘাস থেকে ও-ঘাসে ক্ষণে ক্ষণে লাফ দিত, কোনো জায়গায় স্থির হয়ে বসে কোনো সিদ্ধান্তে পৌঁছতে পারত না । আজও যে পারি তা নয় । তবে কয়েক মাসের জন্ত একবার পেয়েছিলুম, এমন কি সেই অমুযায়ী কাজও করেছিলুম, এবং সেইটে বলবার জন্তই তো এই চিঠি লেখা । সে কথা পরে হবে ।

সব জেনে বুঝেও আমার মন অহরহ এক অন্ধ আক্রোশে ভরে থাকত ।

তুমি তো জানো আমাদের সিভিল সার্জন আর্মস্ট্রংয়ের মেম তার ছোকরা আরদালিটাকে মোটর-সাইক্ল কিনে দিয়েছিল । এ শহরে কে না জানত তার রসময় কারণ । ওদিকে আর্মস্ট্রং তো আমার মতো মন্দ-ভাগ্য ছিল না? মেম যখন ভারতীয় তাগড়া ছোকরার বাদামী রঙ, কালো চুল আর প্রাচ্যদেশীয় বর্বর চোখের (মাফ করো সোম, আমি তোমাকে অপমান করছি; কিন্তু আমার বিশ্বাস, তোমার দেশে খানদানীরা যে রকম আমাদের তুলনায় ঢের বেশী মার্জিত, ঠিক তেমনি তোমাদের চাষা-ভূস্বারা আমাদের মজুরদের চেয়ে অনেক বেশী প্রিমিটিভ, অনেক বেশী সেক্‌সি ) প্রাণ-মাতানো নেশায় মজে গেল, তখন গোড়ার দিকে আর্মস্ট্রং বেশ কিছুটা চোটপাট করেছিল । এমন কি, আমার মনে হয় সে ইচ্ছে করলে আরদালিটাকে তাড়িয়ে দিতে পারত - মেম আর কী করতে পারত—কিন্তু সে করে নি । আমার মনে হয়, প্রাণবন্ত স্বাভাবিক ষোঁনশক্তিশালী পুরুষ এসব ব্যাপারে অনেকখানি ক্ষমাশীল হয়, 'টু হেল, চুলোয় যাকগে,' বলে সে শাস্তমনে দৈনন্দিন জীবনযাত্রায় ফিরে যায় । ঠিক কথা, কারণ আর্মস্ট্রং গিয়েছিল তেরিয়া হয়ে, উইথ ভেন্‌জেন্স । ঐ যে, কী সে বক্সওয়ালার নাম, যে তার টিলায় কুলী মেয়েদের হারেম পুষত ? আর্মস্ট্রং তো প্রায়ই ওদিক পানে না-পান্তা হয়ে যেত ।

আবার দেখো, কিছুদিন পরে সায়েব মেম হুজনাতে ফের বেশ ভাব হয়ে গেল। আরদালি যে বরখাস্ত হল তা নয়, আর্মস্ট্রংয়ের 'হারেমগমনও বন্ধ হল না। ক্লাবে যেন তখন কোন্ এক সুরসিক বলেছিল, 'সিভিল সার্জন পরিবার' দিশী-বিদেশী' ছুই খানাই পছন্দ করেন।

এ হল প্রাণবন্ত নরনারীর স্বাভাবিক সৌভাগ্য—তারা একটা মডুস ডিভেণ্ডি বেঁচে থাকার পন্থা খুঁজে নিতে পারে। পুরুষ কিংবা স্ত্রী সেখানে কেউই পদদলিত কিংবা অপমানিত হয় নি। অপমান, আমার মনে হয়, আত্মার মৃত্যু। আর আত্মা যখন মরে যায় তখন মানুষ হয়ে যায় পশু। নির্মম জিঘাংসু এবং মারাত্মক পশু, কারণ আত্মা মরে গেলেও তার থেকে যায় বুদ্ধিবৃত্তি, যে বুদ্ধিবৃত্তি পশুর নেই। সে তখন হয়ে যায় হাইড্। যত রকম পাশবিক, নারকীয় জঘন্য পাপ তখনসে করতে পারে তার আহির-মনীয় বুদ্ধি, ছলচাতুরী দিয়ে।

আমারও তাই হয়েছিল। কিন্তু তার সব কথা বলার সময় এখনো আসে নি।

ঐ সময়ের অনেক কিছুই আমার মনে পড়ছে। তার একটা তোমাকে বলি।

জানো তো, পাদ্রী জোন্স গুডি-গুডি লোক, তোমরা যাকে বেলো, 'ভালোমানুষ'। ধার্মিক লোক আকস্মিকই তাই হয়। যদিও তাঁর অজানা ছিল না যে আমি তাঁকে পর্যন্ত বর্জন করেছি, তবু ভদ্রলোক রাস্তায় একদিন বেমক্লা দেখা হয়ে যাওয়াতে আমারসঙ্গ নিল—আমি তো তাঁকে গুড ঙ্গভনিং বলে কেটে পড়ার চেষ্টাই করেছিলুম। আমি যে অশাস্তিতে আছি সে কথা তো তাঁর অজানা ছিল না, কিন্তু সে অবস্থাতে যে পাদ্রীর উপদেশে কোনো ফললাভ হয় না, সে তত্ত্বও তিনি জানতেন না।

ইতি-উতি করে, ডোন্ট পোক্ ইয়োর্ নোজ্ ইন্ মাই অ্যাক্শ্যার্স (আপন চরকায় তেল দাওগে-এর তুলনায় অনেক মোলায়েম) এটা শোনার জন্ম বেশ তৈরি হয়েই ভদ্রলোক আমাকে বললে, যার মর্মার্থ,

ইতি-উতিটা বাদ দিয়ে বলছি সাদামাটা ভাষায়ই, তোমার কী বেদনা তা আমি জানি না। কিন্তু জানি, তুমি সুশীল ছেলে, তুমি ধর্মভীরু। তাই বলছি, ভগবান যদি তোমাকে অসুখী করে থাকেন তবে নিশ্চয়ই তার কোনো কারণ আছে। যখন সে যুক্তি আমরা খুঁজে পাচ্ছিনে তখন তুমি এই ভেবে নিজের মনকে সাস্থনা দাও না কেন যে, আমার তোমার চেয়েও অসুখী লোক এ সংসারে আছে।

সার্মনটোর মধ্যে খানিকটে সত্য আছে নিশ্চয়ই। ঐ যে আমাদের বাদরটা, হার্ভে, কী কুচ্ছিত তার চেহারা, আর তার বিদ্যুটে জামাকাপড় আর চলন-বলন। ক্লাবে কোনো মেয়ে তার সঙ্গে কথা কইতে চায় না, তার গা থেকে যা ছুর্গন্ধ বেরোয় তাতে আমরাই নাক চেপে বাপ-বাপ-করে পালাই। খাস খানদানী ইংরেজের বাচ্চা, পাজী টিলার যে কোনো মেয়ে তাকে বিয়ে করে জাতে উঠতে পারে কিন্তু বেচারীর কী ছরবস্থা! সেখানেও ক্রিস্মাসের রাত্তিরে গিয়ে পাত্তা পায় নি—কোনো মেয়ে তার সঙ্গে নাচে নি। নেচেছিলেন একমাত্র বুড়ী পাজীমেম। তাঁর কথা আলাদা, অসাধারণ নারী।

আমি সে রাত্রে ক্লাব এড়াবার জন্তে পাজী টিলায় গিয়েছিলুম। মেয়েরা যা খুশি হয়েছিল তার স্মৃতি চিরকাল আমার মনের মধ্যে রইল। সেই আনন্দ সর্বাক্লে আতরের মতো মেখে নিয়ে যখন বাড়ি ফিরছি, তখন দেখি হার্ভে তার মুখে ক্লেশ আর গ্লানি মেখে নিয়ে প্লথ গতিতে বাড়ি ফিরছে।

আমি বড় কষ্ট পেয়েছিলুম, কিন্তু, জান সাস্থনাও পেয়েছিলুম পাজীর সার্মনের কথা ভেবে যে, আমার চেয়েও দুঃখী এ সংসারে আছে। বাড়িতে, আমার বুদ্ধের ভিতর যে জ্বালা জ্বলে জ্বলুক; কিন্তু সমাজ তো আমাকে ঘেন্না করে না।

এই সাস্থনা নিয়ে যখন বাড়ি ফিরলুম তখন দেখি, টেবিলের উপর একটা ক্রিস্মাস প্যাকেট। খুলে দেখি, হাউসম্যানের কবিতার বই। আমার বন্ধু আর্নল্ড পাঠিয়েছে। ও বই আমি সে রাত্তিরে পেতুম না,

কারণ সেদিন মধুগঞ্জে ডাক বিলি হয় না। কিন্তু পোস্টমাস্টার লাহিড়ী গভীর রাত্রেও ইংরেজদের ক্রিসমাস ডাক বিতরণ করাত।

কবিতার বই। যেখানে খুশি পড়া যায় খুলতেই চোখে পড়ল,

**‘ Little is the luck I’ve had  
and oh, ‘its comfort small  
To think that many another lad  
Has had no luck at all.**

যে সাম্বনার্টুকু নিয়ে বাড়ি ফিরেছিলুম সেই মুহূর্তেই সেটি অন্তর্ধান করল। আর্নল্ড নয়, পাঠিয়েছিল আহির মন।

সব খবরই ক্রমে ক্রমে ক্লাব-বাড়িতে পৌঁছেছিল সে-কথা আমি জানি, কিন্তু কী চেহারা নিয়ে পৌঁছেছিল সে-কথা বলতে পারব না। একই ঘটনা স্বচক্ষে দেখে দুই সত্যবাদী লোক যে কি রকম ভিন্ন ভিন্ন বর্ণনা দিতে পারে সে সত্য, পুলিশের লোক হিসেবে, আমরা বেশ ভালো করেই জানি এবং সেই অমিলের ফাঁক দিয়েই যে আসামী নিষ্কৃতি পায় সে তত্ত্বও আমাদের অজানা নয়।

আগাঘর আমাকে বেকশুর খালাসি হয়তো দেয় নি, কিন্তু একটা বিষয়ে আমি নিঃসন্দেহ হলাম যে, এ ব্যাপার নিয়ে ক্লাবের মুকুব্বিরা বেশী নাড়াচাড়া করতে তো চানই নি, যতদূর সম্ভব ধামা-চাপা দেবার চেষ্টাও করেছিলেন। এস্থলে যে তাঁরা ‘ঘুমন্ত কুকুরটাকে শুধুমাত্র জাগাতে চান নি’ তাই নয়, ‘বার্কিং ডগটাকে’ পর্ষন্ত স্ট্রাঙল্ করতে চেষ্টা করেছিলেন এবং অনেকখানি সক্ষমও হয়েছিলেন।

‘বক্সলাদের’ নিয়ে আমিও বেথেয়ালে আর পাঁচজনের মতো ছোটখাটো ঠাট্টা-রসিকতা করেছি, কিন্তু যখনই তলিয়ে দেখছি, তখনই মনের ভিতর লজ্জা পেয়েছি। বক্সলাদের তুলনায় আমি ভদ্র সমাজের উচ্চশ্রেণীর লোক, আর এ সংসারের রীতি, দৈবত্ববিপাকে বড়র যখন মাথা নিচু হয় তখন ছোট তাই দেখে হাঁসে। ‘মার্ভ হিম রাইট,’ বেশ হয়েছে, খুব হয়েছে, তার মুখে তখন ঐ এক কথা। এই নিয়ে

বাঙলায়ও একটা জোরদার প্রবাদ আছে, সেটা নিশ্চয়ই তোমার জানা, কারণ বাঙলা শেখার সময় তুমিই আমাকে এই প্রবাদের বই-খানা দিয়েছিলে। বাঙলাটা আমার আর মনে নেই, তাই ইংরিজীটাই দিচ্ছি। ‘ছয়েন্ দি এলিফেণ্ট সিক্স ইন টু দি মায়ার, ঈভন্ দি ফ্রগ্ গিভস্ হিম্ এ কিফ্!’ আমাদের দেশের তুলনায় তোমাদের দেশে বড়-ছোটর পার্থক্য অনেক বেশী তাই বোধ করি তোমাদের তুলনাটায় প্রতিহিংসা-প্রবৃত্তিটা ফুটে উঠেছে বেশী।

ক্লাব বাড়ির কোনো কোনো ব্যাঙ নিশ্চয়ই আমাকে লাঞ্ছিত করেছে, কিন্তু সেখানকার গণ্ডার, হিপো, অর্থাৎ মাদামপুর বিষ্ণুছড়া তাঁদের জিভের লকলকানি বন্ধ করে দিয়েছিলেন। এর জন্তু ঔঁদের প্রতি আমার কৃতজ্ঞ হওয়া উচিত নয় কি ?

তবেই দেখো, আহর মজদাও হাত গুটিয়ে বসে থাকেন নি। আহির মনের ত্রুর সর্পদংশনে আমার অন্তরাগ্না যাতে করে জর্জরিত না হয়ে যায় তাই তিনি আমার ধমনীতে ঢেলে দেবার চেষ্টা করলেন ক্লাব বাড়ির অযাচিত সহৃদয়তার সঞ্জীবনী সুধারস।

কিন্তু জান, সোম, শক্ত ব্যামোতে ওষুধ যদি ঠিক মাত্রায় না দেওয়া হয় তবে ফল হয় উলটো। বিষ তখন সেই ওষুধ থেকে নূতন শক্তি সঞ্চয় করে নেয়। বীজাণুকে সিদ্ধ করে মারতে গিয়ে তুমি যদি জল যথেষ্ট না ফোটাও তবে জল আরো বেশী বিষিয়ে ওঠে। আমার বেলা হল তাই, এবং সেই জিনিসটাই আমার জীবনের মোড় ফিরিয়ে দিল। আহির মন আমাকে তার দাসানুদাস করে ফেলল।

আমি ক্লাব বাড়ির সদাশয়তা না দেখে, উপলব্ধি করলুম, সংসারে যত বড় অশয়্য অবিচার হোক না কেন, ধর্মের অনাচার অধর্মের যতই প্রসার হোক না কেন, একদল লোক সেটাকে চাপা দেবার জন্তে উঠে পড়ে লেগে যায়। এবং আশ্চর্য, তারা যে অসাধু তাও নয়। মাদামপুর বিষ্ণুছড়া ঐরা ছজনাই অতিশয় সহৃদয় ভদ্রলোক। এ পাপ ছড়িয়ে পড়লে অর্থাৎ আমাদের কেলেঙ্কারির কথা রাষ্ট্র হলে, ইউরোপীয়

সমাজের অকল্যাণ হবে এই আশঙ্কায় তাঁরা সেটা চেপে রেখেছিলেন।

‘অর্থাৎ পাপ করলেই পুণ্যাত্মা তোমাকে ধরিয়ে দেবে না। কোনো কোনো ক্ষেত্রে—যেমন আমার বেলায়—সজ্জনরা সে পাপ লুকিয়ে রাখবার চেষ্টা করলেন।

এ-সম্বন্ধে বাকি কথা পরে হবে।

তুমি তখন ছুটি নিয়ে কাশী না গয়ায় কোথায় গিয়েছ।

এদিকে মধুগঞ্জে এল বন্যা।

দিন সাতেক ঝামাঝম বৃষ্টি। তারপর দিন তিনেক পিটির-পিটির। তাই নিয়ে হুশিচিন্তা করার কিছু নেই, কারণ আমাদের বছরের বরাদ্দ একশ বিশ ইঞ্চির তখনো একশ ইঞ্চি হয় নি। এমন সময় কোনো রকমের পূর্বভাস না দিয়ে পাহাড় থেকে হুড়হুড় করে নেমে এল সাত-হাত-উঁচু জলের এক ধাক্কা। সঙ্গে নিয়ে এল বিরাট গাছের গুঁড়ি আর কুঁড়েঘরের আস্ত চাল। তার উপর আঁকড়ে ধরে আছে মৃত্যুভয়ে কম্পমান শত শত নরনারী, পশুপাখী, এমনকি, সাপ-বিচ্ছুও। সকলের সম্মুখেই মৃত্যু যখন সশরীর বর্তমান মানুষ তখন সাপকে মারে না, সাপ মানুষকে কামড়ায় না। ক্ষুধার উদ্বেকও নিশ্চয় তখন হয় না—একই বাঁশের উপর আমি তখন সাপের কাছে ইঁহুরকে বসে থাকতে দেখেছি। আর জলের তাড়া খেয়ে সাপ তো আমার ডিঙিতে আশ্রয় নিতে খেয়ে এসেছে কত গণ্ডা—ওদিকে মাঝিরা লগি দিয়ে জলে ঝপাঝপ মার লাগাচ্ছে তারা যেন না আসে—তবু আসবেই।

মৃত্যুভয়ে শঙ্কিত নরনারী উদ্ধারের জন্তু চিৎকার পৰ্বস্ত করছে না। গোড়ার দিকে নিশ্চয়ই করেছিল। এখন বোধ হয় গলা ভেঙে গিয়েছে। আর বাঁচাবে কে? যে কথানা নৌকো ভেসে যাচ্ছে, সেগুলো মানুষের ভারে এই ডোবে কি ঐ ডোবে। যে লোকগুলো নৌকোয় আশ্রয় পেয়েছে তারা আসন্ন মৃত্যু থেকে রক্ষা পেয়ে হয়ে গিয়েছে কঠিন। আর একটি মাত্র শিশুকেও তারা নৌকোয় স্থান

দিতে নারাজ ।

জলের উপর দিবারাত্র ভেসে চলেছে অগুনতি মড়া । গোরু, বাছুর, শেয়াল, কুকুর, মোষ—হাতি পর্যন্ত । ভেবে আমি কূল-কিনারাই পেলুম না, পাহাড়ের উপর কতখানি তোড়ে জলের স্রোত নেমে আসলে একটা হাতি পর্যন্ত বেকাবু হয়ে নদীর জলে ভেসে এসেছে । একটা হাতি কোনোগতিকে সাঁতার কেটে কেটে পাড়ে এসে উঠল আমারই টিলার নিচে । দেখেই বুঝলুম, বুনো । তখন সে নির্জীব, কিন্তু পরে না আশপাশে আতঙ্কের সৃষ্টি করে, সেই আশঙ্কায় ওটাকে গুলী করে মারব কি না যখন ভাবছি, তখন মধুমাধব জমিদারির মাহত—উঁচু জায়গার সন্ধানে সে তার হাতি নিয়ে আশ্রয় নিয়েছিল আমার পিছনের টিলায়—তাকে দিব্য পোষ মানিয়ে নিয়ে গেল আপন হাতির সঙ্গে বনের ভিতর । যাবার সময় আমাকে সেলাম করে বলল, 'এ হাতি আশ্রয় পেয়ে বেঁচে গেছে হুজুর । এ হাতি আর কখনো বনে ফিরে যাবে না, কারো অনিষ্টও করবে না । হাতি তো নেমক-হারাম জানোয়ার নয় ।'

শুধু জল আর জল । বর্ষার প্রথম ধাক্কাতেই কাজলখারার কালো জল ঘোলা হয়ে গিয়েছিল । এখন সে হয়ে গেল সাদা । কিন্তু ধবল-কুষ্ঠের মতো কী রকম যেন এক বীভৎস সাদা । কোনো কোনো সাপের গায়ে আমি এ রঙ দেখে শিউরে উঠেছি এবং বিষাক্ত কি না সে খবর না নিয়েই মাথা ফাটিয়ে দিয়েছি । এ জলের মাথায় যদি লাঠি মেরে কেউ তাকে মেরে ফেলতে পারত !

প্রথম ধাক্কাতেই বান ভেঙে দিল আমাদের নদীর পাড় । ডুবিয়ে দিল শহরের নীচু জায়গার বাড়িঘর । ভাগ্যিস প্রথম জোর মারটা এসেছিল দিনের বেলায়, না হলে কতো লোক এবং আমাদেরই চেনা লোক যে এক ঘুম থেকে আরেক ঘুমে চলে যেত তার সন্ধান পর্যন্ত আমরা পেতুম না । তারা আশ্রয় নিল জাত-বেজাতের নৌকোয়, বাকিরা এসে উঠল টিলা-টালার উপরে । আমাদের মধুগঞ্জ আছে

কটাই বা তাঁবু ! তারই সব কটা পড়ল এখানে-ওখানে। বাকিরা টিলা থেকে ডাল-পাতা কুড়িয়ে নিয়ে তুললে চালাঘর। মুদীরাও আশ্রয় নিয়েছে সেইখানেই—আর বাবেই বা কোথায় ? তোমার পরিবারের আশ্রয়ের জগ্গে আমি আমার ভাওয়ালি পাঠিয়ে দিয়েছিলুম। সে নোকো এনে বাঁধা হল আমার টিলার নিচের বটগাছের সঙ্গে।

আশ্চর্য, শহরে কোনো কুকীর্তি হলে আমরা যে কটা ভ্যাগাবণ্ড বকাটে ছোঁড়াকে সন্দেহ করে ধরে এনে তাদের ধরে চোটপাট লাগাতুম, তারাই দেখি সঙ্কলের পয়লা কোমর বেঁধে লেগে গেল উদ্ধারের কাজে। এক মুহূর্তেই কোথায় গেল তাদের তাস-পাশা, ইয়ার্কি-খিস্তি। আর সবচেয়ে ত্যাঁদোড় ঐ পরেশটা—যে আমার বাগানের লিচু পর্ষস্ত চুরি করেছে, রায়বাহাছর কাশীশ্বরকে পর্ষস্ত যে আড়াল থেকে মুখ ভ্যাঙচায়—সে দেখি তার ইয়ারদের নিয়ে কলাগাছের ভেলা বানিয়ে ভাসিয়ে দিয়েছে নদীর উপরে। সেই বানের ভরা গাঙে ! কত লোক বাঁচাল তারা ! দিনের শেষে, সন্ধ্যার অন্ধকারে দেখি আর সবাই চলে গিয়েছে, সে একা ভেলার উপরে বসে নদীর দিকে এক দৃষ্টিতে তাকিয়ে। গায়ে ধুতির ভিজে খুঁট। আমার বরষাতিটা আমি তার দিকে ছুঁড়ে দিতে সে সেটা লুকে নিয়ে আমার দিকে ফের ছুঁড়ে ফেরত দিলে। বত্রিশখানা দাঁত বের করে এ-কান ও-কান জুড়ে হা করলে—এই হল আমাদের ‘খ্যাক্স, নো’র বাঙলা অনুবাদ।

তুমি জান সোম, বগ্গার পর শহরে কোনো কুকর্মের জগ্গ ওদের সন্দেহ করলে, ডেকে শুধু ‘বাপু, বাছা,’ করতুম, ছ-একবার জেনে শুনে ছেড়ে দিয়েছি। কড়া কথা বলতে প্রবৃত্তি হয় নি।

আছর মজদা আর আহির মনে নিরস্তুর এ কী দম্ব ! আহির মনের যে টেলার জ্বালায় উদায়স্ত সমস্ত পাড়া অতিষ্ঠ, সঙ্কটের সময় সে দেখি হঠাৎ আছর মজদার ডাকে ‘হা-জি-র’ বলে তৈরী, প্রাণটা খোলামকুচির মতো বগ্গার জলে ডুবিয়ে দেবার জগ্গ প্রস্তুত !

তোমার বিশ্বাস, কোনো কোনো মানুষ পাপাত্মা—ক্রিমিনাল মাইণ্ড নিয়ে জন্মায়। শেষবারের মতো বলেছি, তা নয় সোম, এরা সব মিস্কিট। এরা শুধু সঙ্কটের মাঝখানে জীবসত্তার চৈতন্যবোধে বেঁচে থাকার আনন্দ (জোয়া ছ ভিভর্) পায়। দৈনন্দিন জীবন এদের কাছে অসহ একঘেয়ে বলে মনে হয়। আমার দেশে এ রকম ছোঁড়ারা পণ্টনে ঢুকে গিয়ে আপন জীবনের সার্থকতা পায়। তাই বাঙালী পণ্টন খোলা মাত্রই আমি সর্বপ্রথম এদেরই ডেকে পাঠিয়েছিলুম। এরা যে সেখানে সুনাম করেছে, সে কথা তোমার অজানা নয়।

কোথা থেকে কোথা এসে পড়লুম।

সেই সর্বব্যাপী হাহাকারের ভিতর আমি কিন্তু একটি বড় মধুর দৃশ্য দেখেছি। আমার টিলা, পাত্রী টিলার চতুর্দিকে যখন আশ্রয়ার্থীরা চালা, মাচা বানাতে ব্যস্ত, ভিজে কষ্টি-বাঁশ দিয়ে আগুন জ্বালাতে গিয়ে মেয়েরা চোখের-জলে নাকের-জলে, তখন দেখি বাচ্চারা মহোল্লাসে শেক্সপীয়ারের ‘প্রিমরোজ্ পাথ টু ইটার্নেল বন-ফায়ারের’ পিকনিক চডুই-ভাত বনের ভিতর সফল করে তুলেছে। এদের একের অগ্নের সঙ্গে দেখা হয় ইস্কুল ঘরে, কিংবা খেলার মাঠে তা-ও নির্দিষ্ট সময়ের জন্ত। আজ যেন তারা সবাই এক বিরাট বাড়ির প্রকাণ্ড পরিবার। সে বাড়ির ছাদ আকাশ, দেয়াল টিলাগুলো, খেলনার জন্ত ছুনিয়ার গাছপালা, টিপ-টিপা আর নাশতার জন্ত পিষ্টি-বৈচিমন, আনারালি, কালোজাম, বুনো কাঁঠাল। আর সবচেয়ে বড় আনন্দ, বাপ মা শাসন করে না, তারা আশ্রয় নির্মাণে মত্ত। এরা বত বাইরে বাইরে কাটায় ততই মজল। এই হনুমানের জ্বালায় টিলার হনুমানগুলো তখন বাপ-বাপ করে এ তল্লাট ছেড়ে পালিয়েছিল।

শেষটায় জল এসে ঢুকল আমার লিচুবাগানে।

আগে ছিল আমার বাড়ির সামনের গাছপালার সবুজ, তারপর কাজলধারার কালো জল, তারপর ফের ধানখেতের কাঁচা সবুজ এবং

সর্বশেষে কাপ্তাই পাহাড়ের নীল রঙ । এখন আমার আর পাহাড়ের মাঝখানে শুধু নোংরা ঘোলা জলের একরঙা উদরী রোগীর ফুলে-উঠা পেটের মতো এক ভয়াবহ সত্তা । তারই মাঝে হাঁটুজলে দাঁড়িয়ে আছে কোনো ঘর, আর কোনো ঘর মাথা অবধি ডুবিয়ে—জলের উপর শুধু টিনের চারখানা চাল বসে আছে, মোষ যে রকম সর্বাঙ্গ জলে ডুবিয়ে দিয়ে শুধু মাথাটা উপরে ভাসিয়ে রাখে । সবকিছু জলে একাকার বলে আসল নদীটি কোথায়, সে শুধু বোঝা যাচ্ছে, তার উপর দিয়ে ভেসে যাওয়া কালো কালো টিপি থেকে—মড়া মোষ, শুয়োর, গরু আরো কত কী ! আর আমার বারান্দায় লক্ষ লক্ষ কেঁচো—সাপ পর্বস্ত ঠেকিয়ে রাখা যাচ্ছে না ।

সত্যি বলতে কী, তখন এ-সব দেখেও দেখি নি । আজ দেখছি, আমার অজানাতে মন অনেক কিছু স্মরণ রেখেছে । আমি তখন পাঁচশটা কাজ নিয়ে ব্যস্ত, যে-সব কাজ সম্বন্ধে আমার কণামাত্র অভিজ্ঞতা নেই ।

তোমাদের জাতটা এমনিতে বড় ইনডিসিপ্লিন্ড কিন্তু বিপদের সময় আমাদের তুলনায় তোমরা অনেক বেশী কমন্সেনস্ ধর । আপনা থেকে কেমন যেন একটা ডিসিপ্লিন তোমাদের ভিতর এসে যায় । তা না হলে আমার সেই পাগলের মতো ছুটোছুটির ফলে ইষ্ট না হয়ে কী যে অনিষ্ট হত বলতে পারিনে ।

সাত দিন ধরে আমি কলের মতো কাজ করে গিয়েছি—আমি সংবিতে ছিলাম না । এমনি, আমার জীবনের আপন ট্র্যাজেডি সম্বন্ধেও আমি অচেতন হয়ে গিয়েছিলাম ।

অষ্টম দিনে বাড়ি ফেরার সঙ্গে সঙ্গে সংবিতে ফিরলুম । ডাঙশ মেরে মানুষ একে অগ্নকে অজ্ঞান করে । আমাকে ডাঙশ মেরে আনা হলো সংবিতে ।

বাঙলোয় এসে শুনলুম, মেবলের বাচ্চা হয়েছে ।

১২ই সেপ্টেম্বর

তোমাদের সকলের মুখে শুনি, কর্ম করে যাবে, ফললাভের আশা ত্যাগ করে। ফল দেওয়া-না-দেওয়া ভগবানের হাতে। এই নাকি তোমাদের সর্ব অভিজ্ঞতা, সর্বশাস্ত্রের মূল কথা।

মা মেরী সাক্ষী, আমি বন্যার সাত দিন কোনো ফললাভের আশা করে কাজ করি নি। আমি আমার আপন প্রাণ বিপন্ন করে যাদের বাঁচিয়েছিলুম, তাদের কেউ কেউ বন্যার পর কলেরায় মারা যায়। তাই নিয়ে আমি শোক করি নি। অণু ফলের কোনো প্রশ্নই তো আমার মনে ওঠে নি।

কিন্তু কর্মফলের লোভ ত্যাগ করে যে মানুষ কাজ করে গেল, তাকে অর্থাৎ তাঁর বিশেষ প্রিয়পাত্রকে বৃষ্টি তোমাদের ভগবান বকশিশ দেন জারুজ সন্তান!

১লা ডিসেম্বর

যতই ভাবি মনকে এদিক-ওদিক বিক্ষিপ্ত হতে দেব না, মূল কথা সংক্ষেপে বলে ফেলব, ততই দেখি আস-কথা, পাশ-কথা সব কথাই মনের ভিড় থেকে বাইরের প্রকাশে এসে নিক্ষেপিত পেতে চায়। অথচ মনের গভীর গুহাতে যে সব ভূত্যের নৃত্য অহরহ চলেছে তাদের একটাকেও তো আমি ভালো করে ধরতে পারছি নে। অজ্ঞানে, সজ্ঞানে, সুষুপ্তে, স্বপ্নে এরাই গড়ে তুলছে আমার জীবন-দর্শন—ভেন্ট-আনশাউউঙ্—তারই বৃহুদ শুধু চেতন মনে ভিড় করে, আত্ম-প্রকাশের জন্ত।

সে মনের গুহায় আছে কত প্রাণী,—হামলেট, ডন কিব্‌স্ট, ডক্টর জীক্‌স, মিস্টার হাইড এবং তাঁদের পিছনে দাঁড়িয়ে এদের নাচাচ্ছেন আছুর মজদা, আহির মন, হয়তো ছেলেবেলাকার আমার আরাধ্য দেবী মা-মেরি তখনো আমাকে সম্পূর্ণ বিসর্জন করে ফেলেন নি—

এখনো আমি মাঝে মাঝে স্বপ্নে দেখি, আমার ছেলেবেলাকার শহরের গির্জায় আমি হাঁটু গেড়ে উপাসনা করছি আর তিনি করুণ বয়ানে আমার দিকে তাকিয়ে আছেন ; এ স্বপ্ন আমি বড় ডরাই ।

কখনো দিনের পর দিন বারাণসী জড়ের মতো বসে রইতুম হামলেট হয়ে, আর তাকে ডক্টর জীকুল কানে কানে বলত, ‘এই ভালো, চূপ করে বসে থাকো । সংসারের অন্ডায় অবিচারের বিরুদ্ধে কী করতে পার তুমি ? কোন্ কর্মের কী ফল, তা আগেভাগে, জানবে কী করে !’ ভুলে গেছ, অস্কার ওয়াইল্ডের সেই গল্পটা ? প্রভু যীশু এক অন্ধের দৃষ্টিশক্তি ফিরিয়ে দিয়েছিলেন, তার পর পথে যেতে যেতে একদিন দেখেন, এই লোকটা এক বারবনিতার দিকে লোলুপ নয়নে তাকিয়ে আছে । প্রভু বিরক্ত হয়ে তাকে শাসন করলেন । উত্তরে সে কাতরকণ্ঠে বললে, ‘আমার দৃষ্টিশক্তি ছিল না, আপনি আমাকে দয়া করে সে শক্তি দিলেন । এখন আমি তা দিয়ে অন্ড কী করতুম, বলুন ।’ তাই দেখো, কোন কর্মের কী ফল তা স্বয়ং প্রভু যীশুই যখন জানেন না, তখন তুমি, কীটস্থ কীট, তুমি জানবে কী করে ? কিংবা স্মরণ করো সেই চীনে গল্পটা । এক জমিদারের ছেলে বনে শিকার করিতে গিয়ে পথ হারিয়ে গুম্ব হয়ে গেল । পাড়া-প্রতিবেশী তার বাড়িতে এসে শোক প্রকাশ করে তাকে সান্ত্বনা জানালে । জমিদার ছিলেন জ্ঞানী লোক, শুধু বললেন, ‘এ যে খারাপ হল, জানলে কী করে ?’ তার দিনদশেক পরে ছেলেটা বন থেকে ফিরে এল একটা চমৎকার বুনো ঘোড়া সঙ্গে করে । সবাই এসে সানন্দে অভিনন্দন জানালে । জমিদার বললেন, ‘এ যে ভালো হল, জানলে কী করে ?’ তার কিছুদিন পর ছেলেটা ঐ বুনো ঘোড়া থেকে পড়ে পাখানা ভেঙে ফেললে । সবাই এসে শোক প্রকাশ করলে । জমিদার বললেন, ‘এ যে খারাপ হল, জানলে কী করে ?’ তার কিছুদিন পর লাগল লড়াই, সস্ত্রাটের লোক এসে ধরে নিয়ে গেল সব জোয়ানদের ; ছেলেটার পা ভাঙা বলে তাকে যেতে হল না । সবাই

এসে আনন্দ জানালে। জমিদার বললেন ইত্যাদি ইত্যাদি।

তবেই দেখো, কিসে কী হয়, বলবে কে ?

আর কখনো বা সেই মারমুখো ডন কিব্‌সটকে আরো ওশকাতে লাগত তার পিছনে দাঁড়িয়ে মিস্টার হাইড। ‘কী দেখছ, বসে বসে ? তোমার লজ্জা-শরম নেই, অপমান-বোধ নেই ? তুমি কী একটা পা-পোশ না আস্ত একটা ভেড়ুয়া ? আগু-ঘর তোমাকে নিয়ে কী ঠাণ্ডা-ব্যঙ্গ করে তার খবর রাখ ? ইস্তেক নেটিভ, কালা-আদমী খানসামাগুলো ?’ ‘এদিকে চোরচোট্টার উপর কী রোয়াব ! ওঃ যেন কলকাতার হাই-কোর্টের বড় জজ সাহেব নেমে এসেছেন মধুগঞ্জের গুনাহ-হারামি খতম করবার জন্ত আর ওদিকে নিজের ঘরের বউ যে চুরি হয়ে গেল তার জন্ত কোনো গরমি নেই। সায়েবের গায়ে বুঝি মাছের রক্ত—তাও শিঙি মাছের না, একদম পুঁটি।’ ‘বুঝলে হে মহামাশ্র-বরেষু, সিন্নোর ডন্ কিখোঠে, ব্যাটারা এই কথা কয় কত রঙে কত ঢঙে ! আর তোমার বাটলারটা ! তওবা, তওবা—তা তোমাকে বলে আর কী হবে ? এইবার লেগে যাও, তোমার—হোঃ, হোঃ, হোঃ, তো-মা-র ছেলের ব্যাপ্টিজমের ব্যবস্থা করাতে।’

এই রকমই একদিন ডন কিব্‌সট, বা আমি, হঠাৎ কাণ্ডজ্ঞান হারিয়ে করলুম বাচ্চার বাপ্তিস্মের প্রস্তাব, জয়সূর্যকে গড-ফাদার বানিয়ে। তোমার মনে থাকার কথা, কারণ সব ব্যবস্থা করে দিয়েছিলে তুমি।

কাকে অপমান করার জন্ত এ প্রস্তাব আমি করেছিলুম ? মেব্লকে ? নিজেকে ? কী বলব ? ডন কিব্‌সট কি কোনো কিছু ভেবে-চিন্তে করে ? তবু লেখক সেরভান্তেসের মানসপুত্র ডন কিব্‌সট কখনো কারো কিছু অনিষ্ট করে নি। আমি ডন্ কিব্‌সটের, পিছনে ছিল যে মিস্টার হাইড।

গির্জেষরের সে দৃশ্য তোমার মনে আছে ? মাঝে মাঝে আমার পর্ষন্ত মনে হয়েছিল, কাজটা বোধ হয় ঠিক হল না।

তখন মিস্টার হাইড ধমক দিয়ে বলেছে, 'কেয় !'

আর আহির মন বলেছে, 'জীতে রহো বৈটা !'

আমি যা-কিছু করেছি তার জন্ম তোমার কাছ থেকে আমি কোনো করুণা ভিক্ষা করছি, কোনো সহায়ভূতিও চাইছি না, কিন্তু সোম, আমার ভিতর এই যে গোটা ছয় ভিন্ন প্রকারের প্রবৃত্তি অষ্টপ্রহর অনবরত লড়াই চালাত আমাকে নির্মমভাবে এদিক-ওদিক টানা-হাঁচড়া করত—একটা মড়াকে যে রকম দশটা শকুন ছেঁড়াছেঁড়ি করে—আমার জাগরণ বিষাক্ত করে রাখত, আমি ঘুমুতে গেলেই খাটটা নাড়াতে থাকত, ঘুমিয়ে পড়লে দুঃস্বপ্নের মতো বুক চেপে বসত, জেগে উঠেই দেখতুম তারা সব লোলুপ নয়নে পহর গুণছে, কখন আমি জাগব, কেউ দেবে চোখ ঠোকরে, কেউ ফুটো করে দেবে তালুটা—এরা আমাকে দিয়ে কী করেছিল সেইটে তুমি কিছুটা বুঝতে পারলেই আমি আমার জীবনের এদিকটার কথা আর তুলব না।

আপিসে কাগজপত্র সই করার সময় তারিখ দিতে হয়, খবরের কাগজও মাঝে মাঝে পড়েছি, কাজেই দিন, মাস, বৎসর সম্বন্ধে সম্পূর্ণ অচেতন কখনো হতে পারি নি। তাই জানি এই করে করে বছর পাঁচেক কেটে গেল।

সত্যি বলছি, সোম, বাইরের দিক দিয়ে দেখতে গেলে, আমার জীবনে এ পাঁচ বছরে কিছুই ঘটে নি। লড়াই লেগেছিল বলে প্রচুর খেটেছি, হাট লুট বন্ধ করে রেখেছি, স্বদেশী আন্দোলনকে ছড়াতে দিই নি। সাধারণ মানুষের চরিত্র গড়ে ওঠে, তার জীবন বিকাশ লাভ করে এই সব ঘটনার ঘাত-প্রতিঘাতের ভিতর দিয়ে, বাইরের ঘটনা তার মনকে গড়ে তোলে; আবার সেই মন তার ভবিষ্যৎ কর্মধারাকে নূতনভাবে নিয়ন্ত্রিত করে। আমার জীবনের উপর বাইরের কোনো ঘটনা এ পাঁচ বছর কোনো দাগ কাটতে পারে নি।

আর ভিতরের জীবনের কিছুটা ইঙ্গিত তোমাকে দিয়েছি। আর

ভিতরকার জট যদি আমি নিজেই ভালো করে ছাড়াতে পারতুম তা হলে তোমাকে বলতুম—আমি পারি নি।

শুধু মেব্ল্‌ দূর হতে আরো দূরে চলে গেল।

যে মেব্ল্‌ একদিন মার্সেলেসে দাঁড়িয়ে মভ রঙের রুমাল নেড়ে নেড়ে জাহাজে আমাকে অভ্যর্থনা জানিয়েছিল, পাড়ে নেমে আমি রেখেছিলুম তার কাঁধে আমার হাত ছুথানি, সে চেপে ধরেছিল আমার বাহু ছুথানি—সেই মেব্ল্‌ই হঠাৎ যেন আমাকে পাড়ে ফেলে উঠে পড়ল জাহাজে আর ধীরে ধীরে সে জাহাজ অদৃশ্য হলো অসীম নীলিমার অন্তহীন শূন্যতায়। কাতর আর্তনাদে, করুণ নিবেদনে আমি তাকে ডাকতে পর্যন্ত পারলুম না।

আর সেই মেব্ল্‌-ই এই বারাণ্ডাতেই বসে, আমার থেকে তিন হাত দূরে।

শুধু বুঝলুম, আমার জীবন থেকে এ দ্বন্দ্ব কখনো যাবে না। শান্তি আমি কখনো পাব না।

৫ই ডিসেম্বর

পেট্রিকের জ্বর হয়েছে। সিভিল সার্জন দেখে গিয়েছে। বলেছে ভয় নেই। মেব্ল্‌ পাংশু মুখে বারাণ্ডায় পায়চারি করছে। একবার ছাটটা মাথায় দিয়ে পাদ্রীটিলার দিকে রওয়ানা হল। বহুকাল হল সে বাড়ি থেকে আদপেই বেরোয় নি। কিন্তু গেল না। ফিরে এল। তারপর বারাণ্ডায় রেলিঙে ছুই কনুইয়ে ভর দিয়ে মাথা নিচু করে অনেকক্ষণ ধরে ভাবল।

আমি তো অন্ধ নই। দেখলুম, মাতৃত্বের রসে মেব্লের দেহখানির প্রতি অঙ্গটি কী অপরূপ পরিপূর্ণতার সৌন্দর্য পেয়েছে। যেন এদেশের বর্ষার ভরা পুকুর।

অনেকক্ষণ পরে মেব্ল্‌ আমার সামনে এসে মাথা নিচু করে বললে, 'এদেশের আবহাওয়া পেট্রিকের সইছে না। তার পড়াশুনার

ব্যবস্থাও এখানে ঠিকমত হবে না। 'আমরা বিলেত যাই। 'ভূমিও সঙ্গে চলো না? তোমার তো অনেক ছুটি পাওনা আছে।'

বহুকাল পরে মেব্ল' কথা বলল।

আমি বললুম, 'সেই ভালো। তবে আমি সঙ্গে আসতে পারব না। তোমরা ইংলণ্ডের কোথাও বাড়ি করে থাকো। আমি পরে সুযোগ পেলে যাব।'

মেব্ল' মাথা নেড়ে সায় দিলে। সে কখনো আমার কোনো ইচ্ছায় আপন অনিচ্ছা জানায় নি, নিজের ইচ্ছা তো প্রকাশ করতই না।

এ রকম ধারা কোনো একটা পরিবর্তন আমার জীবন-প্যাটার্নে আসতে পারে সে কথা আমি কখনো ভেবে দেখি নি।

অথচ এ তো কিছু খুদার-খামাখা আজগুবি সমাধান নয়। চার-পাঁচ বছরের লেখাপড়ার সুবিধের জন্তে আমার মতো ছু-পয়সাওয়ালার লোকের পরিবার আকছারই তো বিলেত যাচ্ছে।

তবু আমি সমস্ত রাত বিছানায় পড়ে রইলুম অসাড়ের মতো। শেষ রাত্রে একটু তন্দ্রা এসেছিল। আচমকা ঘুম ভাঙল ভোরের দিকে।

দেখি সমস্যা সমাধান করে ফেলেছি। সব সমস্যার সমাধানই হয় ঘুমে, স্বপ্নে কিংবা অবচেতন মনে।

মাত্র যে তিনটি প্রাণীর সঙ্গে আমার জীবনের যোগসূত্র, বরঞ্চ বলি, যে তিনটি প্রাণী আর আমাকে নিয়ে আমার জীবন, তারাই আমার জীবনকে অসহ করে তুলেছে পলে পলে, প্রতি ক্ষণে তারা আমার আয়ু ক্ষীণ করে নিয়ে আসছে, তিন দিক থেকে তিন রাত্ত আমার জীবনকে ক্রমে ক্রমে গ্রাস করে, একদিন বিলুপ্ত করে দেবে। এই নিয়ে আমার সিদ্ধান্তের আরম্ভ। পরের সিদ্ধান্তগুলো এক-এক করে এই :

দূরে চলে গিয়ে আমার উপর এদের শক্তি আরো বেড়ে যাবে। এ সংসারে এরা বেঁচে থাকবে, না আমি বেঁচে রইব ?

আমি ।

এরা পাপী, মরা উচিত এদেরই । মেব্ল পাপী, জয়সূর্য পাপী আর পেট্রিক ওদের পাপ-জাত সন্তান । আমি নির্দোষ, আমি কোনো পাপ করি নি । আমি কস্মিনকালেও কারো হকের ধন থেকে একটি কানাকড়িও কেড়ে নিই নি । এরাই দিয়েছে আমাকে ফাঁকি, এরা যতদিন বেঁচে থাকবে ততদিন আমাকে দেবে শুধু ফাঁকি ।

এরা মরে গেলে আমি শান্তি পাব । আমার দ্বন্দ্বের সমাধান হবে ।

খুন কী করে করা হয়, তার সব কটা পদ্ধতিই জানি আমরা । তুমি আমি অর্থাৎ পুলিস । খুনীরা আপন আপন সঙ্কীর্ণ বুদ্ধি অনুযায়ী পস্থা বেছে নিয়ে করে খুন । সব খুনের ইতিহাস, বিশ্লেষণ জড়ো হয় ধানায় । কোন্ পন্থার কী গলদ, সামান্য কী একটা ত্রুটি কিংবা বিচ্যুতি এড়ালে খুনী ধরা পড়ত না, এসব তত্ত্ব আমাদের ভালো করে জানা । আমরা যদি নিখুঁত খুন না করতে পারি, তবে বিশ্বব্রহ্মাণ্ডে যেন কোনো চ্যাঙা লোকও সে চাঁদ ধরবার আশা না করে ।

এ তো চ্যালেঞ্জ নয় । এ তো অতি সোজা কাজ । কিন্তু অতি সরল কর্মও অবহেলার সঙ্গে করতে নেই ।

আমার মনে কোনো দ্বিধা নেই । আমার মনের গুহার হামলেট, কিংসট, জীক্ল, হাইড, মজদা, মনু সবাই মরে গিয়েছে । এখন যা-সব আমি করতে যাচ্ছি, সে-সব ডেভিড ও-রেলির সম্পূর্ণ নিঃস্ব ।

নির্দ্বন্দ্ব চিন্তে যে রকম বস্তার কাজে নিজেকে ডুবিয়ে দিয়েছিলুম, পেট্রিকের বাপ্তিস্ম পরব করার সময় আমি যে রকম স্থির নিশ্চয় হয়ে এগিয়েছিলুম, এবারে ঠিকই তাই ।

সকালবেলা জয়সূর্যকে ডেকে বললুম, 'তুমি মেব্লদের জাহাজ ধরিয়ে দেবে বোম্বাই, মাদ্রাজ কিংবা অন্ত কোনো বন্দরে । সেটা পরে স্থির হবে । তারপর তুমি কিছুদিনের জন্ত সেখান থেকে সোজা দেশে যোয়ো । আগে যখন ছুটি চেয়েছিলে, তখন সুরবিধে হয় নি, এখন আমার একলার কাজ আরদালিই করতে পারবে ।'

জয়সূৰ্ষ খুশী না বেজাৰ হ'ল ত'ৰ মুখ খেকে বোকা গেল না ।

আমি সেদিনই কুকটুক সাব ট্ৰাভেল এজেন্সিকে চিঠি লিখে দিলুম, কবে কোন বন্দৰ খেকে কোন জাহাজ ছাড়বে, জায়গা পাওয়া যাবে কিনা, ভাড়া কত ইত্যাদি জানতে । ফলে যে সাত ডাঁই মালমসলা উপস্থিত হ'ল, সে তো ঐ সময় তুমি এক দিন আমাৰ সঙ্গে দেখা করতে এসে দেখেছ । আমাৰ কেমন যেন আবছা আবছা মনে পড়ছে, সেদিন তোমাৰ সঙ্গে একটু থিটথিটে ব্যবহাৰ কৰেছিলুম । তাৰ কাৰণ যদিও তখন আমি ঐসব কাগজপত্ৰ নিয়ে নাড়াচাড়া কৰছিলুম, কিন্তু আসলে তাৰই আড়ালে আমাৰ অন্ত প্ল্যানটাকে আমি ফিটফাট ওয়াটাৰ-টাইট কৰে নিচ্ছিলুম ।

বাইৰেৰ শোটাকে তাৰ ফিনিশিং টাচ দেওয়ার জন্তু আমাৰ দরকাৰ ছিল শুদ্ধ কয়েকখানা লাগেজ লেবেলেৰ । কোনো কোনো ট্ৰাভেল এজেন্সি খদ্দেৰকে আপন চালাকি দেখাবাৰ জন্তু কেবিন বুক হওয়ার পূৰ্বেই কিছু লাগেজ টিকেট পাঠিয়ে দেয় । যেমন যেমন মেব্লেৰ এক-একটা স্মটকেস, ওশ্ব'ন ট্ৰাঙ্ক তৈৰী হতে লাগলো সঙ্গে সঙ্গে আমি তাৰেৰ উপৰ সেই লেবেলগুলো সঁটে দিতে লাগলুম ।

ওদেৰ দিকটা তৈৰি, এখন আমাৰ দিকটা ঠিক কৰতে হ'বে ।

মানুষ মাৰা তো অতি সহজ, বিশেষ কৰে সে মানুৰ যখন তোমাৰ অভিসন্ধি সন্মুখে সম্পূৰ্ণ অচেতন ! আসল সমস্যা মড়া নিয়ে । বেশীৰ ভাগ খুন ধৰা পড়ে মড়া খেকে এবং খুনী ধৰা পড়ে তাৰ খেকে ।

ক্রমে ক্রমে সব ব্যবস্থা হয়ে গেল । বাস-প্যাট্ৰা তৈৰী, রাস্তাৰ জন্তু অল্পস্বল্প খাবাৰ দাবাৰও প্যাক কৰা হয়েছে । পৰদিন ভোৰবেলা আমি মেব্লেদেৰ মোটেৰে প্ৰায় কুড়ি মাইল দূৰেৰ রেল ষ্টেশনে পৌছে দেব ।

সন্ধ্যাৰ সময় চাকৰবাৰদেৰ ছুটি দিলুম । তাৰা যেন ভোৰবেলা এসে মালপত্ৰ মোটেৰে তুলে দেওয়াতে সাহায্য কৰে ।

ডিনারের খবর নিয়ে যখন জয়সূর্য এল, তখন আমি হঠাৎ মেব্লকে বললুম, 'আজ এ ডিনারে জয়সূর্য আমাদের সঙ্গে বসে খানা খাক।'

মেব্ল অবাক হয়ে আমার দিকে মুখ তুলে তাকিয়ে ছিল। তার চোখে আপত্তির চিহ্ন ছিল।

আমি বললুম, 'আফটার অল, ও তোমাদেরই একজন। অন্তত এক দিনের জন্তু তাকে তার শ্রায্য সম্মান দেখানো উচিত।'

মেব্ল চুপ করে রইল।

খানা টেবিলে জয়সূর্যকে বসতে দেখে পেট্রিক খুশি।

আমি বললুম, 'বাটলার, তুমি সুপটা নিয়ে এসো; মেব্ল তুমি নিয়ে আসবে মাংস; আর আমি নিয়ে আসব পুডিং।'

ব্যবস্থাটা সকলের মনঃপূত হল কি না তা ভাববার ফুরসত নেই। আমাকে আমার প্ল্যান-মাফিক কাজ করে যেতে হবে।

সে এক অদ্ভুত ডিনার। সবাই চুপ করে খেয়ে যাচ্ছে।

পুডিং আনার জন্তু আমি গেলুম রান্নাঘরে।

পকেটে আর্সেনিক ছিল। ডাক্তারি শাস্ত্রে যে পরিমাণের প্রয়োজনের কথা বলে তার চেয়ে একটু বেশী করেই জয়সূর্য মেব্ল আর পেট্রিকের পুডিঙে মিশিয়ে দিলুম।

ওদের ছটকটানি, মৃত্যু-যন্ত্রণা আমি দেখি নি। আমি ততক্ষণে বড় লিচুগাছটার কাছে গোর খুঁড়তে লেগে গিয়েছি। কাজ সহজ করার জন্তু দুদিন আগে মালিকে দিয়ে সেখানে মৌসুমী ফুল ফোটাবার ফ্লাওয়ার বেড খুঁড়িয়ে রেখেছিলুম। এক বস্তা চুনও আনিয়ে রেখেছিলুম।

রাত প্রায় চারটের সময় গোর শেষ হল।

তারপর লাগেজগুলো নিজে মোটরে তুললুম চাকরদের আসবার আগেই বেরিয়ে যাব বলে, তাদের বলেছিলুম ছটায় আসতে। স্টেশনের পথে দশ মাইল দূরে বাঁড়গীছড়া নদীর উপর যেখানে পোল, তারই ডান দিক দিয়ে যে ছোট রাস্তা তারই উপর দিয়ে মোটর চালিয়ে নিয়ে

গিয়ে সেখানে লাগেজগুলোর সঙ্গে ইট বেঁধে ডুবিয়ে দিলুম নদীর গভীরে ।

তারপর বাড়ি ফিরে এসে শুয়ে পড়লুম ।

আমাদের মহাকাবি বলেছেন, ঘুম সঞ্জীবনী রসে প্রাণকে নবজীবন দান করে । সে কথা আমি মানি । কিন্তু তার উল্টোটাও হয়, তুমি লক্ষ্য করেছ কি ? নিশ্চিন্ত মনে ঘুমুতে গেলে, ভাবলে অস্তুত ঘটনা দর্শক গভীর নিদ্রায় মগ্ন থাকবে । আধঘণ্টা যেতে না যেতেই হঠাৎ পা ছুটো হাঁচকা টানে সটান খাড়া হয়ে যাওয়ার সঙ্গে সঙ্গে ঘুম ভেঙে গেল !

‘শুনি আহির মনের অট্টহাসি । যে আত্মবিশ্বাস আর দৃঢ় প্রত্যয় নিয়ে এতদিন প্ল্যানের প্রতিটি খুঁটিনাটি ঠিক ঠিক নিখুঁত-পরিপূর্ণ করে সমস্ত কর্ম সমাধান করলুম, ঘুম ভাঙতেই দেখি পায়ের তলার সে দৃঢ় ভূমি হঠাৎ ভলভলে কাদা হয়ে গিয়েছে আর আমি ক্রমাগত তলার দিকে ডুবে যাচ্ছি । যামে আমার সর্ব শরীর ভিজে গিয়েছে, আমি কলাপাতার মতো ধরধর করে কাঁপছি । আমার শরীর, আমার মন আমার কজীর বাইরে চলে গিয়েছে । হঠাৎ হয়তো বা চিংকার করে ফেলি, ‘আমি খুন করেছি । লিচুগাছটার তলা খোঁড়ো, সবকটা মড়া সেখানে পাবে !’

নিজের গলা সবলে নিজের হাতে চেপে ধরে কণ্ঠরোধ করার চেষ্টা করি । দেখি, হাত ওঠে না ।

এই হল আহির মনের সবচেয়ে বড় শয়তানি । তোমাকে আত্মপ্রত্যয় দেবে, সাহস দেবে, সব বাধাবিল্প উত্তীর্ণ হবার হাজারো সন্ধিসুড়ত বাতলে দেবে, তারপর যে মুহূর্তে তার ইচ্ছামত কর্মটি সমাধান হয়ে গেল, অমনি তোমাকে তোমার বিভীষিকার হাতে সমর্পণ করে চলে যাবে ।

আমি মর্মে মর্মে অনুভব করলুম, বিশ্বাসঘাতকতাকে সর্বদেশ সর্বশাস্ত্র কেন সবচেয়ে বড় পাপ বলে নিন্দে করেছে ।

তাই তখনো আমার যেটুকু শক্তি বাকি ছিল, তাই দিয়ে আমি আমার শেষ আশ্রয় আঁকড়ে ধরে রইলুম। সেটা কী ?

আমার দৃঢ় বিশ্বাস ছিল এবং এখনো আছে, মেবল্দের খোঁজ কেউ করবে না। আমার কিংবা মেবলের ত্রিসংসারে কেউ নেই যে, আমরা কোথায় তা নিয়ে কেউ মাথা ঘামাবে। বিলেতে যে ছু-একজনের সঙ্গে আমাদের সামান্য পরিচয়, তারা ভাববে, আমরা এদেশে : এদেশের লোক ভাববে মেবলরা বিলেতে। যদি বা কারো মনে কোনো সন্দেহ হয়, তবে সে বিষুহুড়া মাদামপুরের মুকুবিবদের মতো ভাববে, কাজ কি এ পাপ ঘেঁটিয়ে। খোঁজাখুঁজি করতে গিয়ে হয়তো বেরিয়ে পড়বে, মেবল ঐ নেটিভ বাটলারটার মিস্টেস হয়ে গোপনে দিন কাটাচ্ছে। হয়তো বিলেতে কিংবা মসুরিতে। মসুরির কথা ওঠাতে মনে পড়ল, একবার আণ্ডা ঘরে গুজোব রটে, মেবলরা মসুরিতে। তার কারণ, মেবল্দের 'বিলেত যাওয়ার পর' আমি একবার মসুরিতে বেড়াতে গিয়ে হোটেলে উঠি; সেখানে একটি মেম ও তার বাচ্চার সঙ্গে আলাপ হয়। ওদের নিয়ে প্রায়ই বেড়াতে যেতুম বলে কেউ হয়তো আমাদের দেখে মেম এবং বাচ্চাকে ভালো করে সনাক্ত না করতে পেরে খবরটা রটিয়েছিল।

তা সে বিলেতেই হোক আর মসুরিতেই হোক, সে কেলেঙ্কারির হাঁড়ি কালা-আদমিদের হাটের মাঝখানে ভেঙে ইয়োরোপীয় সমাজের ক্ষতি বৈ লাভের সম্ভাবনা কী ?

এটা আমি জানলুম সেইদিন, যেদিন আমাদের পারিবারিক কেলেঙ্কারি নিয়ে ক্লাব আলোচনা করে স্থির করল, এ নিয়ে আলোচনা না করা হৈ ভালো, 'লেট্‌ দি স্লিপিং ডগ্‌ লাই।'

তাই তোমাকে এই চিঠিতেই জোর দিয়ে লিখেছি, পাপ করলেই পুণ্যাত্মা তোমাকে ধরিয়ে দেবে না। তার ব্যক্তিগত স্বার্থ না থাকতে পারে, কিন্তু সামাজিক স্বার্থ হয়তো আছে, সে পাপ গোপন করার।

কাজেই আমাকে কেউ ধরিয়ে দেবে না।

১লা জুন

প্রিয় সোম,

প্রায় ছ মাস হল তোমাকে আমার চিঠি লেখা শেষ হয়। এরপর যে আবার কিছু লিখতে হবে সে কথা আমি ভাবি নি।

আজ কিন্তু নূতন করে লিখতে হচ্ছে। তার কারণ আমার হিসেবে একটু গোলমাল হয়ে গিয়েছে।

ত্রিংশসারে আমার বন্ধু নেই। যারা আছে তারা আমার, না-শত্রু না-মিত্র। এরা যাতে আমার খুন না ধরতে পারে, তার ব্যবস্থা আমি করেছিলুম এবং ধরার কাছাকাছি এলেও কেন যে আমাকে ধরিয়ে দেবে না তার কারণও আমি তোমাকে বলেছি।

কিন্তু অযাচিতভাবে এ সংসারে হঠাৎ যে আমার এক 'মিত্র' দেখা দেবেন এবং আমার 'মঙ্গল' এবং 'উপকার' করতে গিয়ে আমার খুন ধরে ফেলবেন এ কথা আমি কল্পনা করতে পারি নি। তাই হয়েছে।

আমি যুদ্ধের জঞ্জাল অনেক কিছু করেছিলুম বলে আই. জি. মুগ্ধ হয়ে আমার সম্বন্ধে যে-সব 'গুজোব' রটেছে সেগুলো খণ্ডন করতে চান। করতে গিয়ে তিনি এবং উীন সত্যের প্রায় কাছাকাছি এসে গিয়েছেন, এ খবর আমি পেয়েছি।

এই জঞ্জাল আমি কোনো ব্যবস্থা করে রাখি নি, এখন আর করবারও উপায় নেই।

তাই যদি ধরা পড়ি তবে আমাকে হয়তো ঝুলতে হবে।

আমার জঞ্জাল শেষকৃত্য হয়তো তোমাকেই করতে হবে।